

SAN LUCAS

Jesucristupä gellgangan

Lucasmi cay libruta gellgargan Jesuspa ruraynincunata y alli willacuynincunata musyanantsicpä. Lucasga cargan mëdicum. Jesucristo cawanán witsan Lucasga manam paywanga purigantsu. Apostol Pablo Jesuspa alli willacuyninta willacur puriptinmi paywan puriyargan. Tsaynam Lucas cay librutaga gellgargan Jesuspä shumag tapupacuycur. Teofilo jutiyog runam Lucastaga gastuncunapä yanapanä cay libruta gellgananpä. Y tsaynömi Lucas gellgargan "Hechos" ningan librutapis. Lucaspita masta musyanayquipä liyinqui Hechos 16.10-17; 20.5-15; 21.1-18; 27.1-pita 28.16-yag; Colosenses 4.14; Filemon 24; 2 Timoteo 4.11.

San Lucaspa willacuynin

1 ¹⁻⁴Noga Lucas cay libruta gellgä Jesucristo cawangantam. Jesucristo willacuya gallaycungancita patsam llapan rurangancunata *apostolnincuna ricayargan. Tsay ricayangancunata willacuyänanpämi Jesus yätsirgan apostolnincunata. Paycuna willacuyaptimmi wiyaqcuna Jesucristupäga juccuna juccunapis gellgayashga. Tsaymi nogapis cösa tapupacuycur mas alli cananta munar shumag yarpachacuycur cay libruta gellgä gallaycungancita patsa imanö cangantapis. Tsaynöpam gampis, respitashga Teofilo, musyanqui willayäshungayquicuna rasun cag canganta.

Juan Bautista yurinanpä cagta angel willacungan

5 Israel nacionchö *Herodes mandacog rey caycänan witsanmi Zacarias jutiyog

runa caycargan *sacerdöti. Payga cargan Abias jutiyog sacerdötipa castanmi. Zacariaspa warminnam cargan Isabel. Paypa taytanpis sacerdötim cargan. ⁶Paycuna Tayta Dios mandangancunata cumplirmi imaypis allilla cawacuyag. Tsaymi pipis paycunapäga mana allitaga parlayagtsu. ⁷Isabel gollog captin wawan manam cargantsu. Ishcanpis rucu chacwannam cayargan.

⁸Tsaypitaman Zacariaspa y sacerdöti mayincunapa turnun chämuptinna Jerusalenman aywayargan *templuchö Tayta Diosta sirviyänanpä. ⁹Tsaychömi üsuncunaman sortiyayargan maygan sacerdötipes templuman *inciensiú goshnitseg yaycunanpä. Tsaymi Zacariasta töcargan. ¹⁰Templu rurinchö Zacarias incensiuta goshnitsinganyagnam llapan runacuna Diosman mañacucyäyargan templupa patiunchö.

¹¹Tsaychö incensiuta goshniycätsiptinmi *altarpa derécha cag

lädunchö Tayta Dios cachamungan juc *angel Zacariasta yuripasquirgan.

¹²Tsaymi tsay angelta ricaycur Zacarias feyupa mantsacargan. ¹³Tsaynam angel caynö nirgan: “Zacarias, ama mantsacaytsu. Tayta Diosmi wiyashurguyqui rugacungayquita. Warmiqui Isabelmi geshyacunga olgu wamrata. Paypa jutinmi canga Juan.

¹⁴Tsuriqui yuriyuptinmi pasaypa cushicunqui. Gam cushicungayquinöllam llapan runacunapis cushicuyanga. ¹⁵Tayta Dios munangantam tsuriqui ruranga. Manam vínuta ni ima shincatsicogcunatapis upungatsu”.

“Manarä yuricurmi *Espíritu Santuta chasquinga Diospa willacuyninta willacunapä. ¹⁶Tsaynö willacuptin *Israel runacuna atscagmi jutsancunata jagirir Tayta Dios munangannöna cawayanga. ¹⁷Tayta Diospa munayninwan unay *profeta Elias willacungannömi paypis willacunga.^a Y runacunatam yätsinga wayincunachöpis cuyanacur cawayänanpä. Mana cásucogcunatapis willangam alli cawaymanna ticrayänanpä Tayta Dios munangannö. Tsaynöpam runacunata musyatsinga salvacog shamogta chasquicuyänanpä”.

¹⁸Angel tsaynö niptinnam Zacarias tapurgan: “¿Imanöpatä musyäman cay nimangayquicuna rasunpa canganta? Nogaga rucunam cä. Warmipis chacwannam. Tsaynö caycatinga čimanöpanatä tsuri canman?” nir.

¹⁹Niptinnam angel nirgan: “Tayta Diospa willacognin angel Gabrielmi cä. Paymi cachamashga cay alli willacuya gamta willanäpä. ²⁰Cay

willaycangäcunaga llapanmi cumplinga. Ningäcunata mana criyimangayquipitam cananga mana parlanquirätsu tsuriqui yuringanyag” nir.

²¹Templupa patiunchö shuyaraycag runacunananam jucnин jcuninpis niyargan: “¿Imanirtä cay örayag Zacarias yargamuntsu?” nirnin.

²²Tsaypitanam templupita yargaraycämur shimin watpashga captin sëñasllapana tantiyatsirgan shuyaragnin runacunata. Tsaynam itsanga tantiyasquiyargan templu rurinchö imapis yuripanganta.

²³Tsaypita juc semäna templuchö ruraynincunata ushapacusquirnam wayinpana Zacariasga cuticurgan.

²⁴Warmin Isabelnam geshyag ricacurna pitsga quillantin wayillanchö cacurgan.

²⁵Tsaymi cushicurnin nirgan: “Tayta Diosmi nogata cuyapämashga. Cananpitaga runacuna mananam parlayämanganatsu: ‘Mana wachacog gollog warmim payga’ nirnin”.

Jesus yurinanpä cagta angel willacungen

^{26,27}Isabel geshyag ricacunganpita jogta quillatanam Tayta Dios cachamurgan angel Gabriela virgen Mariaman. Tsay jipashga Galilea provincia Nazaret marcachömi tärargan. Mariaga aunistganam caycargan unay rey *Davidpa castan Josewan casarayänanpä. ²⁸Tsayman chaycurmi angel nirgan: “iCushicuy, María! Tayta Diospa cuyayninmi canqui”.

²⁹Tsaynö niptinmi Maria mantsacashga yarpachacurgan: “¿Imanirtä tsaynö niman?” nir.

a 1.17 Jesucristo manarä shamuptin profeta Eliasta Tayta Dios cachamunapä cagtam runacuna shuyacuyargan (Malaquias 4.5,6). Elias pita masta musyanayquipä liyinqui 1 Reyes capítulo 17-pita 19-yag y 2 Reyes 2.1-18.

³⁰Tsaynam angel nirgan: “Maria, ama mantsariytsu. Tayta Diosmi gamta cuyashunqui. ³¹Cananpitaga geshyagmi ricacunqui. Wawayquim yuringa olgu. Paypa jutinmi canga Jesus. ³²Poderösü captinmi runacuna ‘Diospa tsurinmi’ niyanga. Paytam Tayta Dios churanga imaycawan munayyog cananpä, unay castan rey Davidtanö. ³³Paypa munayninchömi gamcuna imayyagpis cayanqui. Pay munayyog canganga imayyagpis manam ushacangatsu”.

³⁴Tsaynö angel niptinnam Maria tapurgan: “Runawan manarä juntacarga čimanöpatä geshyag ricacüman?”

³⁵Niptinmi angel nirgan: “Espíritu Santo gamman shamuptinmi Tayta Diospa poderninwan geshyag ricacunqui. Tsaymi wawayqui ‘Diospa tsurin’ gayashga canga. ³⁶Tsaynömi castayqui Isabelpis chacwanna caycar geshyacunga. Paytaga runacuna ‘Gollog warmim’ niyashgam. Cay quillawanga jogta quillanam geshyag ricacungan. ³⁷Tayta Diospäga manam imapis ajatsu” nir.

³⁸Tsaynam Maria nirgan: “Nogalläga Dioslläpa munayninchömi callä. Pay munangannö callätsun”.

Tsaynö nisquiptinnam angel illacasquirgan.

Iselta Maria watucangan

³⁹Angel yuripanganpita waraynincunanam Maria alistacur awwargan Isabelman watucagnin. Zacariaswan Isabelga täräyargan Judea provinciapa jircan ricoglla marcachömi. ⁴⁰Tsaynam wayincunaman chaycur Maria saludargan Iselta.

^{41,42}Saludariptinmi Isabelpa pachanchö wamra cuyurigan. Tsaynam Espíritu Santo munangannölla Isabel cusicurnin nirgan: “iBendítam canqui! Llapan warmicunapitam Tayta Dios gamta

acrashurguyqui. Geshyag caycangayqui wawayquipä Tayta Dios imanömi cusicun. iPaypis bendítum! ⁴³Imaläyam cusicucü Dioslläpa maman watucaycamangayquita. ⁴⁴Saludamangayquita mayasquir pachächö caycag wawäpis cusicur cuyushgam. ⁴⁵iCushicuy! Tayta Diospa angelnin nishungayquicunaga llapanmi cumplinga. Payta criycungayquipitam cushima cawanqui”.

Tayta Diosta Maria alabangan

⁴⁶Tsaynam Maria nirgan:

“Llapan shongullawanmi Tayta Diosta alabayculla.

⁴⁷Cuyapäcog Tayta Dios juc salvacogta cachamunapä cagtam cusicü.

⁴⁸Llänü shonguyog cangätam Tayta Dios ricamashga.

Cananpitaga llapan runacunapis mana gongaypam yarparaycäyangalla nogapä allita ruranganta.

⁴⁹Poderösü Tayta Diosmi nogapä rurashga alläpa allicunata. Paynöga manam pipis cantsu.

⁵⁰Tayta Dios imaypis cuyapanmi munanganta ruracunataga.

⁵¹Pipis mana rurangancunatam poderninwan ruranga.

Püedeg tucogcuna yarpäyangancunataga manacagmanmi churanga.

⁵²Mandacogcunatam mandacuyninpita gargunga. Llänü shonguyogcunatanam yanapanga.

⁵³Muchuychö cagcunatam imaycanpis faltätsingatsu. Mana cuyapäcog rïcucunatanam itsanga gechurnin imaycantapis ushacätsinga.

⁵⁴ Israel runacunata cuyaparmi
yarparyacangalla yanapananpä.

⁵⁵ Tsaynö imayyagpis cuyapänanpämi
aunirgan unay *Abrahamta y
paypita miragcunatapis".^b

Tsaynö nirmi Tayta Diosta Maria
alabargan.

⁵⁶ Isabel cagchö quimsa quillanö
tärarcurnam wayinpana Maria
cuticurgan.

Juan Bautista yuringan

⁵⁷ Tsaypitanam Isabelpa quillan
tincusquiptin geshyacurgan ollgu
wamrata. ⁵⁸ Tsayta musyaycur
castancunapis y reginacungancunapis
alläpam cushicuyargan Tayta Dios
paypä allita ruranganta.

⁵⁹ Tsaypita semänayogna wamra
caycaptinnam Zacariaspa wayinman
castancuna aywayargan tsay wamranta
üsuncunaman *señalayänanpä.^c
Tsaychömi taytanpa jutinllata churayta
munayargan. ⁶⁰ Tsaynam maman nirgan:
“iManam tsaynö jutin canmantsu! Juan
catsun jutinga”.

⁶¹ Isabel tsaynö niptinmi waquin
runacuna niyargan: “Manam pipis
cantsu castayquicunachö tsay jutiyogga”
nir.

⁶² Tsaypitanam ima jutinta
churayänanpäpis sëñasllapa Zacariasta
tapuyargan. ⁶³ Tsaynö tapuyaptinnam
pay mañargan juc tacshalla tablata
tsaychö gellgananpä. Nircurnam
gellgargan: “Juanmi jutinga canga” nir.
Zacariaspis tsurinpa jutin Juan cananta
munaptinmi tsaychö caycag runacunaga
espantacuywan ricaraycar
quëdasquiyargan. ⁶⁴ Tsaypita jinan örা

Zacariaspa shimin pashtasquiptinmi
Tayta Diosta alabargan.

⁶⁵ Tsaycunata ricarnam tsaychö
llapancunapis cushicuyargan. Tsaycuna
päsangantanam pipis maypis parlayargan
tsay entëru marcacunachö. ⁶⁶ Tsayta
wiyagecunaga yarpachacuyargan: “iCay
wamra wiñarcur ima allirä caycunga!”
nirninmi. Y runacuna parlayangannöllam
tsay wamrata Tayta Dios shumag
yanapargan.

Tayta Diosta Zacarias alabangan

⁶⁷ Tsaynam Espiritu Santo parlatsiptin
Zacarias nirgan:

⁶⁸ “Tayta Dios alabashga catsun.
Payga salvamänantsicpänam caycan.

⁶⁹ Mandu ruragnin rey Davidpa
castancunapita munayyog
salvacogmi yuringa.

⁷⁰ Tsaynö cananpämi unay
profëtancunawan
musyatsimargantsic.

⁷¹ Tsaynöllam musyatsimargantsic
chiquimagnintsiccunapita
jipimänantsicpä cagta.

⁷² Abrahamta y paypita
miragnincunatapis
auningancunata manam
gongashgatsu.

⁷³ Paytam Tayta Dios aunirgan

⁷⁴ chiquimagnintsiccunapa
mandunpita jipimänantsicpä,
Tayta Dios munangantana mana

mantsariypa ruranantsicpä,
⁷⁵ y cada junagpis munanganta
rurarna cawanantsicpä.”

⁷⁶ Tsaypita wamranta margacurcurnam
Zacarias nirgan:

b 1.55 Abrahamta Tayta Dios auninganta musyanayquipä liyinqui Genesis 22.17,18.

c 1.59 Israel runacunapa üsuncunachöga llullu wamra yurisquir juc semänata cumpliriptinmi
pallunpa garanta ichic roguparcuyag. Y tsay junagmi wamrapa jutintapis churayag.

“Gam llullu wamra, salvacogta
chasquicuyänanpä
willacuptiquim runacuna
musayangá Diospa
willacognin proféta
cangayquita.

⁷⁷ Gammi tantiyatsinqui
jutsancunapita Tayta Dios
perdonar runacunata
salvananpä cagta.

⁷⁸ Runacunata cuyaparmi Tayta Dios
salvacogta cachamunga.

⁷⁹ Tsaymi salvacog shamur
tsacaychönö cawagcunata
tantiyatsinga jutsancunata
jagirir allina cawayänanpä”.

Tsaynömi Zacarias nirgan.

⁸⁰ Tsaypita wamraga wiñayllantam
yachacurgan Tayta Dios munanganö
cawayta. Tsunyag jircacunallachömi
täcurgan Israel runacunata Diospa
willacuyninta willapaya
gallaycunganyag.

Jesus yuringan
(Mateo 1.18-25)

2 ¹Juan Bautista yuricungan witsanmi
Cesar Augusto *emperador car
mandangan cag nacioncunachö llapan
runacuna censucuyänanpä nirgan. ²Tsay
censucuy witsanga Cirenio jutiyog
runam Siria provinciachö mandacog
caycargan. ³Tsaynam llapan runacuna
marcancunaman aywayargan
yuricuyanganchö censucuyänanpä.

^{4,5}Tsaymi Mariawan Josepis Galilea
provincia Nazaret marcapita Judea
provincia Belen marcaman aywayargan
censucuyänanpä. Tsayman aywayargan
Josepa unay castan rey David tsay
marcachö yuricushga captinmi. Tsay
junagcuna Mariapaga quillan
tincushganam caycargan

geshyacunanpä. ⁶Belenchö
caycäaptinnam Mariapa öranna captin
pachanna tsarisquirgan. ⁷Belenman
censucog aywagcuna pasaypa
quichquishga cayaptinmi
posädacuyänanpä wayita mana tarir
geshyacuycurgan llullu wawanta
ashmacuna punucuyänan ramädallachö.
Tsaychö inchanawan piturcurnam
tsayllaman punuycatsirgan.

**Üsha täpagcunata angelcuna
yuripäyangan**

⁸Belen marcapa ñöpan ricogchömi
üsha mitsicogcuna täpaycäyargan
üshancunata. ⁹Tsaymanmi Tayta Diospa
*angelnin chipipirrä yuripasquirgan.

Üsha täpagcunaga pasaypam
mantsacaycuyargan. ¹⁰Tsaynam angel
nirgan: “Ama mantsacäyaytsu.
Gamcunapä alli willacuytam apamurgö.
Tsayta wiyarmi llapan runacuna
cushicuyanga. ¹¹Tayta Dios
cachamungan salvacogmi unay rey
Davidpa marcanchö yuricushga. Paymi
runacunata salvanga. ¹²Paytam
tariyanqui ashmacuna punucuyänan
ramädallachö inchashga caycagta.
Tsaytanö tarirmi cay nicangä rasun
canganta musayanqui”.

¹³Tsaynö parlapaycaptinmi tsay
angelpa ñöpanchö atsca angelcunana
yurisquiyargan Tayta Diosta caynö
alabarnin:

¹⁴ “¡Ciéluchö caycag Tayta Dios
adorashga catsun!
¡Cay patsachöpis Tayta Diosta
adoragcunapä alli caway
catsun!” nir.

¹⁵Tsaypita angelcuna ciéluman
cutisquiyaptinnam üsha täpagcuna
jucnин jcuninpis caynö ninacuyargan:
“Tayta Dios willacaycätsimuptinga acu,

acu aywashun Belenman ima päsangantapis ricanantsicpä” nir.

¹⁶Tsaynö nirmi llapancuna empéñu aywayargan. Belenman chaycurnam tariyargan Joseta, Mariata, y llulluntapis ashmacuna punucuyänan ramädallachö. ¹⁷Chaycur mitsicogcunaga willacuyargan angel yuripasquir llullupä willangancunatam. ¹⁸Tsaynö willacuyaptinmi tsaychö caycagcuna cushicuyargan. ¹⁹Mariaga tsaycuna päsangancunata shongunllachömi yarparagan. ²⁰Tsay mitsicogcuna angel willangannölla llulluta ricaycurnam Tayta Diosta agradesicurnin alabar cuticuyargan.

Jesusta templuman apayangan

²¹Tsaypita wamra semänayog caycaptinnam üsuncunaman llulluta *señalayargan. Jutinmi churayargan Jesusta, Mariata angel yuripar ningannölla.

²²Maria geshyacunganpita chuscu chunca (40) junagtanan^d Josewan aywayargan Jerusalenman. Chaycurnam templuman llulluta apayargan Tayta Diospa munayninman entregayänanpä. ²³Tsaycunata cumpliyargan *Moises gellganganchö ningannöllam.^e

Tsaychömi nican: “Tayta Diospa munayninman churayay mayor cag ollgu wamrayquicunata” nir.

²⁴Warmicuna geshyacuyanganpita ofrendata apayänanpä caynömi Moises gellgargan: “Ishcay culcushta o ishcay pushapa palumacunata apayanqui” nir.^f Tsayta cumplirmi Mariapis apargan templuman.

d 2.22 Punta cag ollgu wawanta geshyacuycur Israel warmicuna chuscu chunca junagni wayincunallachö cacuyag. Tsaypita masta musyanayquipä liyinqui Levitico 12.1-4.

e 2.23 Punta cag ollgu wamracunata Tayta Diospa munayninman churayanganta musyanayquipä liyinqui Exodo 13.2; 13.12,13; Numeros 3.11-13, 45-47. **f 2.24** Warmicuna geshyacuyanganpita ofrendata templuman imapä apayanganta masta musyanayquipä liyinqui Levitico 12.2-8.

^{25,26}Tsay witsancunam Jerusalenchö tacurgan Simeon jutiyog juc runa. Payga alli rurag carmi Tayta Diosta alabar cawargan. Paytam Espiritu Santo musyatsirgan salvacogta ricaycurrä wanucunapanpä cagta. Tsay runam shuyacurgan Israel runacuna ñacayanganpita salvacog shamur jipinanpä cagta. ^{27,28}Tsaymi Simeonta Espiritu Santo templuman pushaptin tsaychö ricargan Mariawan Jose llulluta apaycäyagta. Paycunaga aywayargan Moises gellgangan leyta cumplirninmi. Tsaynam llulluta margarcur Tayta Diosta alabar nirgan:

^{29,30}“Tayta Diosllä, cananga cumplirguyquinam nimangayquita. Cananga ricargönam cachamungayqui salvacogta. Ricangächönaga cushishgana wanuculläshä.

³¹ Maytsaychöpis runacuna musayangam cay salvacogta gam cachamungayquita.

³² Tsaymi mana Israel runacunapis tantiyacuyanga salvanayquipä cagta. Tsaynö captinmi gamta alabayäshunqui: ‘iIma allirä Israel runacunata Tayta Dios acrargan tsay castachö salvacognintsic yurinapä!’ nirnin”.

³³Simeon tsaynö ningancunata wiyarmi Josewan Maria yarpachacuyman churacäyargan. ³⁴Tsaynam Simeon Tayta

Diosman mañacurgan paycunata yanapaycunapä. Nircur Mariatanam nirgan: “Cay wawayquiman criyicuyanganpitam waquin Israel marca mayintsiccunapis salvacionta tariyanga. Payman mana criyicog cagcunaga infiernumanmi aywayanga. Cay llullu jövinyarnam Tayta Diospa willacuyninta parlaptin atsca runacuna chiquiyanga. ³⁵Tsaynopam wawayquiman criyicuyanganpis o mana criyicuyanganpis musyacanga. Tsaycuna päsaptinmi gampa shonguyqui tucusiyushganörä nananga” nir.

³⁶Tsay junagcunaga templuchömi caycargan Diospa willacognin proféta Ana jutiyog chacwanpis. Paypa taytanga cargin Fanuel jutiyog runam, y Aser castapitam cargin. Payga jipashllam runawan casaracurgan. Casacungancita ganchis (7) watallatam runan wanurgan. ³⁷Tsaymi viüdalla cacurgan puwag chunca chuscu (84) wata. Payga templupita imaypis mana yargupam pagasta junagta Tayta Diosta sirvir täcurgan. ³⁸Tsaynopis ayunarmi Tayta Diosman mañacog. ³⁸Tsaychö Simeonwan Maria y Jose parlaycäaptinnam Anapis llulluman witiyur Tayta Diosta agradesicurgan. Nircurnam runacunata willapargan ñiiñu Jesus salvacog canganta.

Nazaret marcanchö Jesus wiñangan

³⁹Tsaypitanam Tayta Dios mandacungancunata templuchö cumplisquirnin Josewan Maria cuticuyargan Galilea provincia Nazaret marcanman. ⁴⁰Tayta Dios yanapaptinmi wiñayllanta ñiiñu Jesusga mas yachagna y callpayogna ticrargan.

Jövinna caycar templuman Jesus aywangan

⁴¹Jesuspa papäninwan mamanga cada watam Jerusalenman aywayag *Pascua fiestaman päsag. ⁴²Jesus chunca ishcay (12) watayogna caycaptinmi paywanpis aywayargan tsay fiestaman. ⁴³Tsaypita fiesta ushaynam Josewan Maria cuticuyargan marcancunapana.

Jerusalenchö Jesus quédangantaga manam cuentata gocuyargantsu.

⁴⁴Paycunaga waquin runacunawan Jesus aywaycanganta yarparmi juc junagta aywaycäyangantarä watucasquir ashiyargan. Castancunata reginacungancunata tapupacurpis manam tariyargantsu. ⁴⁵Manana tarirmi cutiyargan Jerusalenman ashirrin.

⁴⁶Chäyanganpita waraynirrämi Jesusta tariyargan templuchö yachag runacunapa chöpincunachö jamaraycagta. ⁴⁷Tsaychömi wiyagecunapis cushicuyargan tsay runacunawan pasaya yachag cayninwan parlapänaunganpita.

⁴⁸Tsaynam tsaychö tariycur mamancuna pasaya cushicuyargan. Tsaynam maman nirgan: “Waway, čimanirtä caychö quédacurgayqui? Nogacuna pasaya llaquirniquim ashiyuyargö” nir.

⁴⁹Tsaynam Jesus nirgan: “Mamay, čimanirtä ashiyämar tantiyayarguyquitsu cay templuchö caycangäta? Manacu musyayanqui papäni Tayta Diospa ruraynincunatarä cumplinäpä cagta?”

⁵⁰Tsaynö niptin paycunaga manam imäpä nicangantapis tantiyayargantsu.

⁵¹Tsaypitanam cuticuyargan Nazaretman. Tsaychömi taytanwan

g 2.37 Israel runacuna goricäcuyänan templu jatuncaraymi cargin. Tsayga entérupnam pergashga cargin. Tsaychömi Tayta Diosman mañacucuyänan iglesia y atsca cuartucunapis cargin. Nircur sacerdoticuna, viüdacuna, y waquinpis posadacuyänanpäpis carginmi.

maman mandangancunata Jesus rurargan. Mamannam shongullanchö yarparargan llapan ima pásangancunatapis. ⁵²Wiñayllanta Jesus imaycapä yarpayyog ticraptinmi Tayta Diospís y runacunapis cusicuyangan.

Juan Bautista willacungan
(*Mateo 3.1-12; Marcos 1.1-8;*
Juan 1.19-28)

3 ^{1,2}Zacariaspa tsurin Juan tsunyag jircachö caycaptinmi Tayta Dios nirgan willacuyninta willacunapä. Tsay witsanmi Tiberio Cesar chunca pitsga (15) watana *Roma nacionchö maytsay nacioncunapa mandagnin caycargan. Paymi *Poncio Pilatutapis churargan Judea provinciachö mandacog cananpä. Herodestanam mandacog churargan Galilea provinciaman. Herodespa waugin Felipitanam mandag churargan “Iturea” y “Traconite” ningan provinciacunaman. Tsaynömi Lisaniastapis mandacog churargan Abilinia provinciaman. Jerusalenchönam Anaswan Caifas llapan sacerdöticunapa mandagnin caycayangan.

³Tsaymi Jordan mayu cuchun quinran marcacunapa Juan purirgan caynö willacurnin: “Jutsayquicunata jagirirnin bautizacuyay. Tsaynöpam Tayta Dios perdonayashunqui” nir.

⁴Juan tsaynö willacunapämí Diospa willacognin proféta Isaias caynö gellgargan:

“Tsunyagcunachö purirmi juc runa caynö gayayar willacunga:
‘Tayta Dios cachamungan salvacog runa chämuptin
chasquicuyänayquipä
jutsayquicunata dejariyay.
Mana alli rurayniquicunapita
yarpachacuyay.

⁵ Tsaynö rurayay ragra nänicunata pampatsagnö, jirca nänicunata, wicsu nänicunata, y shalla nänicunata allitsagnöpis.

⁶ Tsaynö listacushmanna Tayta Dios salvacogta cachamuptin llapan runacunamusyayanga”.

⁷Tsaynö Juan willacuptin runacuna bautizacuyänanpä aywagcunata caynömi nirgan: “iCulebra casta runacuna! ¿Gamecunaga ‘Bautizacuyangällawanmi salvacuyashä Diospa castigunpita’ niyanquipischi? ⁸Tayta Dios infiernuman mana gaycuyashunayquipä jutsa rurayniquicunata jagirir pay munanganta rurarna cawayay. Ama yarpayaytsu: ‘Unay *Abraham casta cayangápítam Tayta Dios salvamanga’ nir. Tayta Dios munarga Abraham casta runacunaman cay rumicunatapis ticerascäratsinmanmi. ⁹Mana alli wayog jachacunata cuchupita muturir ninaman gaycognö jutsa rurag runacunata infiernuman Tayta Dios gaycunapä listunam caycan”.

¹⁰Juan tsaynö niptinnam runacuna tapuyargan: “Tsayöraga ̄imatatä rurayáman?” nir.

¹¹Tsaynö niyaptinmi nirgan: “Ishcay trocanayquicuna capuyashuptiquega goycuyanqui mana capog cagcunata. Tsaynölla lasag micuyniquicuna capuyashuptiquega raquipaycuyanqui faltapacog cagta” nir.

¹²Niptin tsaynöllam *impuestuta cobragcunapis bautizacuyänanpä aywar tapuyargan: “Taytay, nogacunaga ̄imatatä rurayáman?”

¹³Tsaynam Juan nirgan: “Cobrayänayquipä cagllata cobrayanqui. Ama sacyacog cayanquitsu”.

¹⁴Tsaynöllam tapuyargan soldäducunapis: “Nogacunaga ̄imatatä rurayáman?”

Niyaptinnam Juan nirgan: “Ama pipa gellénintapis o imantapis puëdeg tucur gechuyanquitsu. Tsaynöllä runa mayiquicunata ama manacagtaga tumpayanquitsu.
Págayäshungayquillawan conformacuyanqui”.

¹⁵Tsaychö runacunaga salvacog cay patsaman shamenanpä cagta musyarnam yarpachacuyargan: “¿Juantsurä Tayta Dios cachamungan salvacog canman?” nir.

¹⁶Tsaymi ñöpancunachö caycag runacunata Juan nirgan: “Nogaga yacullawanmi gamcunata bautizaycä. Tayta Dios cachamungan salvacog shamogmi itsanga Espiritu Santuwan chasquicogcunata bautizanga. Mana chasquicogcunataga infiernumanmi gaycunga.”^h Tsaynö captin salvacogmanga ni ichicllapis manam nogaga iwalätsu. ¹⁷Payga tríguta wayrananpä juc runa jurquitán aptashganönám caycan. Tríguta wayrarnin pääjantaga ninamanmi gaycun y tríguntanam wayinman apacun. Tsaynömi Tayta Dios cachamungan runa jutsa ruragcunata imaypis mana upeg ninaman gaycunga y Tayta Dios munanganman cawagcunatam gloriáman apacunga”.

¹⁸Tsaynö parlaparmi Juan runacunata tucuynöpa tantiyatsirgan Diospa willacuyninta. ¹⁹Nircurnam llapan runacunachö Juan nirgan: “Herodesga waugin Felipipa warmintaⁱ gechurnin y llapan jutsata rurarnin manam allitatsu ruraycan”.

²⁰Tsaynö ninganta musyaycurmí ajarnin Juanta Herodes présutsir

carcelman wichgayänanpä mandargan. Tsaynö wichgatsir mas jutsayognam ricacurgan.

Jesus bautizacungan

(Mateo 3.13-17; Marcos 1.9-11)

²¹Carcelman Juanta manarä wichgayaptinmi runacunata bautizaycaptin Jesuspis chargan bautizacunapä. Tsaychö bautizacusquir Jesus Tayta Diosman mañacuycaptinmi ciélú quichacasquirgan. ²²Tsaypitam Jesusman Espiritu Santo urämurgan imayca palumanö. Y Tayta Diosmi ciélupita caynö nimurgan: “Gammí cuyay tsurillä canqui. Noga munangänö llapantapis ruraptiqui allápam cushicü” nir.

Jesus Adanpa ayllunpita

aywarag cangan

(Mateo 1.1-17)

²³Jesusga bautizacurgan quimsa chunca (30) watayognam. Tsaypitanam Diospa willacuyninta willacur gallaycurgan. Jesuspága runacuna yarpáyargan Josepa tsurin cangantam.

Josega canä Elipa tsurinmi.

²⁴Elinash canä Matatpa tsurin. Matatnash canä Levipa tsurin. Levinash canä Melquipa tsurin. Melquinash canä Janapa tsurin. Jananash canä Josepa tsurin.

²⁵Josenash canä Matatiaspa tsurin. Matatiasnash canä Amospa tsurin. Amosnash canä Nahumpa tsurin. Nahumnash canä Eslipa tsurin. Eslinash canä Nagaiqa tsurin.

h 3.16 “Mana chasquicogcunataga infiernuman gaycunga” ninanpa rantinga griegu idiomachöga “ninawan bautizanga” nirmi gellgaraycan. Ninawan bautismupága waquin runacuna niyan infiernuman gaycucäyanpä cagta. Waquincunanan niyan Espiritu Santuwan munayninwan bautizacuy canganta, Hechos 2.3-chö ningannö. **i 3.19** Tsay warmipa jutinmi cargin Herodias.

- ²⁶ Nagainash canä Maatpa tsurin.
 Maatnash canä Matatiaspa tsurin.
 Matatiasnash canä Semeipa tsurin.
 Semeinash canä Josepa tsurin.
 Josenash canä Judapa tsurin.
- ²⁷ Judanash canä Joananpa tsurin.
 Joanannash canä Resapa tsurin.
 Resanash canä Zorobabelpa tsurin.
 Zorobabelnash canä Salatielpa
 tsurin.
 Salatielnash canä Neripa tsurin.
- ²⁸ Nerinash canä Melquipa tsurin.
 Melquinash canä Adipa tsurin.
 Adinash canä Cosampa tsurin.
 Cosamnash canä Elmodampa tsurin.
 Elmodamnash canä Erpa tsurin.
- ²⁹ Ernash canä Josuepa tsurin.
 Josuenash canä Eliezerpa tsurin.
 Eliezernash canä Jorimpa tsurin.
 Jorimnash canä Matatpa tsurin.
- ³⁰ Matatnash canä Levipa tsurin.
 Levinash canä Simeonpa tsurin.
 Simeonnash canä Judapa tsurin.
 Judanash canä Josepa tsurin.
 Josenash canä Jonampa tsurin.
 Jonamnash canä Eliaquimpa tsurin.
- ³¹ Eliaquimnash canä Meleapa tsurin.
 Meleanash canä Menapa tsurin.
 Menanash canä Matatapa tsurin.
 Matatanash canä Natanpa tsurin.
- ³² Natannash canä Davidpa tsurin.
 Davidnash canä Jesepa tsurin.
 Jesenash canä Obedpa tsurin.
 Obednash canä Boozpa tsurin.
 Booznash canä Salmonpa tsurin.
 Salmonnash canä Nahasonpa tsurin.
- ³³ Nahassonnash canä Aminadabpa
 tsurin.
 Aminadabnash canä Arampa tsurin.
 Aramnash canä Esrompa tsurin.
 Esromnash canä Farespa tsurin.
 Faresnash canä Judapa tsurin.
- ³⁴ Judanash canä Jacobpa tsurin.
 Jacobnash canä Isaacpa tsurin.
 Isaacnash canä Abrahampa tsurin.
- Abrahamnash canä Tarepa tsurin.
 Tarenash canä Nacorpa tsurin.
- ³⁵ Nacornash canä Serugpa tsurin.
 Serugnash canä Ragaupa tsurin.
 Ragaunash canä Pelegpa tsurin.
 Pelegnash canä Heberpa tsurin.
 Hebernash canä Salapa tsurin.
- ³⁶ Salanash canä Cainanpa tsurin.
 Cainannash canä Arfaxadpa tsurin.
 Arfaxadnash canä Sempa tsurin.
 Semnash canä Noepa tsurin.
 Noenash canä Lamecpa tsurin.
- ³⁷ Lamecnash canä Matusalenpa
 tsurin.
 Matusalennash canä Enocpa tsurin.
 Enocnash canä Jaredpa tsurin.
 Jarednash canä Mahalaleelpa tsurin.
 Mahalaleelnash canä Cainanpa
 tsurin.
- ³⁸ Cainannash canä Enospa tsurin.
 Enosnash canä Setpa tsurin.
 Setnash canä Adanpa tsurin.
 Y Adannam cashga Tayta Dios
 camangan.
- Jesusta Satanas tentayta munangan**
(Mateo 4.1-11; Marcos 1.12,13)
- 4** ¹Jesus Jordan mayuchö
 bautizacusquirga Espiritu Santupa
 munayninchönám ricacusquirgan.
 Tsaypita Espiritu Santo pushaptinnam
 tsunyag jircaman aywacurgan. ²Tsaychö
 chuseu chunca (40) junag imatapis
 mana micuypam cacurgan. Tsaynö
 caycangantanam pasaypa
 mallagacuycurgan.
- ³Tsaychömi *Satanas engañayta
 munar Jesusta nirgan: “Diospa tsurin
 caycarga mä, cay rumita tantaman
 ticraratsiy”.
- ⁴Tsaynö niptinnam Jesus nirgan:
 “*Diospa palabran gellgaranganchö
 caynömi nican: ‘Manam
 micungallanwantsu runacuna cawayan,

[sinöga Dios ningancunata
cäscucuyanganwanpis allimi cawayan]”
nir.

⁵Tsaypitam Satanas juc altuman
wap jayarircur ricasrätsirgan maytsay
marcacuna pasaypa chipipegtarä.

⁶Nircurmi nirgan: “Cay ricaycangayqui
imaläya shumag marcacunam. Cay
llapan ricaycangayquicunata
entregayämargan munangä cagta pitapis
goycunäpämi. ⁷Gam ñöpäman
gonguricuycur nogata adoramaptiquega
gamillatana llapantapis goycushayqui
munayníquichöna tsaräcunayquipä” nir.

⁸Tsaynam Jesus nirgan: “Diospa
palabran gellgaranganchöga caynömi
nican: ‘Tayta Diosllatam adoranayqui y
payllantam sirvinayqui’ nir”.

⁹Tsaypitam wap Jerusalenman
apasquir templu jananchöna Jesusta
Satanas ricascatsirgan. Nircurmi nirgan:
“Diospa tsurin rasunpaypa carga mä,
caypita patsaman jegarpuy. ¹⁰Diospa
palabran gellgaranganchöga caynöchä
nin: ‘Gamta cuídashunayquipä
angelnincunatam Dios cachamunga.
¹¹Paycunam tsariyäshunqui patsaman
jegaptiquipis rumicunachö mana
tacacunayquipä” nirnin.

¹²Niptin Jesusnam nirgan: “Diospa
palabran gellgaranganchöga caynöpis
ninmi: ‘Ama Tayta Dios ningancunata
manacagman churayta yarpaytsu
munangayquita ruranayquipä” nir.

¹³Tsaynam engañaya mana puòédircur
juc tiempupä yarparaycar witicurigan.

**Jesus Galileachö Tayta Diospa alli
willacuyninta willacur gallangan**
(Mateo 4.12-17; Marcos 1.14,15)

¹⁴Tsaypitam Espiritu Santupa
munayninwanna Jesus cuticurgan
Galilea provinciaman. Tsay
marcacunachö runacuna pasaypanam
parlayargan alli yachatsicog canganta.

¹⁵Tsay marcacunapa Tayta Diosman
mañacur *goricäcuyänan
wayicunachömi Jesus yachatsicurgan.
Tsaynam runacuna alabarnin niyargan:
“Payga alläpa allim yachatsicuycun”
nir.

**Nazaret marcachö
Jesus willacungan**
(Mateo 13.53-58; Marcos 6.1-6)

¹⁶Tsaypitam Jesus aywargan
quiquinpa marcan Nazaretmanna.
Payga imaypis yaycungannömi *säbadu
jamapay junagchö yaycurgan Tayta
Diosman mañacur goricäcuyänan
wayiman. Tsaychönam llapancunapa
puntanman aywargan Diospa
palabranta liyimunapä. ¹⁷Tsaychö
liyimunapämi unay proféta Isaías
gellganganta macyayargan. Tsaytanam
quichasquir liyirgan caynö nir:

¹⁸ “Espiritu Santupa munayninchömi
caycä.

Tayta Diosmi acramashga pobri
runacunata alli willacuyninta
willapänapä.

Tsaynömi cachamashga runacunata
jutsancunapita jipinäpä,
gapracunapa ñawinta
allitsinäpä, y mana alli
cawaypita alli cawayman
jipinäpä.

¹⁹ Tsaynö Tayta Dios cachamashga
willacungäpita runacuna
salvacionta tariyänänppä”.

²⁰Tsaynö liyisquirnam Jesus
cutiycatsirgan goricäcuyänan wayichö
cuïdacog runata. Cutiycatsir
jamacuriptinnam tsaychö caycag llapan
runacuna payta pasaypa ricaräyargan.
²¹Tsaymi Jesus nirgan: “Tsay
liyimungächö noga ruranäpä
cagcunanan gellgaraycan. Tsaychö

gellgarangannöllam cumpliyangäta
gamacuna ricaycäyanqui".

²²Tsaynö niptinmi llapan runacuna Jesuspä espantar parlayargan: "¿Imatata
pay musyan tsaynö parlananpä? ¿Cayga manacu Josepa tsurinlla?" nir.

²³Tsaynam Jesus nirgan: "Gamacuna yarpaycäyanquim: 'Caynö niyämaytapis
mä, Capernaum marcachöpis milagrucunata rurashga caycarga
marcantsichöpis milagrucunata ruramutsun' nir. Y tsaynöllam
yarpaycäyanqui runacuna parlayangannölla caynö niyämaytapis:
'Jampicog carga quiquinrä jampicutsun'
nir".

²⁴Nircurmi nirgan: "Juclä marcacunachöga Tayta Diospa willacognin profétata chasquicuyanmi. Peru quiquinpa marcanchöga manam cäsupäyantsu. [Tsaynö mana chasquicayämaptiquim milagrucunatapis rurashätsu cay marcäcunachöga.] ^{25,26}Yarpayay Diospa willacognin Elias cawanán witsan imanö päsangantapis. Quimsa wata jogta quilla mana tamyaptin llapan marcacunachö pasaypa muchuyta päsayanä. Tsay witsan Israel nacionchö atsca viüdacuna ñacar cayaptinpis Tayta Dios manam cachanätsu Elias yanapananpä maygan viüdatapis. Tsaya rantinga cachanä juclä Sidon nacionchö 'Sarepta' ningan marcallamanmi, tsaychö juc viüdata yanapananpä. ²⁷Tsaynömi Diospa willacognin Eliseo cawanán witsanpis Israel nacionchö atscag *lepra geshyawan geshyagcuna cayänä. Tsay geshyawan atscag geshyaycäyaptinpis Eliseo manash allitsinätsu maygantapis. Juclä Siria nacionpita juc runa Naaman jutiyogllatam allitsinä".

²⁸Tsaynam Jesus tsaynö ninganta wiyaycur tsaychö caycag runacuna

cuentata gocusquiyargan juclä chiquishga runacunará Tayta Diosman mas yäracog cayanganta. Tsaymi pasaypa rabyanäyargan. ²⁹Tsaynö rabyanarnam marcapita jipisquir Jesusta apayargan gagapa quillunninman tsaypita cumariycuyänanpä. Paycunapa marcanga cargin tsay gaga jananchömi. ³⁰Tsaychö cumariycuya munayaptinpis runacunapa chöpinpita yargurirmi Jesus aywacurgan.

**Supay lötuyätsingan runata
Jesus allitsingan
(Marcos 1.21-28)**

³¹Tsaypitana Galilea provinciachö Capernaum marcaman Jesus aywargan. Tsaychömi cada säbadu jamapay junagchö runacunata yachtsirgan. ³²Pipis pay yachtsicungannö shumag mana yachtsiptimmi runacuna cushicur niyargan: "Parlamungantaga cumplichunmi" nir.

³³Tsay goricäcuyänan wayichömi caycargan supay lötuyätsingan runa. Paymi gayarar nirgan: ³⁴"¡Jesus Nazaret runa! ¿Imatata munanqui nogacunawan? ¿Nogacunaman shamurguyqui ushacätsiyämänayquipäcu? ¡Noga regimi Diospa tsurin salvacog cangayquita!" nir.

³⁵Tsaynö niptinmi Jesus supayta nirgan: "¡Upälla supay, yargucuy cay runapita!" nir. Tsaynö niycuptin llapan runacunapa ñöpanchö tsay runata tapsiriycurmi supay aywacurgan. ³⁶Tsaynam runacuna jucnín jucninpis ninacuyargan: "Manam imaypis wiyarguntsictsu cay runa yachtsicungantanöga. ¡Payga ima puëdegnar! ¡*Supaycunapis cäsuyänächä!" nirlin.

³⁷Supayta gargunganta mayarnam tsay quinran marcapunachö runacuna parlayargan Jesus alläpa poderyog canganta.

**Atscag geshyagcunata
Jesus allitsingan**
(*Mateo 8.14-17; Marcos 1.29-34*)

³⁸Tsaypitanañ goricäcuyänan wayipita Jesus aywargan Pedrupa wayinman. Tsay wayiman chaycunapäga Pedrupa suegrammi ujuraycargan pasaypa antsa achacharnin. Tsaymi tsaychö caycag runacuna Jesusta rugacuyargan payta allitsinapanpä. ³⁹Tsaynam Jesus tsay geshyaycag warmiman witiycur nirgan geshya yargucunapanpä. Niycuptin jinan öram allisquirgan. Tsay warminam sharcurcur tsaychö caycag runacunata juella micuynincuna garargan.

⁴⁰Tsaypita rupay ullunaycaptinnam Jesusman apayämurgan imaycaläya geshyawan geshyaycagcunata. Tsay geshyagcunata yataycuptinmi llapanpis alliscäriyargan. ⁴¹Tsaynömi atscag geshyagcunapitapis supaycuna targuyargan caynö gayararin: “¡Gamga Diospa tsurimni canqui!” nir.

Tsaynö supaycuna niyaptin Jesusga manam munargantsu paypita imata parlarcuyänantapis.

**Goricäcuyänan wayicunachö Jesus
Tayta Diospa willacuyninta
willacungan**
(*Marcos 1.35-39*)

⁴²Tsaypita patsa warasquiptinnam tsay marcapita Jesus aywargan tsunyag jircaman. Tsaymanpis runacunaga ashirnin chäyarganmi. Tsaychö tariycurnam rugacuyargan paycunapita mana aywacunapanpä. ⁴³Tsaymi Jesus nirgan: “Waquin marcacunachöpis Diospa willacuyninta willacunärämi

caycan. Tsaypämi nogata Tayta Dios cachamashga” nir.

⁴⁴Tsaynömi ari Jesusga maytsay Israel marcacunapa purir goricäcuyänan wayicunachö willacurgan Diospa alli willacuyninta.

**Pedro atsca pescädudunata
tsaringan**

(*Mateo 4.18-22; Marcos 1.16-20*)

5 ¹Genesaret gocha/ cuchunchö Jesus caycaptinnam quichquiypa runacuna goricäyargan Diospa willacuyninta wiayänapanpä. ²Tsay gocha cuchunchömi Jesus ricasquigan ishcay *büquicuna caycagta. Pescag runacunanga büquincunapita yargurirmi mällancunata awiyäyargan. ³Tsaychö pasaypa atsca runacuna quichquiparäyaptinnam Pedrupa cag büquinman Jesus yarcurcur rugacurgan cuchunchö büqui caycagta mas chöpin niragman witircatsiyänapanpä. Tsaynam tsay büquiman jamaycur tsaypitana runacunata yachatsicamurgan.

⁴Yachatsiyta ushasquirnam Pedruta nirgan: “Cananga büquiquita apayay mas chöpin niragman. Nircur tsaychö jitayay mällayquicunata pescädudunata tsariyämunayquipa” nir.

⁵Tsaynö niptinnam Pedro nirgan: “Taytay, canan pagas warat pescaycarpis manachä ni juclayllatapis tsariycuyargötsu. Gam niyämaptiquega mälläcumata mä, yapay jitayäshä ari”.

⁶Tsaynö nirmi mällancunata shumag mashtaycur pasaypa atscata pescädudunata tsariyämurgan, mällancunapis rachinäyanganyag.

⁷Tsaynam jucag büquichö pescag mayincunata gemllar gayacuyargan

j 5.1 Galilea gochapa jucaglä cuchunchömi cargan Genesaret marca. Tsaymi Galilea gochataga “Genesaret gocha” niyagpis. Tsaytam Lucas cay versüculuchö gellashga “Genesaret gocha” nir.

jipishir yanapayänanpä. Paycuna aywarnam ishcan bürüincunaman pescäduncunata raquiyargan bürüincunapis jundinanganyag.

⁸⁻¹⁰Tsaychömi caycargan Zebedeupa tsurincuna Santiaguwan Juanpis. Paycunaga cayargan Pedrupa pescag mayincunam. Pasaya atsca pescäduncunata tsarycurmi llapancunapis espartacur mantsacäcuyargan. Tsaymi Simon Pedro Jesuspa ñöpanman gonguricuycur nirgan: “Nogaga jutsasapa runam callä, taytay. Manam gampa ñöpayquichö cayta merécillätsu” nir.

Niptinnam Jesus nirgan: “Tsayta ama mantsariytsu. Canampita pescäduta tsariyänayquipa rantinga Diospa alli willacuyninta runacunatanam willapäcayämunqui”.

¹¹Tsaynö niptinmi gocha cuchunchö bürüincunata y imaycancunatapis jagiriyurnin Jesuswan aywacuyargan.

Leprawan geshyagta

Jesus allitsingan

(Mateo 8.1-4; Marcos 1.40-45)

¹²Juc cuti Jesus juc marcachö caycaptinnam chargan leprawan geshyacog juc runa. Tsay runam Jesuspa ñöpanman gonguricuycur nirgan: “Taytay, cay geshyäpita alliycatsillämay” nir.

¹³Tsaynö niptinnam Jesus yataycurgan “Cananpita gam allirguyquinam” nirnin. Tsaynö nir yataycupinmi tsay runapita jinan öra tsay lepra geshyan illacasquirgan.

¹⁴Nircurnam Jesus nirgan: “Ama pitapis willapanquitsu noga allitsingäta. Cananga templuman aywacuy unay Moises gellgangen leychö ningannö

ofrendata apacurcur.^k Tsaychö sacerdöti ricaycushurniquim awicashgana cangayquita musyatsicamunga” nir.

¹⁵Tsaynö Jesus imayca milagru ruraynincuna musyacänanta mana munaycaptinpis maytsaychömi masna musyacargan. Tsaynam mas atscana goricäyargan yachatsingancunata wiyayänanpä y geshyancunapita alliyätsinanpä. ¹⁶Jesusga tsunyagcunaman aywaycurni Tayta Diosmanga imaypis mañacog.

Juc paraliticuyashga runata

Jesus allitsingan

(Mateo 9.1-8; Marcos 2.1-12)

¹⁷Juc wayichömi Jesus runacunata yachaycätsirgan. Tsaychömi jamaracyäyargan *fariseucuna y Moises gellgangen ley yachatsicogcuna. Paycunaga shayämushga cayänä Galilea provinciapa maytsay marcancunapita, Judea provinciapa, y Jerusalenpita. Tayta Diospa poderninwanmi Jesusga caycargan geshyagyashgacunata allitsirnir. ¹⁸Tsaymanmi runacuna quirmawan wantushga chätsiyämurgan paraliticuyashga runata. Paycunaga imaycanöpapis Jesuspa ñöpanman yaycatsiytam munayargan. ¹⁹Tsaychö pasaypa runacuna quichquicashga cayaptinmi imanö caytapis mana puëdiyargantsu. Tsaynam wayi jananman yarcarcatsir wayi jananta uchcusquir wascawan watarcur cachäyargan quirmantinta Jesuspa ñöpanman. ²⁰Jesusga musyarganmi tsay runacuna payman yäracunganta. Tsaynam tsay geshyaycag runata nirgan: “Jutsayquicunapita perdonashgam canqui” nir.

^k 5.14 Lepra geshyawan geshyag runacuna allircur imata rurananpä cagcunapita masta musyanayquipä liyinqui Levítico 14.1-32.

²¹Tsaynam tsaychö waquin ley yachatsicogcunawan fariseucuna yarpachacuyargan: “¿Pitä cay runaga llutancunata parlar Diosta ajätsin? Tayta Diosllam jutsa ruragcunataga perdonan” nir.

²²Tsaynö yarpacäyanganta musyarnam Jesus paycunata nirgan: “¿Imanirtä gamcuna llutanta yarpäyanqui? ^{23,24}Tayta Diosmi nogata cachamashga cay patsachö runacunata jutsancunapita perdonanäpä. Cananmi Tayta Dios rasunpa cachamanganta musyayanquipä ‘Quirmayquita aparcur aywacuy’ nir allitsishä ricanayquicunachö” nir.

Tsaynö nisquirnam Jesus runata nirgan: “Cananga allishganam canqui. Sharcur quirmayquita apacurcur wayiquipa aywacuy” nir.

²⁵Tsaynö niyuptin tsay runanam llapancuna goriracyaptin ñöpancunapita jinan öra jitarangan quirmanta icshacurcur wayinpa aywacurgan Tayta Diosta alabarnin.

²⁶Tsayta ricarmi llapan runacuna cushishga alabayargan Tayta Diosta: “¡Pay rurangantanöga imaypis manam ricarguntsictsu!” nirnin.

**Jesus discípulun cananpä
Mateuta acrangan**
(*Mateo 9.9-13; Marcos 2.13-17*)

²⁷Tsay wayipita yargurir Jesus aywaycarnam ricäirgan Mateo jutiyog^l juc runa *impuestuta cobrar jamaraycagta. Tsaymi Jesus nirgan: “*Discípulu canayquipä nogawan aywacushun”.

²⁸Niptinnam sharcurcur tsaychö imaycantapis jagiriycur Jesuswan Mateo aywacurgan.

²⁹Tsaynö discípulun cananpä Jesus acranganpitam agradesicurnin fiestata

Mateo rurargan wayinchö. Tsaychömi impuestuta cobrag mayincunawan mas waquin runacunapis Jesuswan micuycäyargan. ³⁰Tsaynö imaycalaya runacunawan Jesus caycagta ricaycurnam fariseucuna y ley yachatsicogcuna parlacacharrä Jesuspá discípuluncunata niyargan: “¿Imanirtä gamcuna impuestu cobracogcunawanpis y jutsasapacunawanpis juntacar micuyanqui upuyanqui?” nir.

³¹Tsaynö niyaptinnam Jesus caynö nirgan: “Geshyagcunallam jampicogta miñishtiyan. Manam sänü cagcunaga imata munayantsu. ³²Nogaga manam shamurgö alli rurag runacunallata Tayta Diospa willacuyninta tantiyatsinäpätsu, sinöga jutsa ruragcunatapis tantiyatsinäpä shamushga carmi paycunawanpis juntacü”.

**Mushog yachatsicuyninta
Jesus tantiyatsingan**
(*Mateo 9.14-17; Marcos 2.18-22*)

³³Tsaypitnam Jesusta tapuyargan: “Juan Bautistapa *discípuluncuna y fariseucunapa discípuluncuna imaypis ayunayanmi Tayta Diosman mañacur. Gampa discípuluyquicunaga éimanirtä ayunayantsu?” nir.

^{34,35}Tsaynö niyaptinnam Jesus nirgan: “¿Imanirtä discípulucuna ayunayananta munayanqui? ¿Casacuy fiestaman invitashgacuna ayunaycumnantsurä? Tsay invitashgacunaga casarag noviuwan juntu caycarnin micur upur cushishga cayangannöllam discípulucunapis nogawan juntu cayanganyagga ayunayanrätsu. Peru wanuscatsiyämaptinmi itsanga ayunayanga” nir.

³⁶Tsaynö nisquir caynopis Jesus nirganmi: “Manam pipis macwa röpanta

15.27 Mateupa jucag jutinmi cargan Levi.

mushog ratashwanga remendantsu. Mushog ratashwan remenda shgaga genticäratsirmi rachiratsinman. Y manam shumagga ricacunpisnatsu macwa röpacchöga”.

³⁷“Tsaynopis manam pipis wiñantsu tsayrä puwatsishga aswata tsillicaycag uylluman. Tsayño cargo masran tsilliratsinman. Tsaynopam aswapis jichacasquinman y uyllupis ushacarinman. ³⁸Tsaymi tsayrä puwatsishga aswataga wiñantsic alli uylluman. Tsayño rurapteringa aswapis jichacantsu ni uyllupis manam paquicantsu”.^m

³⁹“Y manam pipis unayna churarashga vínuta yawarcur tsayrä rurashga cagtaga upuyta munannatsu: ‘Unayna churarashga cag vínú mas alli caycan’ nirnin. [Tsaynöllam unay cag yachatsicuycunawan yachacashga car canan noga yachatsingäcunataga runacuna chasquicuya munayantsu]”.

**Säbadu jamapay junagchö
Jesus munayyog cangan**
(Mateo 12.1-8; Marcos 2.23-28)

6 ¹Juc säbadu jamapay junagchönam discipuluncunawan Jesus aywaraycäyargan trigu poguraycag cuchunpa. Tsayño aywaraycäyangantana discipuluncunaga tríguta quiptuscäir cuparir micuyargan. ²Tsayta ricarnam fariseucuna niyargan: “Canan junagga manachä arucuy junagtsu. Tsayño caycaptina címanirtä tríguta quiptupacur puriyäyanqui?” nir.

³Tsaynam Jesus nirgan: “¿Gamacunaga manacu Diospa palabranta liyiyarpis

yarpäyanqui unay rey David mallagar imata ruranganta? ⁴David soldäduncunawan puriycar millcapancuna manana captin mallagäyanä. Tsaynam Tayta Diosman mañacucuyänan ruriman David yaycusquir sacerdöticunalla micuyänanpä cag churarag tantata micurinä. Nircurmí garanä gatirañincunatapis. [David mana micunänppä cagta micuringanpis ejutsacu cashga gamcunapä? Tsaynömi discipulücunapis mana jutsatstu ruracyayan ‘Jamapay junagchö tríguta ama quiptupacuyätsuntsu’ niyaptiquipis]”.

⁵Tsaynö nisquirpis Jesus nirgan: “Noga Tayta Dios cachamashga captinmi munayyog caycä säbadu junagchöpis runacuna imata rurananpä o mana rurananpä cagtapis ninäpä”.

**Maquin wanucashga runata säbadu
jamapay junagchö Jesus allitsingan**
(Mateo 12.9-14; Marcos 3.1-6)

⁶Tsaypita juc säbadu jamapay junagchönam Tayta Diosman mañacur goricäcuyänan wayiman Jesus yaycurgan yachatsicamunanpä. Tsaychömi maquin wanucashga juc runata tarirgan. ⁷Ley yachatsicogcunawan fariseucunana Jesusta ricapaycäyargan shonguncunallachö yarpachacurmi: “Mä, ècanan jamapay junag mana arucuy caycaptin cay runata allitsingacush o manacush? Allitsiptinga tsaymi achäqui canga autoridäcunaman apatsinapä” nir.

⁸Tsaynö yarpaycäyanganta musyarnam tsay maquin wanucashga

m 5.36-38 Yachatsicuynincunata Jesus iwalatsirgan mushog röpaman y tsayrä puwashga aswaman. Runacunapa unay yachatsicuynincunataga iwalatsirgan macwa röpaman y tsillishga uylluman. Tsayño iwalatsirmi Jesus yarpachacatsirgan quiquinpa yachatsicuyinwan unay cag yachatsicuycunaga mana iwalanganta.

runata Jesus nirgan: “iSharcur tsay chöpiman ichümuy!” nir. Niptin tsay runaga chöpincunamanmi ichircuran.

⁹Nircurnam tsay fariseucunata Jesus nirgan: “Canan mä niyämay. ¿Tayta Dios imata ruranantsictatä munan jamapay junagchö? ¿Cay geshyaycag runata cuyapashwancu o dejarishwancu ñacacunänpä?” nir.

¹⁰Tsaynö nisquirnam tsay quinran caycag runacunata ricaycachasquir runata nirgan: “Maquiquita mashtamuy” nir. Niptin tsay runa maquinta mashtasquir sänunam ticasquirgan.

¹¹Säbadu jamapay junagchö tsaynö allitsinganta ricarnam fariseucuna pasaypa rabyanar willanacuyargan Jesusta imanöpa wanutsiyänänpäpis.

**Jesus chunca ishcay
apostolincunata acrangan**
(*Mateo 10.1-4; Marcos 3.13-19*)

¹²Tsay junacunam juc tsacay Jesus juc jircanman aywaycur Tayta Diosman mañacuycar waragan. ¹³Tsaypita patsa warasquiptinnam llapan discipuluncunata gayargan. Nircurmí paycunapita acrangan chunca ishcay (12) runacunata *apostolincuna cayänänpä. ¹⁴Paycunaga cayargan:

Simon (Paytam jutinta Jesus churapargan “Pedro” nir),

Simonpa waugin Andres,

Santiago,

Juan,

Felipe,

Bartolome,

¹⁵ Mateo,

Tomas,

Alfeupa tsurin Santiago,

“Celote” ningan Simon,

¹⁶ Santiagupa waugin Judas, y

Jesusta ranticog cag Judas Iscariote.

Atscag runacunata Jesus allitsingan
(*Mateo 4.23-25*)

¹⁷Jircapita Jesus uraycarnam juc patachö atscag discipuluncuna y waquin runacunapis goriraycagta tarirgan. Tsay runacunaga shayämushga cayargan Judea provinciapita, Jerusalenpita, lamar cuchun Tiro y Sidon marcacunapita. ¹⁸Paycunaga goricäyargan Jesus yachatsicunganta wiyayta munarmi y geshyancunapita alliyta munarmi. Tsaychö supay löcuyätsingan runacunapis alliyarganmi.

¹⁹Jesus poderninwan runacunata allitsiptinmi jucpis jucpis yatayta munayargan geshyancunapita allisquiyänänpä.

**Cushicuypä y llaquicuypä
Jesus willacungan**
(*Mateo 5.1-12*)

²⁰Tsaynam Jesus discipuluncunata ricaycur nirgan:

“Cay vïdachö ñacacog cagcunata gloria vïdachöga Tayta Dios alli cawaychömi catsiyäshunqui.

²¹ Cushishgam cawayanqui cay vïdachöga mallagaychö cagcunaga. Gloria vïdachö mananam mallagäyanquinatsu.

Cushishgam cawayanqui cay vïdachö wagacuychö cagcunaga. Gloria vïdachö cushicuylachömi Tayta Dios catsiyäshunqui.

²² Nogata gatiräyämangayquipita runacuna chiquiyäshuptiqui, garguyäshuptiqui, y ashlliyäshuptiqui ama llaquicuayatsu.

²³Noga raycur ñacagcunataga Tayta Diosmi gloria vïdachö premiuta

goyäshunqui. Gamcunatanömi unay proféta cunatapis ñacatsiyargan. Tayta Dios tsay proféta cunata premiuta gongannöllam gamcunatapis goyäshunqui. Tsaynö cananpä caycaptina ñacarpis cushicuyay”.

²⁴Tsaynö nisquirnam waquin cunatapis Jesus nirgan:

“¡Allau, cushishgalla cawacog rïcu runacuna! Pobricunata imayquicunallatapis mana garaycungayquipitam washa vídachöga wagacur ñacayanqui.

²⁵ ¡Imaycayquicunapis mana faltapuyäshuptiqui cushishgalla cagcuna! Juc vídachöga manam Diospita imatapis chasquianquitsu.

¡Quiquillayquicuna imatapis llutanta rurasquir asicogcuna! Gamcunaga pasaypa llaquicurmi wagayanqui.

²⁶ ¡Allau, gamcunachö llapan runacunapita alabashga cayta munagcuna! LLutan yachatsicogcunata unay runacuna alabayangannöllam gamcunatapis alabaycäyäshunqui”.

Chiqui runacunata cuyanantsicpä Jesus willacungan (Mateo 5.38-48; 7.12)

²⁷“Shumag cawacuyänayquipä cay ningäta tantiyacuyay. Nogata gatirayämangayqui raycur chiquiyäshogniquicunataga cuyayanqui. Alli shonguyquicunawan ricayanqui mana alli ricashogniquicunatapis.

²⁸Rimayäshogniquicunapä allillata parlayanqui. Chiquiyäshur contrashogniquicunapäpis Tayta

Diosman mañacuyay cawayninchö yanapananpä. ²⁹Lagyacyuäshuptiquipis jucag lädu cag cärayquicunatana camapaycuyanqui. Punchuyquicunata gechuyäshuptiquega chompayquicunatapis llogtipaycuyanqui. ³⁰Imallatapis mañacuyäshuptiquega garaycuyanqui. Tsaynö imayquicunatapis gechuriyäshurniqui apacuyaptinga ama ‘Cutiycatsimay’ niyanquitsu. ³¹Runa mayiquicuna alli ricayäshunayquita munarga gamcunapis paycunatarä alli ricayanqui”.

³²“Cuyanacuyangallayquiwan cuyanacuyarga ɿima allitatä ruraycäyanqui? Jutsasapa runacunapis cuyanacuyangallanwanga cuyanacuyanmi. ³³Alli cagcunallawan alli cawarga ɿima allitatä ruraycäyanqui? Jutsasapa runacunapis tsaynöllaga cawayanmi. ³⁴Yanapanacog puralla imachöpis yanapanacurga ɿima allitatä ruraycäyanqui? Yaga runacunapis yanapagnincunallataga yanapanmi imatapis garanacuyänan raycurlлага”.

³⁵“Gamcunaga chiquiyäshogniquicunata cuyayay. Paycunapä allicunallata rurayay. Imatapis mañaycur ama yarpäyaytsu págayäshunayquitaräga. Tsaynö alli cawarga poderösü Tayta Diospa wamrannam cayanqui. Paypa wamran carnam ciéluchö listangancunata chasquianqui. Tayta Diosga cuyapanmi jutsa ruraychö cawacogcunata. ³⁶Tsaynö captin Tayta Dios cuyapäcog cangannö gamcunapis cuyapäcog cayay”.

Runa mayintsicta mana jamuränantsicpä willacungan (Mateo 7.1-5)

³⁷“Tayta Dios mana juzgayäshunayquipä jamuräcur runa

mayiquicunapa vیدanta ama
ashiyanquitsu. Llutanta rurayaptinpis
ama contran sharcuyanquitsu. Contran
sharcuyänayquipa rantinga
perdonayanqui, Tayta Dios
gamcunatapis perdonayäshunayquipä.
³⁸Runa mayiquicunata cuyapar
imallatapis garacyuaptiquim Tayta
Dios gamcunatapis mas mastा
cutitsiyäshunqui tupuyquipitapis jichag
jichag. Cuyapäcog cayangayquinöllam
gamcunapis Tayta Diospa
cuyapäcuyninta chasquianqui”.

³⁹“Juc gapra runa gapra mayinta
manam pushanmantu. Pushanacurga
÷imanatsurä pozumanpis ishcan
jegacurpuyanman? Nogapita imatapis
manarä yachacurga gamcunapis
gapranöllam caycäyanqui. ⁴⁰Maygan
yachacogpis manam yachatsegninpita
mastaga yachantsu. Tsaynömi
yachatsingäcunata shumag cäsumag
cagga gamcunapis noga cawangänö
cawayanquiman”.

⁴¹“Gamcunaga ÷imanirtä runa
mayiquicunapa ñawinchö shucata
jipicuriyänanta munar ricapäyanqui,
quiquiquicunapa ñawiquicunachö geru
cuentatarä caycaptin?
⁴²Ñawiquicunachö geru cuenta
caycaptina ÷imanöparä runa
mayiquitarä niyanquiman: ‘Ñawiquichö
shucata jipipasquishayqui’ nirmín?
iYachag tucogcuna! Puntataga
ñawiquicunachö cagtarä jipicuyay.
Tsayrämi ricayta puëdiyanqui runa
mayiquipa ñawinchö caycagta
jipipäyanayquipäga”.

**Imanö cawayninpita runata
reginantsicpä willacungan**
(Mateo 7.17-20; 12.34,35)

⁴³⁻⁴⁵Nircur imanö runacuna
cayangantapis caynopam tantiyatsirgan:
“Alli wayog jachaga allillatam wayun y

mana alli wayog jachaga mana
allillatam wayun. Tsaynöllam
wayuyninpita regintsic ima jacha
cangantapis. Higusga manam
cashacunapa prütantsu ni üva manam
shiracapa mullacantsu. Ima jachatapis
wayuyninpа regingantsicnöllam
runacunatapis cawayninpita musyantsic
alli runa canganta o mana alli runa
cangantapis. Tsaynömi ari alli
runacunaga allillata parlayan
shonguncunachö allita yarpar. Y mana
alli runacunaga mana allicunatam
parlayan shonguncunachö
yarpäyanganllata”.

**Jesusta cäsucog runa y mana
cäsucog runa imanö canganpis**
(Mateo 7.24-27)

⁴⁶“÷Imanirtä gamcuna ‘Señor, gampa
manduyquichömi caycä’ niyämanqui,
noga ningäta mana cäsuyämarga?
⁴⁷Canan tantiyatsiyäshayqui wiyacamag
runa imanö cangantapis. ⁴⁸Wiyacamag
runaga alli cimientushga wayi
sharcatsishganömi caycan. Tsay alli
rurashga wayega atsca gashgay yacu
miramur jayaptinpis manam juchuntsu.
Tsay wayi mana juchognöllam nogata
cäsumag cagcunaga infiernuchö
ushacaypita salvacunga fisyu final
junagchöpis. ⁴⁹Ningäcunata wiyaycar
mana cäsumag cagmi itsanga allpa
janallanchö sharcatsishga wayinölla.
Tsay cimientuynag wayitaga gashgay
yacu goricar shamurninpis
juchuratsinmi”.

**Capitanpa wätayninta
Jesus allitsingan**
(Mateo 8.5-13; Juan 4.43-54)

7 ¹Runacunata tsaynö parlapayta
ushasquirnam Jesus aywargan
Capernaum marcaman. ²Tsaychömi juc
capitanpa cuyay wätaynin wanuya

ricarna pasaypa antsa geshyaycargan.
³Tsaynam Jesus runacunata
 allitsinganta mayarna tsay capitan
 Jesusman cachacurgan Israel mayor
 runacunata: “Rugacaycayämuy
 wätayniä allicatsinapä” nir.

⁴Tsaymi paycuna Jesus
 caycanganman chaycur rugacuyargan:
 “Taytay, capitarpa wätaynintash
 allitsipaycullanqui. Capitanga alli
 runam. ⁵Marca mayintsiccunawanpis
 payga allim cawan. Tsaynö alli carnin
 paymi goricäcunantsic wayitapis
 sharecatsishga” nir.

⁶Tsaynö rugacuyaptinmi Jesus
 aywargan paycunawan. Capitarpa
 wayin cagman Jesus
 yaycuraycaptinnam amiguncunata
 capitarpa taripätsirgan Jesusta caynö
 niyänänpä: “Amanash
 afanacullanquinatsu, taytay. Capitanga
 musyannash wayinman mana
 chayllapanapis allita ruraycunayquipä
 cagta. Musyaynash, taytay, Israel
 runacunapa tisuyquicunachö juclä
 runacunawan chänacuy mana alli
 cangan. ^{7,8}Tsaynöpis payga musyanshi
 Israel runacuna juclä runacunawanga
 mana parlapänacuyanganta. Tsayshi
 quiqinga shamushgatsu
 rugacuycushunayquipä”.

“Pay musyanshi gam munayyog
 cangayquita. Tsayshi cayllapitana
 niycullanqui wätaymin allisquinanpä.
 Paypis mandagninpa munayinchöshi.
 Tsaynöshi paypa munayinchöna cayan
 mandangan soldäduncunapis. Tsayshi
 maygantapis ‘Ayway’ niptin aywayan,
 ‘Shamuy’ niptin shayämun, y
 wätayninta ‘Cayta ruray’ niptinpis
 ruran. Gam imaycawan munayyog
 captiqui musyanshi imapis ningayquega
 ruracasquinanpä cagta”.

⁹Tsaynö ninganta wiyaycurni Jesus
 cushicur paywan aywaycag runacunata

nirgan: “Paynö llapan shongunwan
 yäracamag runaga manam Israel
 runacunachöpis cantsu” nir.

¹⁰Tsaynö nisquiptin capitarpa
 cachancuna cutiycurmi tariyargan tsay
 wätay allisquishgana caycagta.

Viüdapa wawanta Jesus cawatsingan

¹¹Tsaypitanam Jesus
 discipuluncunawan Capernaum
 marcapita “Nain” ningan marcaman
 aywaycäyargan. Tsaychömi atscam
 runacunapis paycunawan
 aywaraycäyargan. ¹²Tsaypita
 marcaman yaycuraycarnam
 tincusquiyargan ayata pampayänänpä
 apaycäyagwan. Tsay apaycäyangan
 ayaga cargan juc viüdapa jaypallalan
 wawanmi. Atscag runacunam
 llaquiparnin aywaycäyargan
 pampäshiyänänpä. ¹³Tsay viüda
 pasaypa wagagta ricaycurnam Jesus
 cuyapar nirgan: “Ama wagaytsu” nir.

¹⁴Tsay ayata apaycagcunaman
 witiyuctinnam paycuna
 ichisquiyargan. Tsaynam tsay aya cäjata
 Jesus yataycurnan. Nircurnam nirgan:
 “iJövin, sharcuy!” nir.

¹⁵Tsaynö nisquiptin jövin jinan öram
 jamarcamur ñöpan quinranchö caycag
 runacunata parlapar gallaycurnan. Tsaypita
 viüdatanam Jesus nirgan:
 “Ama wagaynatsu. Wawayqui
 cawarimushganam” nir.

¹⁶Tsayta ricaycurni llapan runacuna
 cushicurnin Tayta Diosta alabayargan
 caynö: “Diospa willacognin profétam
 nogantsicman chaycamushga. Cananmi
 siga Tayta Dios cachaycamushga
 imaycachöpis cuyapäcog cayninwan
 yanapaycamänantsicpä” nir.

¹⁷Tsaynömi ari Jesuspa ruraynincuna
 musyacargan Judea provinciachö y
 ñöpan quinran marcacunachöpis.

**Juan Bautistapa cachancuna
Jesusman tapog aywayangan
(Mateo 11.2-6)**

¹⁸Jesus rurangancunatam Juan Bautista carcelchö caycagman aywar Juanpa discipuluncuna willayargan. Tsaynö willaycäyaptinpis carcelchö caycarnin Juanga yarpachacurganmi salvador shamogpäga. Tsaymi Jesusman cachargan ishcay cag discipuluncunata caynö tapuyämunanpä: ¹⁹“¿Gamcush canqui Tayta Dios cachamungan salvacog, o juctaräcush shuyacuyäshä?” niyämuy” nir.

^{20,21}Juanpa ishcan cachancuna Jesus cagman chäyänanpäga Jesus alliyätsirgan atscag tucuyläya geshyagcunatam, supay geshyatsingancunatam, y gapracunatam. Tsaymi Jesusta tapuyargan: “Tayta, gampita Juanmi musyayta munaycan. ¿Gamcush canqui Tayta Dios cachamungan salvacog, o juctaräcush shuyäyäshä?” nir.

²²Tsaynö tapuyaptinnam Jesus nirgan: “Canan aywar Juanta niyay cay ricayangayquicunata y wiayangayquicunata. ‘Gapracuna ricayannam. Mana puriyya puëdegcuna puriyyannam. *Leprawan geshyagcunapis alliyashgam. Upacunapis wiyayannam. Wanushgacunapis cawariyämushgam. Muchuychö cawagcunamanpis Diospa alli willacuyninga chaycannam’.

²³Tsaycunata willayaptiquim cushicunga nogapita. Nogaman imaypis yäracamungannölla yäracamutsun”.

**Juan Bautista Diospa
willacognin proféta cangan
(Mateo 11.7-15)**

²⁴Tsaypita Juanpa cachancuna cutisquiyaptinnam runacunata Jesus Juanpita parlapar nirgan: “Tsunyag

jircaman Juanta ricag aywar manam jachata vientu cuyutsegman ricapagtsu aywayargayqui. ²⁵Y manam alläpa chaniyog röpan jatishga canganta ricapäyänayquipätsu aywayargayqui. Tsaynö chaniyog röpashgacunaga reypa wayincunallachömi taycäyan, manam tsunyagcunachötsu. ²⁶Manam tsaycunata ricagtsu aywayargayqui, sinöga Tayta Diospa willacognin proféta canganta ricayänayquipämi. ²⁷Juanpä cagtaga Tayta Diospa palabran gellgaranganchöpis nicanmi:

**‘Salvacog manarä willacuptinmi
juctarä cachashä willacuynitä
willacunapä.**

**Pay willacunganta chasquicurmí
runacuna jutsa ruraynincunata
jagirir salvacogta shuyacur
alistacuyanga’ nir.**

²⁸Tsay ningannölla Tayta Dios Juanta willacognin cananpä churashga captinmi puntataga Juanrä tantiyashga noga salvacog rey cangäta. Tsaynö captinpis discipulücumnam nogawan purishga carnin Juanpitaga maslla willacuynitä tantiyacucäyan”.

²⁹“Juan ninganta chasquicurmí hasta mas jutsasapa cagcunapis tantiyayargan Diospa willacuynin rasun caglla canganta. Tsaynöpam jinan öra Juan paycunata bautizargan. ³⁰Peru fariseucunawan ley yachatsicogcunaga bautizacuyargantsu, jutsa ruraynincunapita perdonanapä Tayta Diosta mana mañacurmí”.

**Juan Bautistapä y Jesuspä
runacuna imanö yarpäyangan
(Mateo 11.16-19)**

^{31,32}Tsaynö nisquir Jesus mastapis nirganmi: “Canan tiempu runacunaga yupay tucog wamracunanomö caycäyan.

Manam chasquicuyantsu noga ningäcunata ni Juan Bautista ningancunata. Wamracuna pucllar pinculluta tucapaptin yanascuna tushuya mana munagnömi noga ningäcunatapis mana chasquicuyta munayantsu. Tsaynö ‘Aya pampayta pucllar nogacuna cantayämushä, gamcuna wagayämunqui’ nyaptin yanascuna wagaya mana munayangannömi Juan Bautista ningancunatapis mana chasquicuyta munayantsu.³³ Juan Bautistaga imaypis ayunarmi mana vïnuta upogtsu. Tsaynö captinmi gamcuna niyarguyqui: ‘Payga Satanaspa munayninchö carmi tsaynö cacun’ nirnin.³⁴ Noga runacunawan gorifar imaycatapis micuptí y vïnuta upuptinam niyämanqui: ‘Micullar upullar puricun’ nirnin. Tsaynöllam ‘Payga jutsasapa runacunawanpis y *impuestu cobrag sacyapacocguncunawanpis juntacanmi’ niyämanqui.³⁵ Tsaynö nir mana chasquiyämaptiquipis Juantawan nogataga Tayta Diosmi cachayämashga willacuyinta willacuyänäpä. Tsaynö cachayämanganta runacuna tantiyacuyanga Tayta Dios munanganta ruraycäyangäta ricarmi”.

**Perdonashga cagcuna
Tayta Diosta mas cuyangan**

³⁶Tsaypitam Simeon jutiyog juc fariseo runa Jesusta pushargan wayinchö micuyänäpä. Wayinman chascatsirnam jamaratsirgan.
³⁷Tsayman Jesus aywanganta musyaycurmi juc puricog mañösa warmi chargan shumag frascuchö perjümin apacurcur. ³⁸Jesuspa ñöpanman gonguriycur jutsanta

wagacuriptinmi Jesuspa chaquinman wegin juturgan. Tsay wegin jutungantanam agtsanwan pitsapargan. Nircurnam Jesuspa chaquinta mutsaycur wiñapargan apangan perjümita.

³⁹Tsayta ricaycurmi tsay invitag fariseo runa caynö yarpargan: “Rasunpa Diospa willacognin proféta carga cay runa musyanmanmi cay warmi imanö cangantapis. Mañösa warmi caycaptina manam consentimantsu yataycunantapis”.

⁴⁰Tsaynö yarpanganta tantiyapasquirnam Jesus nirgan runata: “Simon, jucta willashayqui”.

Niptinnam tsay fariseo nirgan: “Mä willaycamay, taytay” nir.

⁴¹Niptinnam Jesus nirgan: “Ishcay runacunam juc rícu runapa jagan cayänä. Jucnin jagan canä ishcay wata arupacur gänangannö. Jucagna canä ishcay quilla arur gänangannö.”⁴

⁴²Tsayna runacuna jagan cayanganta pägyata mana puëdiyaptin ishcancunatapis cuyapar manana cobranänatsu. Canan mä nimay: ¿Maygan cagtä tsay gelléyog runata mas agradesicurgan?” nir.

⁴³Tsaynam Simon nirgan: “Mas lasag jaga cagchir, taytay”.

Niptinnam Jesus nirgan: “Allim yarpayinqui” nir.

⁴⁴Nircurnam tsay warmita ricärirna Simonta nirgan: “Cay warmi imanir tsaynö ruraycämangantapis manam gam tantiyanquirätsu. Üsuntsic caycaptinpis wayiquiman yaycaramupti gamga manam yacuta garamarguyquitsu chaquüita awirinäpä. Cay warmim itsanga chaquüman wegin jutungantapis agtsanwan

n 7.41 Tsay jutsasapa warmiwan Jesus iwalatsirgan atsca jaga tucushga runaman. Tsay fariseo runatanam iwalatsirgan wallcalla jaga tucushga cag runaman.

pitsapämashga. ⁴⁵Yaycamupti manam mutsacuyniquiwan saludamarguyquitsu. Paymi itsanga yaycastcamupti jinan öra chaquita mutsacushga. ⁴⁶Umämanpis manam acëtita wiñapämarguyquitsu. Paymi itsanga chaquiñan perjümita wiñapämashga. ⁴⁷Cay warmega jutsasapa carmi perdonta taringanta pasaypa cushicurnin agradesicur tsaycunata rurashga. Waquinuncunam itsanga ‘Noga manam allápaga jutsayogtsu cä perdonta ashinápäga’ nínni ni ichicllapis Tayta Dios agradesicuyantsu”.

⁴⁸Nircurnam tsay warmita nirgan: “Cananga llapan jutsayquicunapita perdonashganam canqui” nir.

⁴⁹Tsaynam mësachö jamaycag runacuna quiquin pura caynö ninacuyargan: “¿Pinatä payga jutsancunapita runacunata perdonanapäga?” nir.

⁵⁰Tsaynö niyaptinnam Jesus nirgan tsay warmita: “Nogaman yäracamungayquipitam Tayta Diospa castigunpita salvacurguyqui. Cananga cushishgana aywacuy” nir.

Jesusta yanapag warmicuna

8 ¹Tsaypitaga Jesus purirgan marcan marcan Tayta Diospa alli willacuyninta willacurmi chunca ishcay (12) *apostolnincunawan. ²Paywanmi aywayargan Satanaspá munayninpita jipingan warmicuna y geshyancunapita allitsangan warmicuna. Paycunawanmi aywargan Maria Magdalenapis. Tsay warmipitam Jesus gargurgan ganchis (7) supaycunata. ³Tsaynopis aywarganmi Herodespa yanapagnin Cuzapa warmin Juana, Susana, y waquin warmicuna. Paycunam Jesusta y discipuluncunata yanapayargan capuyanganpita imaycancunallawanpis.

Diospa willacuyninta
murucuywan iwalatsingan
(Mateo 13.1-9; Marcos 4.1-9)

⁴Maytsay marcacunapitapis atscanam runacuna goriciayargan Jesuswan puriyänänpä. Tsaychömi caynö nir parlapargan: ⁵“Juc runam trigu murucog yargunä chacraman. Tsaynam matsiptinna waquin cag tiyanä nänimán. Runacuna nänipa purirnam tiuyashgataga jaruscäriyänä y pishgucunapis chaycur upshascärinä. ⁶Waqin murucunanan tiyanä shagan ricogllaman. Tsaychöna ras jegarcamur shumagllaga allpa mana captin tsaquiscäriyänä. ⁷Waqin murucunanan tiyanä cashacuna rurinman. Tsaychöpis jegarcamur garwashtaycällarmi tsaquiscärinä. ⁸Y waquin cag murucunanan chänä alli allpaman. Tsaychöga shumag jegascäramur wiñar pogunä cada espigachö juc pachac (100) gränuyag”.

Tsaynö parlapärirnam Jesus runacunata caynö nirgan: “Cay ningäcunata wiyyag cagga tantiyacuyay” nir.

Imaycaman iwalatsiypa imanir
Jesus yachatsicungan
(Mateo 13.10-17; Marcos 4.10-12)

⁹Tsaynam discipuluncuna Jesusta tapuyargan: “Taytay, tsay yachatsicungayqui cimanicantä?” nir.

¹⁰Tsaynö tapuyaptinnam Jesus nirgan: “Gmcunataga cäsucog cayaptiqui tantiyatsiyäshayquim parlapaycangäcunata. Mana cäsumag cagcunam itsanga ni imanöpa parlapaptipis mana tantiyayangatsu. Tsaynö runacunapäga Diospa palabbranchöpis nicanmi:

‘Noga rurangäcunata ricaycarpis manam criiyantsu.

Y willacungäcunata wiayacarpis
manam cäsuyantsu” nir.

**Murucuypä willapanganta
tantiyatsingan**

(Mateo 13.18-23; Marcos 4.13-20)

11“Cananmi tantiyatsiyäshayqui murucog runaman iwalatsir yachatsingäcunata. Trígú muroga Diospa alli willacuyninmanmi iwalan. 12Muru tiuyangan nänega chucru shongu runacunamanmi iwalan. Tsaynö shongu carmi waquin runacunaga Diospa willacuyninta wiayarpis chasquicuyantsu. Juc ishcay wiayangallantapis Satanás gongaratsiptinmi salvacionta tariyanganaatsu”.

13“Muru tiuyangan shaga allpanam waquin runacunaman iwalan. Paycunaga Diospa alli willacuyninta wiyar cushishgam chasquicuriyan. Tsaynö cushishga chasquicurpis shagachö allpa mana captin trígú jegarcamur tsaquireg cuentam, cryicunganpita imayca ñacaycunaman char Diospa willacuyninta jagiriyan”.

14“Muru tiuyangan casha rurinpis waquin runacunaman iwalan. Paycunaga Diospa willacuyninta wiayarpis masga yarpachacuyan imaycayogpis cayllapä y quiquinca munayangannö cawayänanpä cagllatam. Casha rurinchö trígú jegarcamurpis illacäregnömi yarpaynincunapita Diospa willacuyninpis gongacärin”.

15“Muru changan alli allpaga waquin runacunamanmi iwalan. Paycunaga Diospa willacuyninta llapan shonguncunawan chasquicurnin mana dejaypam alli rurachöna cawayan. Alli allpachö murucuy pasaypa wayungannömi Tayta Dios munangannö cawayan”.

**Jesus willacuyninta actsiman
iwalatsingan**
(Marcos 4.21-25)

16Tsaypita discipuluncunata tantiyatsir mastapis Jesus nirganmi: “Manam pipis actsitsa tsaritsir churantsu cajon rurincunaman ni catri jawancunaman. Musyayangayquinöpis actsitaga churayan alériconamanmi shumag atsicyänanpä.

17Tsay actsi alérichö car shumag atsicyagnö, gamcuna Tayta Diospa willacuyninta runacunata shumag willapäcuyaptiquim tantiyacuyanga alli cawaychö cawayänanpä”.

18“Willapangäcunata wiyar chasquicurninga yachatsingäcunata masmi tantiyacuyanqui. Tsaynö wiyacur cäscucogcunataga Tayta Dios masmi yanapanga shumag tantiyacuyänanpä. Yachag tucur mana cäscucog cagcunam itsanga wiayarpis manam tantiyayangatsu”.

Jesusta castan gayayangan
(Mateo 12.46-50; Marcos 3.31-35)

19Tsay wayichö Jesus yachatsicuycaptinmi mamanwan waugincuna chäyargan parlayta munarnin. Atsca runacuna goricasgħa cayaptinmi Jesus caycangan cagmanga yaycuya puëdiyargantsu. 20Tsaychö paycunata ricarnam juc runa Jesusta willargan: “Mamayquíwan waugiquicunam puncuchö shuyaracyäshunqui” nir.

21Tsaynö willaptinnam Jesus nirgan: “Diospa willacuyninta wiyacur cäsumag cagcunam cayan nogapa mamänö y waugicunanöga” nir.

**Pasaypa vientuwan gocha
lagchicachagta Jesus päratsingan**
(Mateo 8.23-27; Marcos 4.35-41)

22Juc cutinam discipuluncunata Jesus nirgan: “Acu päsashun gochapa

wac-tsímpaman” nir. Nisquirnam bùquiiman yarcurcur aywacuyargan.
²³Gochata aywaraycäyaptinnam Jesusga gepamanpachö punucasquirgan. Tsayyagnam pasaypa vientuwan yacu lagchicachar gallaycurgan bùquitapis jundicätsiytana munarnin. ²⁴Tsaynam discípuluncuna Jesusta ricchatsir niyargan: “iTayta Jesus, jundicaycantsicnächä!” nir.

Tsaynam Jesus sharcurcur vientutapis yacutapis pàracunänpä nirgan. Y jinan öram tsaynö niycuptin vientupis yacupis pàrasquirgan. ²⁵Nircurnam discípuluncunata nirgan: “¿Imanirtä nogaman mana yàracaycayämánquirätsu?” nir.

Tsayga discípuluncuna quiquincura puram pasaypa mantsacashga parlapänacuyargan: “Cay runaga cima runanarä cacunpis tsayläya vientupis yacupis pay ninganta cäsuycunänpä?” nirnin.

Runapita supaycunata

Jesus gurgungan

(Mateo 8.28-34; Marcos 5.1-20)

²⁶Tsaynö aywaraycarnam chäyargan Geresa marcapa washaläninman. Tsayga cargin Galilea provinciapa wac-tsímpanchömi. ²⁷Tsaychö Jesus bùquipita yarpuriptinnam supay lòcuyätsingan juc runa shamurgan. Tsay runaga lòcuyangan junagpitapis gallapächullam puricog. Panteonllachömi täcogpis. ^{28,29}Tsay runata imayca munangantam supay ruratsirgan. Maquinta chaquinta cadinawan pancayaptinpis cadinatapis rachisquirmi tsunyag jircacunapa aywacog.

Tsaynam tsay runata ricaycur Jesus nirgan: “iGam supay, cay runapita yarguy!” nir.

Niptinnam ñöpanman gonguricuycur gayarargan: “Poderösu Tayta Diospa tsurin Jesus, cimatä munanqui nogacunawan? iCay runapita gargamarni ama condenaycamaytsu!” nir.

³⁰Tsaynam Jesus tapurgan: “¿Imatä jutiqui?” nir.

Niptinnam supay nirgan: “Nogapa jutëga Legionmi”. ^o Tsaynö nirgan pasaypa atsca supaycuna payman yaycushga captinmi.

³¹Tsaynö nisquirmi Jesusta rugacurgan: “Ama nogacunata infiernumanga garpaycayämätsu” nirnin. ³²Tsaynam janaganchö atsca cuchicuna caycagta ricärir rugacuyargan cuchicunaman yaycucuycuyänänpä. Jesusnam nirgan aywar yaycucuycuyänänpä tsay rugacuyanganman. ³³Tsaymi supaycuna runapita yargurir yaycucuycuyargan tsay cuchicunaman. Tsaynam cuchicuna junish tunapita acataycachaycar jegarpäriyargan gochaman. Tsaychömi cuchicuna shengacar wanuyargan.

³⁴Cuchi mitsegcunanan tsayta ricaycur geshipir aywacuyargan marcapa ricayangancunata willacuyänänpä.

³⁵Tsay willacuyaptinnam runacunaga marcapita shayämurgan: “Mä imash pásaycushga” nirnin. Jesus caycanganman chaycurnam ricayargan supay lòcuyätsingan runa trocapácushga shumag fisyunchöna Jesuspa ñöpanchö jamaraycagta. Tsayta ricaycur runacunaga pasaypam mantsariyargan.

³⁶Marcapita chag runacunata willayargan supayyog runata Jesus allitsingantam. ³⁷Tsaynam pasaypa mantsariywan tsay Geresa runacuna Jesusta sugar niyargan marcanpita jucläpa aywacunänpä.

o 8.30 Legion ninanga “atsca waranga o miles” ninanmi.

³⁸Tsaynam Jesus büquiman yarcuraycaptinna alliyag runa rugar nirgan: “Tayta, gamwan aywacuytam noga munä. Pushacallämäy” nirnin.

Tsaynö niptinnam Jesus nirgan:
³⁹“Nogawan aywacunayquipa rantinga wayiquipa cutir marca mayiquicunata willay gamta Tayta Dios allitsishungayquita” nir.

Tsaynam runa marcanman cutiycur willacurgan Jesus cuyapar milagruta turanganta.

Jairupa tsurinta Jesus
cawaritsingan y yawar apaywan
geshyag warmita allitsingan
(Mateo 9.18-26; Marcos 5.21-43)

⁴⁰Gerasapita Jesus Capernaum marcaman cutiptinnam pasaypa atsca runacuna quichquishga goriracyäyargan Jesusta shuyacur. ^{41,42}Tsaymanmi Israel runacunapa autoridänin Jairo jutiyog runa chäirigan. Payga cargan Tayta Diosman mañacur goricäyangancunachö mandacogmi. Paypa chunca ishcay (12) watayog jucllaylla warmi tsurinmi wanucarganna. Tsaymi Jesuspa fiöpanman gonguricucur rugacurgan wamranman allitseg aywacunapä. Jesus Jairupa wayinman aywaptinnam atsca runacuna gepanta aywayargan.

⁴³Tsay runacunachömi juc warmi aywargan chunca ishcay (12) watana yawar apaywan geshyagyashga. Tsay warmega atscag jampicogcunachö jampicurninpis manam alligantsu.

⁴⁴Tsay warmega runacunapa rurinllapa yaycuycurmi Jesuspa röpanpa cuchunta yataycurgan. Tsaynö yataycuption jinan öram yawar apaynin pärásquirgan.

⁴⁵Tsay warmi allinganta tantiyasquirnam Jesus runacunata tapurgan: “¿Pitä yataycamashga?” nir.

Tsaynam tsaychö llapanpis “Manam nogallätsu, manam nogallätsu”

niyargan. Tsaynö niyaptinnam Pedro nirgan: “Tayta Jesus, cayläya quichqui aywaycashgaga jucnин jucninpis yatayshungayquita čimanöparä musyashwan?” nir.

⁴⁶Tsaynö niptinpis Jesus yapaymi nirgan: “Musyämi mayganpis yataycamar poderniwan allisquinganta” nir.

⁴⁷Tsaynam warmi imanö caytapis mana puëdirna tsuctsucyarrä Jesuspa ñöpanman gonguricucurgan. Nircurnam willargan imanir yataycunganta y jinan örä allisquinganta. ⁴⁸Tsaynam Jesus nirgan: “Hija, nogaman yäracamurmi tsay geshyayquipita allirguyqui. Cananga cushishgana cuticuy” nir.

⁴⁹Jesus tsaynö parlapaycaptinmi Jairupa wayinpita juc willacognin runa chaycur Jairuta nirgan: “Tayta Jairo, tsriquega wanushganam. Imapänatä Jesustapis wayiquiman pushanqui?” nir.

⁵⁰Tsayta wiaycurnam Jesus Jairuta nirgan: “Ama llaquicuytsu. Nogallaman yäracamuptiquega tsuriqui cawarimungam” nir.

⁵¹⁻⁵³Tsaynam Jairupa wayinman chaycur wanushga wamrapä wagaycäyaga ricaycur Jesus nirgan: “Ama wagayaytsu. Cay wamra wanushga caycarpis, punucagnöllam riccharcamunga” nir.

Tsaynö niptin Jesustaga runacuna asipäyarganmi. Tsaynam wamra wanushga caycanganman Jesus yaycatsirgan Pedruta, Juanta, Santiaguta, y Jairutapis warmintinninta. Waquincuna aywayänantaga manam munargantsu. ⁵⁴Nircurnam Jesus wamrata maquinpta tsarircur caynö nirgan: “Wamra, sharcamuy” nirnin.

⁵⁵Tsaynö niptin wamra jinan öram cawarircamur sharcurgan. Tsaynam Jesus nirgan tsay wamrata pachan garayänanpä.

⁵⁶Wamran cawarimunganta ricaycur papänincuna pasaypa espantacurmí cushicuyargan. Tsaypitanam Jesus nirgan: “Cay wamrata cawatsimungäta pitapis willacucyäyanquimantä” nir.

Chunca ishcay (12)

discipuluncunata Jesus cachangan
(*Mateo 10.5-15; Marcos 6.7-13*)

9 ¹Tsaypitanam chunca ishcay apostolinincunata gayaycur poderninta Jesus gorgan runacunapita supaycunata garguyänanpä y tucuyläya geshyawan geshyacogcunata allitsiyänanpä. ²Nircurnam paycunata cachargan Diospa alli willacuyninta willacuynanpä y geshyacogcunata allitsiyänanpä caynö nirnin: ³“Maypa aywarpis ama apayanquitsu tucruyquicunata, alporjayquicunata, millcapayquicunata, ni gelléniquicunata. Janayquicunachö röpayquicunallawan aywacuyanqui. ⁴Maychöpis pipis wayinman patsatsiyäshuptiqui tsayllachö cacuyanqui tsay marcapita aywacuyangayquiag. ⁵May marcamanpis chäyaptiqui sicush runacuna mana chasquiyäshunquitsu, tsaypita aywacuyanqui chaquiquicunachö polvuta tapsicusquir. Tsaynöga rurayanqui mana chasquiyäshungayquipita Tayta Dios paycunata castigananpä cagta musyatsirmi”.

⁶Tsaynö cachaptin discipuluncuna marcan marcanmi puriyargan Diospa willacuyninta willacurnin. Tsaynömi atscag geshyagcunatapis allitsiyargan.

Rey Herodes yarpachacungan
(*Mateo 14.1-12; Marcos 6.14-29*)

⁷Jesus tsaynö discipuluncunawan milagrucuna rurayanganta Galilea provinciapa mandagnin Herodes pasaypam yarpachacurgan. Tsaynam

runacuna parlar niyargan: “Juan Bautistam cawarimushga” nir.

⁸Waquinuncunam niyargan proféta Elias canganta. Y waquinuncunam niyargan unay willacognin maygan profétapis cawamunganta. ⁹Juan cawarimunganta runacuna niyaptinmi Herodes yarpachacur nirgan: “Paypataga quiyüchä umantapis rogutsirga ćpirä canman tsay runa? Tsay runata imanöparä nogapis regiyicumán” nir.

5,000 runacuna micuyänanpä milagruta Jesus rurangan

(*Mateo 14.13-21; Marcos 6.30-44; Juan 6.1-14*)

¹⁰Tsaypita apostolcuna willacuyninta willacur puriyanganpita cutir Jesusta willapäyargan yachatsir puriyanganchö imanö cayanganta. Tsaynö willapäriyaptinnam paycunata pusharcurna Jesus aywargan Betsaida marcpa tsunyagnin quinranman. ¹¹Tsaypa aywayanganta musyaycur atscag runacuna gepanta aywayaptin tsaychöpis Jesusga Diospa willacuyninta willacurganmi y geshyagcunatapis allitsirganmi.

¹²Patsa tardiyaptinnam discipuluncuna Jesusta niyargan: “Taytay, cay tsunyaghöga manam imapis cantsu cay runacuna micuyänanpä ni patsacuyänanpä. Paycunata niycuy aywacur imallatapis rantir micuyänanpä” nir.

¹³Tsaynö niyaptinnam Jesus nirgan: “Gmcuna micuyänanpä garayay” nir.

Tsaynam paycuna niyargan: “iImäcunatarächi tincuyrätsiyäman! Caychö capayäman pitsga tantawan ishcay pescädullachä. Micuy ranteg mana aywar imarga ćimatarä caytsica runacunata garaycuyämanpis?” nir.

¹⁴Tsaychö runacunaga cayargan pitsga waranganömi (5,000) ollgucuna,

warmipis wamrapis mana yupashga. Tsaynam discípuluncunata Jesus nirgan: “Jamatsiyay llapan runacunata pitsga chuncacama (50)”.

¹⁵Ningannömi discípuluncuna llapanta jamatsiyargan. ¹⁶Tsaynam Jesus tsay pitsga tantata y ishcay pescäduta tsarircur ciéluman ñuquircur Tayta Diosman mañacur agradesicurgan. Nircurnam tsay tantata y pescäduta paquirir discípuluncunata macyargan runacunata aypuyänanpä. ¹⁷Tsaychö runacuna pachajuntam micuyargan. Manana munar sobrapacuyangantanam tantatawan pescäduta discípuluncuna goriyargan chunca ishcay (12) canastacunaman.

Tayta Dios cachamungan salvacog canganta Jesuspä Pedro ningan
(Mateo 16.13-19; Marcos 8.27-29)

¹⁸Tsaypita juc junagnam Jesus discípuluncunawan caycar Tayta Diosman quiquillan mañacurgan. Mañacuya ushasquircunam paycunata tapurgan: “Noga pi cangätä runacuna yarpäyan?”

¹⁹Tsaynam discípuluncuna niyargan: “Waquin runacunam niyan Juan Bautista cangayquita. Waquinuncunam niyan unay profëta Elias cangayquita. Y waquinuncunam niyan unay juc profëta wanunganpita cawamushga cangayquita” nir.

²⁰Tsaynö niyaptinnam paycunata Jesus tapurgan: “Y gamcunaga ñnoga pi cangätä yarpäyanqui?” nir.

Tsaynam Pedro nirgan: “Gamga Tayta Dios cachamungan salvacogmi canqui, taytay” nir.

Wanunanpä cagta Jesus willacungan

(Mateo 16.20-28; Marcos 8.30-9.1)

²¹Tsaynö Pedro niptinnam discípuluncunata Jesus nirgan: “Ama

pitapis willayayrätsu noga salvacog cangäta. ²²Tayta Dios cachamangan runa caycaptipis pasaypa ñacatsirmi maltratayämanga. Autoridäcuna, sacerdöticunapa mandagnincuna, y ley yachatsicogcuna conträ sharcurmí wanutsiyämanga. Peru wanutsiyämanganpita quimsa junagtaga cawamushämi”.

²³Nircur llapan gatiragnincunatapis caynömi nirgan: “Pipis discípulü cayta munarga quiquinpa munayllanta rurar ama cawatsuntsu. Imayca ñacaychö carpis nogaman yäracamur cawayätsun. Wanunganyagpis noga ningäcunata cäsumag cagcunaga rasunpam nogaman criyicäyämun. ²⁴Noga munangänö mana cawar pipis quiquinpa munayninta rurar cawacogcunaga infiernumanmi gaycucäyanga. Imayca ñacayta päsarpis noga munangänö cawagcunam itsanga gloriaman chäyanga. ²⁵Cay patsachö imaycayog cayanganpis ñimapärä pitapis välin Tayta Diosta mana cäsunganpita infiernuman garpucänan captingga? ²⁶Pipis nogapita y willacuñipita pengacuptinga tsay pengacamagcunata manam nogapis cäushätsu, Tayta Diospa *angelnincunawan chipipir ciélupita cutimungä junag. ²⁷Waquiniquicuna cawaycällarran ricayämanqui Tayta Dios cachamangan salvacog rey chipipirrä caycagta”.

Jircachö Jesus chipipegta quimsan discípuluncuna ricayangan
(Mateo 17.1-8; Marcos 9.2-8)

²⁸Tsaypita semänatanam Jesus juc jircanman witsargan Tayta Diosman mañacunänpä. Tsaypa witsarnam pushargan Pedruta, Juanta, y Santiaguta. ²⁹Tsaychö Jesus Tayta Diosman mañacuycaptinmi gagllan jucnöman ticasquirgan y röpanpis

pasaypa yullag pürumanmi ticasquirgan.³⁰ Tsaynö caycaptinnam unay profétaçuna Moiseswan Elias yuripasquirgan.³¹ Tsay pasaypa chipipiçagchömi parlayargan Jerusalenchö Tayta Dios munangannö Jesus wanunänpä cagtapis.

³²Tsaychö Pedroga ishcay discípulu mayincunawanmi punuy atipaptin ricchaycäyargan. Tsaymi ricayargan tsay profétaçunawan Jesus chipipirrä parlaycäyagta.³³ Tsaynam tsay runacuna illacasquiyänpanpä caycaptin Jesusta Pedro nirgan: “Taytay, ima allipämi cayman shacayämurgä. Cananga rurayämushä quimsa tsuclacunata, jucta gampä, jucta Moisespä, y juctana Eliaspä” nir. (Imanö niytapis mana puëdirmi Pedro tsaynöllana parlapargan.)

³⁴Tsaynö Pedro parlapaycaptinmi pucutay paycunata tsapasquirgan. Discípulucunam pasaypa mantsariyargan.³⁵ Tsaynam pucutay rurinpita Tayta Dios caynö nimurgan: “Paymi cuyay tsuri. Pay niyäshungayquicunata cäsucuyay” nирнин.

³⁶Tayta Dios tsaynö niscamuptinga Jesus japallannam caycänä. Tsay ricayangancunata discípuluncuna manam pitapis willacuyarganrätsu.

**Wanuy geshyayog wamrata
Jesus allitsingan**
(Mateo 17.14-18; Marcos 9.14-27)

³⁷Waraynín jircapita uräyämuptinnam atscag runacuna Jesusta taripäyargan.³⁸ Tsaynam tsay runacunapita juc runa Jesusta rugar caynö nirgan: “Tayta, cay jucllaylla tsurilläta mana ajayllapa ricaycullay.³⁹ Supaymi illagpita gayarätsin. Pampaman ishquitsin. Poshgatyapis agtutsin. Mana dejaypam pasaypa tsuctsucyätsin.⁴⁰ Tsaynö

captinmi gamta mana tarir discípuluyquicunatapis rugacurgö tsurüpita supayta garguycuyänpanpä. Peru paycunaga manam puëdiyahgatsu” nir.

⁴¹Tsaynö niptinnam Jesus nirgan: “Yäracuyniynag jutsasapa runacuna, ènogallarätsurä tsaycunata ruraycäshä? iIlmayagrä gamcunawan caycäshä! Canan apayämuy tsay wamrata” nir.

⁴²Tsaynam Jesuspa ñöpanman wamrata apaycuyaptin supay tsuctsucyätsir patsaman ishquiriyatsirgan. Tsayta ricaycurmi supayta Jesus ollgutupargan wamrapita yargunänpä. Jinan öram wamra sänuna ticasquiptin Jesus papäninta entregargan.⁴³ Tsaynö Tayta Diospa poderninwan supayta gargunganta ricarmi runacuna espantacur cushicuyargan.

**Wanutsiyänpanpä cagta
Jesus yapay willacungan**
(Mateo 17.22,23; Marcos 9.30,31)

Tsaycunata rurangancunapita runacuna cushishga caycäyaptinpis discípuluncunata Jesus nirgan caynömi:
⁴⁴“Wiyämay shumag y yarparäyay. Noga Tayta Diospita shamogta runacuna entregayämanga chiquimagnicunapa maquinmanmi” nir.

⁴⁵Tsaynö Jesus parlapaptinpis discípuluncunaga manam tantiyayargantsu runacuna wanutsiyänpanpä cagta. Tsaynö mana tantiyarmi imapita tapurcuytaga mantsariyargan.

**Mayganpis mas alli
ricashga cayta munayangan**
(Mateo 18.1-5; Marcos 9.33-37)

⁴⁶Tsaypitánam Jesuspa discípuluncuna quiquin pura rimanacuyargan: “Maygantsicshi mä

llapantsicpa mandagnin cashun” nir.
47Tsaynö yarpaycäyanganta musyarirmi Jesus föpanman juc wamrata ichütsirgan. **48**Nircurnam nirgan: “Pipis cay wamratanö runa mayinta alli ricag cagmi nogata chasquiycämag cuenta caycayan. Nagana nogata chasquimarninga cachamagni Tayta Diostapis chasquiycayanmi. Juccunapita mas puédeg caypä mana yarpagcunaga mas alli discípulumi cayanqui”.

**Tayta Diosta cäsucur allita
ruragcunata mana michäyananpä
Jesus ningan
(Marcos 9.38-40)**

49Tsaynam discípulun Juan nirgan: “Taytay, nogacuna ricayargö supayyog runacunapita jutiquichö juc runa supaycunata gargogtam. Pay nogantsicwan mana puriptinmi michäyargö”.

50Tsaynö niptinnam Jesus nirgan: “Ama michäyanquitsu. Nogantsicwan mana purishga carpis Tayta Diospa willacuyinta cäsucurga allillatam ruraycan. Tsaynö carninga manam nogantsicpa contrantsictsu caycan”.

**Santiagutawan Juanta
Jesus ajäpangan**

51Jesus ciéluman cutinanpä ricognam tiempu chaycämurgan. Tsaynö caycaptinpis mana mantsacuypam Jesus aywargan Jerusalenman. **52**Tsay aywaycarnam cachacurgan *Samaria provinciachö juc marcaman, tsaychö patsacuyänanpä wayi asheg. **53**Tsay marcachö runacuna manam chasquiyyta munayargantsu, Jerusalenpa aywaycanganta musyar. **54**Tsaynö mana chasquiyyaptinnam Santiaguwan Juan niyargan: “Elias föpata rugacunganno Tayta Diosta rugacuriyämancu ciélupita

nina runtuta cachaycamuptin cay runacuna ushacasquiyänanpä?” nir.

55Tsaynam paycunata Jesus ajäpagan: [“Tayta Dios gamcunatapis cuyapaycäyäshuptiquega imanirtä juccunapäga tsaynö yarpäyanqui?”]

56Tsaynö nisquirmi juclä marcapa aywacuyargan.

**Gatirayta munag runacunata
Jesus tantiyatsingan
(Mateo 8.19-22)**

57Tsaynö aywaycäyaptinmi juc runa Jesusta nirgan: “Tayta, maypa aywaptiquipis gamtaga gatiräshayquim”.

58Tsaynö niptinmi Jesus nirgan: “Atogcunapaga machaynincuna canmi. Pishgucunapapis geshuncuna canmi. Peru noga Tayta Diospita shamogpaga manam ni juc wayillapis cantsu maychö punuycunalläpäpis” nir.

59Tsaynö nisquirmi juc runata Jesus nirgan: “Discípulü canayquipä nogawan aywacushun” nir.

Niptinnam tsay runa nirgan: “Tayta Jesus, papäni wanuptin pampaycurga gamta gatishayquim” nir.

60Tsaynam Jesus nirgan: “Papäni quita pampaytarä shuyacunayquipa rantinga juclla nogawan aywacushun Diospa alli willacuyinta willacunayquipä. Wanogcunataga quédagcunanachir pampacuyanga” nir.

61Tsaypita juc runapis caynömi nirgan: “Tayta Jesus, nogapis gamwan aywacuytam munä. Itsanga castäcunatarä willaycamushä aywacunantsicpä”.

62Niptinnam paytapis Jesus nirgan: “Pipis gepapa ticracushgaga manam yapyantsu. Tsaynö castayquipä y imaycayquicunapäpis yarparaycarga nogapa discípulü cayta manam puédinquitsu”.

Jesus 72 gatiragnincunata Diospa willacuyinta willacog cachangan

10 ¹Tsaypitam Jesus acrargan ganchis chunca ishcay (72) gatiragnincunata.^p Nircurnam ishcay ishcay cachagan pay aywananpä cag marcacunaman. ²Tsaynö cacharninmi Jesus caynö nirgan: “Maytsicag runacunam listuna caycäyan Diospa alli willacuyinta wiyacur chasquicuyänanpä. Imayca jatun chacraçhö wallcag runacunalla cosichaycagnömi willacogcunaga wallcagliarä cayan. Tsaymi Tayta Diosta rugacuyänayqui willacogcuna mas atsca cayänanpä. ³Cananga aywar willacuyay. Gmcunata cachaycä atsca atogcunaman üshacunata gaycapaycog cuentam, Diospa willacuyinta mana alli yaga runacunatapis willacuyänayquipä”.

⁴“Ama apayanquitsu gelléniquicunata, gepiquicunata, ni llangiquicunata. Piwanpis nänichö tincurga ama parlacur cacuyanquitsu”.

⁵Pipa wayinman charpis wayiyogta niyanqui: ‘Alli caway caycutsun cay wayichö’ nir. ⁶Tsay wayiyog chasquiyäshuptiquega niyangayquinömi alli caway canga tsay wayinchö. Mana chasquiyäshuptiquega manam paypäga alli caway cangatsu. ⁷Pipis chasquiyäshogniquicunapa wayillanchö posadaräcuyanqui. Ama wayin wayinräga puriyanquitsu mas allitarä munar. Arupacog runa arunganpita páguntas chasquinmi. Tsaynömi gmcunapis Tayta Diospa willacuyinta willacuyangayquipita ima

miñishtiyangayquitapis chasquiyanqui. Pipis imallatapis garayäshuptiqui micucurcuyanqui”.

⁸“May marcamanpis chäyaptiqui runacuna chasquicuyäshurniqui tsaychö imallatapis garayäshungallayquita micuyanqui. ⁹Tsay puriyangayqui marcacunachö geshyagcunata allitsiyanqui. Y runacunata niyanqui: ‘Tayta Diospa alli willacuyinta musyatsicuy tiempu chämushganam’ nir. ¹⁰May marcaman chäyaptiquipis runacuna mana chasquiyäshuptiquega cälliman yargusquir niyanqui: ¹¹Cay chaquicunachö polvuta tapsiyä mana alli yaga cayangayqui musyacänanpämi. Ima captinpis musyayay salvacog rey gamcunaman chämunganta’ nir.

¹²Tsaynö mana chasquiyäshungayquipitam tsay runacunata Tayta Dios castiganga unay tiempu Sodoma marcachö castiganganpitapis mas cuyapaypä^q cay patsa ushacangan junag”.

**Jutsancunata mana dejagcuna
infiernuman gaycucäyänanpä cagta
Jesus willangan
(Mateo 11.20-24)**

¹³“Corazin marca runacuna y Betsaida marca runacuna, igamcunataga Tayta Dios mana cuyapaypam castigayäshunqui! Gmcunachö milagrucunata rurangänö Tiro y Sidon marcacunachör milagrucunata ruraptëga maynam Tayta Diosta perdonta mañacur jutsa ruraynincunata dejariyanman cargan. Tsaynö jutsancunapita llaquicurnin maynam arripenticur cotenciapita röpata

p 10.1 Waquin unay gellgashgancunachö nin ganchis chunca (70) gatiragnincuna canganta.
q 10.12 Sodomachö tärag runacunata Tayta Dios castiganganata musyanayquipä liyinqui Genesis 19.1-29. **r 10.13** Tiro y Sidon marca runacuna imanö cayangantapis musyanayquipä liyinqui Isaias capítulo 23; Ezequiel capítulo 26-pita 28-yag; Amos 1.9,10.

jaticurcur uchpaman jamaycur wagayanman cargan. Gmcunaga milagrucunata rurangäta ricaycarpis manam jutsa rurayniquicunata dejayta munayanquitsu. ¹⁴Tsaynö jutsa rurayniquicunata mana dejayangayquipitam fisyu final junagchö Tiro y Sidon runacunapitapis masrä castigacäyanqui. ¹⁵Capernaum marca runacuna, égmcunaga ‘Tayta Diospa ñöpanmanmi chäshä’ niyanquipischi? Tayta Diospa ñöpanman chäyänayquipa rantin gmcunaga infiernullamannam gaycucäyanqui’.

¹⁶Tsaynö nisquirnam discipuluncunata nirgan: “Gmcuna willacuyñita willacuyaptiqui wiyyashurga nogatapis wiyyacäyämanmi. Y gmcunata mana chasquiyashogcunaga nogatapis manam chasquiyämantsu. Nogata mana chasquimag cagga cachamagni Tayta Diostapis manam chasquiyäantsu”.

Jesuspa discipuluncuna willacuyanganpita cutiyangan

¹⁷Tsaypita juc ishcay semänacuna päsariptinnam ganchis chunca ishcay (72) discipuluncuna willacuyanganpita cushishga cutiyargan Jesusman: “iRunacunapita supaycunata poderniquiwan targuyapti yargushgam, taytay!” nirnin.

¹⁸Tsaynam Jesus nirgan: “Au, musyämi supaycuna runacunapita yargungantaga. Ciélupita tillagucur ráyu ratamungannömi Satanaspera puëdeg caynin illagaycan. ¹⁹Nogam poderniña gmcunaman churargö llapan mana allicunata jarurir päsayänayquipa. Tsaynö Satanaspera puëdeg caymintapis mana cäsuypa cayaptinga imatapis mananam rurayäshunquinatsu.

²⁰Runacunapita supaycunata targur

cushicuyangayquipitaga masrä cushionay jutiquicuna Tayta Diospa librunchö gellgaraycanganta”.

Tayta Diosta Jesus alabangan (Mateo 11.25-27; 13.16,17)

²¹Tsaypitanam Jesus Espiritu Santupa munayninwan cushionay Tayta Diosta alabar caynö nirgan: “Papällä, ciéluhöpís cay patsachöpís imaycawan munayyogmi gamga caycanqui. Gamta alaballämi, Tayta Dios. Yachag tucogcunata tantiyatsinayquipa rantinga llänu runacunachömi tantiyatsicurguyqui nogata cachamangayquita. Tsaynö cananpä yarpangayquinöllam ruracashga, papällä” nir.

²²Nircurnam discipuluncunata nirgan: “Papällämi llapantapis munayníman churamushga, tsurin captü. Noga imanö cangätapis payllam musyaman. Tsaynöllam papällä imanö cangantapis nogalla musyä. Tsaymi tantiyatsingä cagcunalla musyayanqui Tayta Dios imanö cangantapis”.

²³Tsaypita discipuluncunallawan caycarnam paycunata nirgan: “Gmcunam imata rurangäcunata ricar y imata yachatsingäcunata wiyar tantiyacuyanqui noga imanö cangätapis.

²⁴Unay profétacunapis y mandacog reycunapis cay rurangäcunataga ricayta munayargannam. Ricamaya munarpis manam ricayämashgatsu. Tsaynömi noga willacungäcunata wiyyayta munarpis mana wiyyacuyashgatsu. Gmcunam siga ricaycäyämanqui y wiyyacäyämanqui”.

Runa mayinta Samaria runa cuyapangan

²⁵Tsaypita juc cutichönam juc ley yachatsicog runa Jesus yachag canganta o mana yachag cangantapis musyananpä

caynö tapurgan: “Taytay, ćimatatä runäman imaypis mana ushacag alli cawayman yaycunäpä?” nir.

²⁶Tsaynö niptin Jesusnam nirgan: “Mä, puntata gamtarä tapurishayqui. ćImatatä tantiyanqui Moises gellgangany leycunata liyir?”

²⁷Niptinnam tsay runa nirgan: “Mana ushacäcog alli cawayman runa yaycunapäga tsay leyuncunachöga caynömi nican: ‘Llapan shonguyquiwan Tayta Diosman yäracur cawanqui. Tsaynö llapan voluntäniquiwan, llapan callpayquiwan, y llapan yarpayniquiwan munanganta ruranqui. Y runa mayiquicunatapis llapan shonguyquiwan cuyanqui’ nir”.

²⁸Tsaynö niptinnam Jesus nirgan: “Tsaytaga allitam nirguyqui. Tsay ningayquicunata cumplirga gampis mana ushacag alli cawayman yaycunquim”.

²⁹Tsaynö niptinnam tsay ley yachatsicog runa Jesusta yapay tapurgan: “Tsayöraga gampä ćpicunatä runa mayëga, taytay?”

³⁰Tsaynam Jesus “Puntataga wiyamayrä” nir caynö nirgan: “Juc runam aywaycänä Jerusalen marcapita Jerico marcaman. Tsaynö aywaycaptin ladroncuna pasaypa magacacharcur jatirangan röpanta y imaycantapis gechusquir wanushgatanö jagirir jegariyänä”.

³¹“Tsay nänipam aywaycänä juc sacerdöti. Tsayna wanushgatanöna runa jitaraycagta ricaycarpis tsay sacerdötiga manapis ricag tucur päsacunä. ³²Tsaypita sacerdötipa juc yanapagninpis tsaynöta ricaycar mana ricag tucullar yagacurir päsacunä”.

³³“Juc *Samaria runana tsay nänipa aywaycar tsayman chänä. Israel runacuna Samaria runacunawan chiquinacuycarpis tsay Samaria runaga tsaynö yawarllana jitaraycagta ricaycur pasaypa cuyapasquinä. ³⁴Tsayna acëtiwan y viñuwan jampipaycur ratashcunawan

wataparcur ashnunman muntarcatsir apanä patsacungan wayiyag. Nircur tsaychö payga jampir ichic jucläyanganyag täparänä. ³⁵Tsaypita warayninna tsay cuyapäcog runa bulsicumpita gelleä jipisquir päganä tsay wayiyogta ishcay junag arupacur gänangantanö: ‘Cay geshyagta ricapaycällanqui cutimungäyag, taytay. Imachöpis mastastacuptiquega cutimurmi pägalläshayqui’ nir.

³⁶Jesus tsaynö willapayta ushasquirnam tsay ley yachatsicog runata tapurgan caynö nir: “Tsay quimsan runacunapita ćmaygan cagtä wanuycagna runa mayinta cuyapargan?”

³⁷Tsaynö niptinnam tsay runa nirgan: “Samaria runam, taytay” nir.

Tsaynam Jesus nirgan: “Canan gampis tsay cuyapäcog runanölla runa mayiquita cuyapanqui”.

Martapa y Mariapa wayinchö Jesus yachatsingan

³⁸Tsaypita aywacurnam Jesus discipuluncunawan chäyargan juc tacshalla marcaman. Tsaychö Martapa wayinman Jesus chaycuptinnam pay patsatsirgan. ³⁹Martapa ñañan Marianam Jesupsa ñöpanman jamacuycurgan, Tayta Diospä parlapangancunata wiyatay munar. ⁴⁰Martam itsanga tsay wayinchö imayca ruraynincunata ruracuycargan. Tsaymi imayca ruraynincuna captin Jesusta nirgan: “Señor Jesus, ćimanirtä ñañä tsaychö jamaräcun noga caychö imayca ruraycunawan ñacaycapti? Niycullay yanapämänanpä” nir.

⁴¹Tsaynam Jesus nirgan: “Marta, ćimanirtä tsaynö nimanqui? Gamga alläpa yarpachacunqui imapis rurayniquicunallapämi. ⁴²Tsay quiquipa rurayniquillapä yarpachacunayquipa rantinga Tayta Dios ningancunata yachacunayquipä cagtam yarpachacunayqui. Mariaga

yachatsingäcunatam wiyacämán.
Tsaynö yachacungantaga manam pipis
gechunganatsu”.

Tayta Diosman mañacunantsicpä
Jesus yachatsicungan
(Mateo 6.9-15; 7.7-11)

11 ¹Tsaypita juc cutichönam Jesus
mañacuycargan Tayta Diosman.
Mañacuya ushasquiptinnam juc
discipulun Jesusta nirgan:
“Discipuluncunata Juan Bautista
yachatsinganno nogacunatapis
yachaycatsiyämay Tayta Diosman
mañacuyänäpä, taytay” nir.

²Tsaynam Jesus nirgan: “Caynömi
Tayta Diosman mañacuyänayqui:

‘Ciëluchö caycag Tayta Dioslläcuna,
llapan runacuna gamta
adorayälläshuy.
Munangayquinö llapan runacunapis
gamllaman yäracamur
cawaycuyätsun.

[Ciëluchö munangayquinölla cay
patsachöpis camacaycullätsun.]

³ Cada junagpä micuylläcuna ama
faltaycatsillaytsu ari.

⁴ Runa mayí mana alli ricamaptinpis
noga perdonangänölla
jutsäcunapita
perdonaycayämay.

Jutsaman Satanás ishquitsiyämaya
munaptinpis tsapaycayällämay,
[y yanapaycayällämay llutancunata
imaypis mana rurayänäpä.
Tsaynö caycullätsun]”.

⁵Nircur Tayta Diosman imaypis
mañacuypä Jesus caynömi willapargan:
“Juc runash pullan pagas aywanä
amigunpa wayinman: ‘Vicinu, quimsa
tantayquita mañacushayqui. ⁶Juc
amigümi wayiman posadacamushga.
Imalläpis manam caycapamantsu

garaycunäpä’ nir. ⁷Tsaynö
mañacuptinshi vicinunga ninä:
‘Imanirtä cay örärä shamunqui tsayta
mañacamag? Puncüpís trancashganam y
wamräcupnis punucuycäyannam. Cay
öraga manam gamta atiendiyta
puëdinatsu’ nir”.

⁸Tsaynö nisquirnam Jesus caynö
nirgan: “Sharcamuya mana
munaycarpis yaparir yaparir
gayacuptinga vicinun garangam
miñishtinganta. Manam amigun
canganpitatsu garanga, sinöga pasaypa
gayacuptin manana atiparmi. [Yaga
runacunapis tsaynö yanapacog
caycapterna Tayta Diosga masrämi
yanapayäshunqui.] ^{9,10}Tsaymi Tayta
Diosmanga imaypis mañacuyänayqui.
Imata miñishtirpis rugacuyay.
Puncupita gayacognörä mañacuyay.
Tayta Diosman mañacogcunaga
chasquianmi. Imata miñishtirpis
rugacogcunaga tariyanmi.
Gayacogcunata Tayta Dios wiyanmi”.

¹¹“Gmcunata maygayquitapis
wamrayquicuna [tantata
mañacuyäshuptiqui ɿrumitatsurä
aptaparcuyanquiman?] Pescäduta
mañacuyäshuptiquipis ɿulebratatsurä
aptaparcuyanquiman? ¹²Tsaynöpis
runtuta mañacuyäshuptiqui ɿatapoguy
curutatsurä aptaparcuyanquiman?
¹³Gmcunaga mayläya yaga carpis
wamrayquicunataga alli cagllatam
garayanqui. Tsaynö gmcunaga
caycäyaptiquega ciëluchö caycag Tayta
Diosga masrämi alli cagllata
garayäshunqui. Tsay alli cagga Espiritu
Santum”.

Satanaspa munayninchö Jesus
caycanganta runacuna niyangan
(Mateo 12.22-30; Marcos 3.20-27)

¹⁴Juc cutinam upayashga runapita
supayta Jesus gargurgan. Supay

yargusquiptinnam tsay runa parlayta gallaycurgan. Tsaynö allitsegtä ricaycur runacuna espantacur cushicuyargan.

¹⁵Tsaynö caycaptinpis waquin runacunaga niyargan: “Manam Tayta Diospa poderninwantsu supayta gargsugha, sinöga supaycunapa mandagnin Satanaspa poderninwanmi” nir. ¹⁶Waquinam Jesusta tapog tucur niyargan: “Tayta Diospa poderninwan supayta gargsungayquita musayänäpä mastapis milagrutaga ruraramuy ari” nir.

¹⁷Tsaynö parlaycäyanganta musyarnam Jesus nirgan: “Manam yarpaycäyangayquinötsu. Cay ningäta wiycayämäy. Juc nacionchö runacuna quiquincura pura chiquinacurga wanutsinacumi ushacätsinacuyanman. Tsaynömi juc marcachö o juc wayichö tagcunapis quiquincura pura chiquinacurga wacpa caypa gargsungacuycar ushacäyanman. ¹⁸Tsaynö caycaptina gamcuna ama yarpäyaytsu Satanaspa poderninwan supaycunata gargsungäta. Supaycunata mandagnin Satanas gargsungtinga poderniyagna tictarmi ushacätsinacuyanman”.

¹⁹“Gmcunachö waquin runacuna supaycunata runacunapita gargsugaptin yarpäyanqui Tayta Diospa poderninwan gargsungantam. Tsaynö yarpaycarga cimanirtä nogapäga yarpäyanqui Satanaspa poderninwan supaycunata gargsungäta? Tsay llutan yarpayniquicunawanmi manacagcunata parlayanqui. ²⁰Nogata Espiritu Santo yanapamaptin supaycunata gargsungäta ricarmi gamcuna musyayanqui Tayta Diospita salvacog rey shamungäta”.

²¹Satanaspita mas puëdeg canganta tantiyatsirmi Jesus mastapis nirgan: “Juc lisu runa wayinta täpaycaptina manam pipis imantapis suwapanmantsu. ²²Tsaynö täpaycaptinpis paypita mas puëdeg runa chaycurmi itsanga tucrunta gechurir

imantapis apacunman. [Tsay cuentanömi nogapis puëdeg cayniwan Satanaspa maquinpitä runacunata jipiycä]”.

²³Nircurmi caynöpis Jesus nirgan: “Pipis ningäcunata mana cäsumag cagcunanan Satanaspa munayminchö cayan. Y nogata cäsumag cagga noga munangätam ruracyän”.

**Maypitapis yargunganman
supay cuttingan
(Mateo 12.43-45)**

²⁴“Juc runapita supay yargucur jäcogcunapam aywan tänanpä ashirnin. Maychöpis mana tarirnam yarpasquin tärangan runaman yapay cutiyucuta.

²⁵Tsaynö cutirnam taririn tsay runapa shongunta shumag churapacushga pitsapacushga wayitanörä. ²⁶Tsaynöta tariycurnam tsay runaman cutin paypita mas mana allin cag ganchis (7) supaycunata pushacurcurna tsay runachö cangan täcuyänänpä. Tsaymi puntata canganpitapis mas peyormanna ticraturin”.

**Tayta Diosta cäsucogcuna
cushicungan**

²⁷Jesus tsaynö parlaycaptinnam runacunapa chöpinpitä juc warmi nimurgan: “iDiospa willacognin cangayquipita ima cushishgarä wachaycushog y shacshtatishog mamayqui caycan!” nir.

²⁸Tsaynö niptin Jesusnam nirgan: “Mamä cushicungannöllam Tayta Dios ninganta chasquicur wiyacogcunapis masrä cushishga caycäyan”.

**Milagrutarä Jesus rurananta
munayangan
(Mateo 12.38-42; Marcos 8.12)**

²⁹Tsaypitinan runacuna Jesus caycangan cagman goricyaptin caynö nirgan: “Gmcunaga Tayta Diosman

mana yäracog mana alli runacuna carmi milagrutarä ricayta munaycäyanqui. Gamicuna munayangayquinöräga manam ima milagrutapis rurashätsu. Tsaypa rantinga Tayta Dios juc milagrutam ruranga proféta Jonas cawaycaptin ruranganño”.

³⁰“Musayangayquinöpis unay Jonastam jatuncaray pescädupa pachanchö caycanganpita yargatsimurgan.^s Tsaynömi nogatapis pamparangäpita cawatsimanga”.

³¹“Salomonpa yachatsicuyninta wiyananpämí ‘Sabah’ ningan nacionpita juc reinapis caruta shamurgan Jerusalenman.^t Paypis fisyu final junagchö sharcamungam canan witsan runacunata ‘Salomonpa yachatsicuyninta noga chasquicungänö čimanirtä gamcunapis Tayta Diospa tsurin yachatsicunganta mana chasquicuyargayquitsu?’ ninanpä”.

³²“Tsaynöpis Jonas Diospa willacuyninta willacuptin wiyar Ninive marca runacuna jutsa ruraynincunata jagiriyargan. Jonaspitapis mas imaycawan munayyog caycapti willacungätaga canan witsan runacuna manam cäsucuyantsu. Tsaymi fisyu final junagchö Ninive runacuna sharcayämunga: ‘Jonas willacunganta chasquicuyangänö čimanirtä Tayta Diospa tsurin willacunganta chasquicuyargayquitsu?’ niyananpä”.

**Alli shonguyog cagcuna Jesusta
chasquiyangan**
(Mateo 5.15; 6.22,23)

³³Tsaypitnam Jesus nirgan: “Actsite tsaritsir alérimanmi churantsic wayiman

yaycogcuna shumag ricayänanpä. Manam imaypis tsaritsintsctsitu catri jawancunaman churantsicpäga. ³⁴Runacuna ricayänanpä actsi atsicyagnömi gamcunapis runacuna ricayäshunayquipä noga ningäcunata cäsuyänayqui. Nogata mana cäsumarninmi Tayta Dios munangantaga ruraycäyanquitsu. Tsaymi tantiyacuyanquitsu tsacaychönö jutsa rurag cayangayquita. ³⁵Waqin runacuna ‘Tayta Dios munangannömi cawaycä’ nicarpis manam rasunpaypatsu Tayta Dios munangannö cawaycäyan. Pagtatä tsay runacunano cayanquiman. ³⁶Willacungäcunata rasunpis chasquicurga Tayta Dios cachamanganta shumagmi tantiyayanqui, tsacaychö actsiwan imaycacunatapis ricaycagnöna”.

Fariseucunata Jesus gayapangan
(Mateo 23.1-36; Marcos 12.38-40;
Lucas 20.45-47)

³⁷Jesus parlayta ushasquiptinnam juc fariseo runa invitargan micuyänanpä. Tsaynam wayiman chaycur Jesus jamacurgan. ³⁸Israel runacunaga unay runacunapa üsuncunata cumplirmi manarä micur maquincunatarä awicuyag limpiu caycaptinpis. Tsaymi Jesus maquincunata mana awicullar micuycäyagta ricar yarpachacurnin invitag fariseo runa Jesusta ricapargan.

³⁹Tsaynam Jesus nirgan: “Gamicuna maquiquicunata awirpis pucilluyquicunata y matiquicunata janallanta awirir rurin ganrata dejaycognömi caycäyanqui. Pucillupa y matipa rurinchö granra caycagnömi

s 11.30 Jonastaga quimsa junag jatuncaray pescädupa pachanchö caycanganpita Tayta Diosmi yargatsimurgan. Jesustapis quimsa junagmi pamparangänita cawatsimurgan. Jonaspita masta musyanayquipä liyinqui Bibliachö “Jonas” ningan libruta. **t 11.31** Rey Salomonta watucag shamog reinapita musyanayquipä liyinqui 1 Reyes 10.1-13.

llutan yarpayniquicunawan y imaycapä mallag cayangayquicunawanga raccha shongu caycäyanqui.⁴⁰ iMana tantiyacog runacuna! ¿Manacu musyayanqui Tayta Dioslla cuerpuyquicunata camar shonguyquicunatapis ruranganta?

⁴¹Tsaymi shonguyquicunapis awishga cuenta cananpäga pobricunata cuyapar yanapayay. Tsaynö rurayaptiquimi Tayta Diospäga shonguyquicuna limpiu canga, manam maquíquicunallaga".

⁴²"iAllau, fariseucuna! Gampuncunataga Tayta Dios mana cuyapaypam castigayäshunqui. Gampuncunaga templuman Tayta Diospä garaynin apayänayquipä huertayquicunapita mentatapis, anistapis, ni imatapis chunca (10) aptay capuyäshuptiqui juc aptaytaga imaypis raquiyäyanquim: 'Tayta Diospa palabran gellgaranganmanmi llapantapis cumpliçäyä' nirnin. Tsaycunata rurarpis manam runa mayiquicunawan allega cawayanquitsu ni manam cuyapäyanquitsu. Nircur imata aunircurpis manam cumpliyanquitsu. Diospä ichic garayta apar cumplingayquinölla runa mayiquicunata alli ricayay, cuyapäyay, y imata aunirpiris cumpliyay".

⁴³"iAllau, fariseucuna! Gampuncunata Tayta Dios mana cuyapaypam castigayäshunqui. Gampuncunaga goricäcuyänan wayicunachö allin cag jamacunamanrä jamacuya munaycäyanqui. Tsaynöpis gampuncuna munaycäyanqui pläzacunachö yachatsicog cayangayquipita runacuna alabayäshunallayquitam".

⁴⁴"iAllau, Tayta Dios mana cuyapaypam castigayäshunqui! Gampuncunata runacuna ricayäshunayquillapäga, ä alli

tucuycuyanqui. Peru pamparanganchö ismushga ayanömi melanaypä caycäyanqui Tayta Diospäga. Tsaynö mana alli shonguyog cayangayquitaga runacuna manam musyayantsu".

⁴⁵Tsayta wiyarnam Moises gellgangal ley yachatsicog juc runa nirgan: "Tsaynö nirga nogacunatapis wiyacätsiyämanquim, taytay" nir.

⁴⁶Niptin Jesusnam nirgan: "iAllau, gampuncunapis ley yachatsicogcuna! Tayta Dios mana cuyapaypam castigayäshunqui. Gampuncunaga runacuna imanö caytapis mana camäpacuyanganyagmi Moises gellgangal leycunaman yapa-yaparcum cumplitsiyta munayanqui. Tsaynö captinpis shumag alli tupayllapa yachatsiyänayquipa rantinmi ollgü tupayparä yachatsiyanqui".

⁴⁷"iAllau gampuncuna! Tayta Dios mana cuyapaypam castigayäshunqui. Gampuncunaga alli cayangayquita runacuna niyänallanpämi unay runacuna wanutsiyangan profétacuna pamparäyangjan anchö capillancunara rurapäyanquipis.⁴⁸ Tsaynö ruraparpis profétacuna gellgayangancunata mana cäsur paycunata wanutseg unay runacunanolam gampuncunapis caycäyanqui".

⁴⁹"Tsaynö captinmi imanö cananpä cagtapis musyar Tayta Dios unay nirgan: 'Cachamushä willacog profétacunata y apostolnicunata. Waquintam wanutsiyanga y waquin cagtanam chiquir ñacatsiyanga' nir.^{50,51} Tsaynö cayangayquipitam gampuncunata Tayta Dios juzgayäshunqui Abelta wanutsegtanö, Berequiaspa tsurin Zacariasta altarpa ñöpanchö wanutsegtanö, y mas waquin profétacunata wanutsegtanö".^u

^u 11.50,51 Abelta wanutsiyanganta musyanayquipä liyinqui Genesis 4.8. Zacariasta wanutsiyanganta musyanayquipä liyinqui 2 Cronicas 24.20-22.

⁵²“iAllau ley yachatsicogcuna! Tayta Dios mana cuyapaypam castigayäshunqui. Runacuna Diospa willacuyninta yachacuyta munayaptinpis yachag tucurmi llutancunata yachatsicuyanqui. Rasunpaga quiquipuicunapis Diospa willacuynintaga manam cäsuyanquitsu”.

^{53,54}Tsaynö Jesus niptinnam ley yachatsicogcunawan fariseucuna ajanacurcuyargan. Tsaypitanam Jesusta rabyanapar tapupäyargan imaycaläya tapucucunata Roma mandacogpa contran parlaptinga tsaynöpa presuyänanpä.

Alli tucogcunata Tayta Dios
juzgananpä Jesus ningan

12 ¹Jesus tsaynö parlaycaptinrämi pasaypa atsca runacuna wayi ñöpanman goricäyargan. Tsaychö parlanganta wiwayta munarnimmi cumanacur jarunacurrä caycäyargan. Tsaynam discipuluncunata Jesus nirgan: “Fariseucunaga ‘Tayta Dios ningancunata llapantam ruraycä’ nicarpis manam cumpliyantsu. Pagtä paycunanö gamcunapis caycäyanquiman. ²Pacayllapa jutsa rurayniquicuna imay musyacarpis musyacangam. Manam ima rurayniquicunapis mana musyacagga cangatsu. ³Tsaynömi puncta wichgarcur pacayllapa parlayangayquicunapis mayacanga. Ushacäcuy junagga imayca llutan rurayniquicunatapis Tayta Dios juzgangam”.

Pitapis mana mantsacuypa
willacuyninta willacunapä Jesus
yachatsicungan
(Mateo 10.28-31)

⁴“Cuyay amigücuna, nogapa willacuynita willacuyaptiqui runacuna

wanutsiyäshurpis almayquicunataga manam imanayangatsu. Tsaynö caycaptinga manam pitapis mantsacuyänayquitsu. ⁵Paycunapita mantsacuyänayquipa rantinga Tayta Diosllata mantsacuyay. Paymi munayyog caycan almantinta infiernuman gaycunapäpis”.

⁶“Pishgucuna runacunapä mana alläpa cuestaptinpis Tayta Diospäga välinmi. Payga manam gongantsu ni juclayllatapis. ⁷Pishgucunatapis tsaynö ricaycarga gamcunatanäga masrämi Tayta Dios imanö cayangayquitapis ricaycäyäshunqui. Hasta agtsayquicunatapis yupashgatam payga caycätsin. Tayta Dios tsaynö ricaycäyäshuptiquega pipitapis ama mantsariyanquitsu”.

Jesuspa favornin parlagcuna imanö
cayänanpä willacungan
(Mateo 10.32,33; 12.32; 10.19,20)

⁸“Pipis nogaman criyicog canganta mana pengacuypa willacuptinga nogapis Tayta Diospa y angelincunapa ñöpanchö paycunapa favorninmi parlashä. ⁹Pipis nogapita pengacur willacuynita mana willacuptinga nogapis Tayta Diospa y angelincunapa ñöpanchö paycunata ‘Manam regits’ nishämi”.

¹⁰“Tayta Diospita shamungäta mana tantiyar nogapä llutanta parlayaptinpis Tayta Diosga perdonangam. Salvacog cangäta Espiritu Santo tantiyacätsiptin conträ captinmi itsanga Tayta Dios imaypis perdonanganatsu”.

¹¹“Nogaman criyicamog cayangayquipitam goricäcuyänan wayicunaman, juezcunaman, y waquin autoridäcunaman apayäshunqui castigayäshunayquipä. Tsaychö ama llaquicuyanquitsu: ‘Imanöparä cananga salvacuycushä?’ o ‘Imatarä niycushä?’

nirnin. ¹²Espiritu Santum tantiyatsiyäshunqui imata parlayänayquipäpis”.

Imapäpis mallagashga runa mana canantsicpä Jesuspa yachatsicuyin

¹³Runacunapa chöpinpitam juc runa caynö nimurgan Jesusuta: “Tayta, waugüta niycuy töcamangan cag herenciäta raquipämänanpä” nir.

¹⁴Tsaynam Jesus nirgan: “Amigu, manam juezniquitsu noga cä tsaynö nimänayquipäga” nir. ¹⁵Nircurnam runacunata nirgan: “Ama imapäpis mallagashga cayanquitsu. Alli cawayga manam imaycayogpis cayaptquirätsu” nir.

¹⁶Nircurpis Jesus caynö nirmi willapargan: “Juc rícu runam murucungampita pasaypa coséchata gorinä. ¹⁷Tsayna tsay rícu runa yarpachacunä: ‘Cananga ćmaymantä caytsica micuynüta churashä? Wayi manam aypannatsu churanäpä’ nir. ¹⁸Tsaynö yarpachacurna ninä: ‘Canan tröja wayita pascasquirchir jucta sharcatsishä mas jatuncaraya. Tsaymanmi llapan goringä micuynicunata y imaycäcunatapis churashä. ¹⁹Tsaynö churacuycptëga atsca watapämi micuynicuna canga. Tsaynö churacuycurmi itsanga micur upyar cushishgallana cawacushä’ nir.

²⁰Tsaynö yarpachacurir caycaptinna Tayta Dios ninä: ‘iLlutan yarpag malafë togshu! Canan pagasmi gam wanunqui. Llapan churangayquicuna ćpipärä quédanga?’ nir”.

²¹Tsaynö parlayta ushasquirmi Jesus nirgan: “Tsay rícu runa, runa mayincunata mana yanapar wanungannömi llapan malafë runacunapis runa mayinta mana yanaparga Tayta Diospita imatapis chasquiyangatsu”.

Tayta Diosman imaypis yäracuyänanpä Jesus yachatsicungan
(Mateo 6.25-34)

²²Nircur discipuluncunatapis Jesus nirgan caynömi: “Ama yarpachacuyańquitsu: ‘Canan ćimatarä micushä? ćImatarä jaticushä?’ nirnin. ²³Micuynintsic mana captinpis röpantsic mana captinpis cushicushun Tayta Dios cawayta gomangantsicpita. ²⁴Shumag tantiyacuyay pishgucuna imanö cawayangantapis. Paycunaga manam murucuyantsu, manam cosichayantsu, ni tröjacuyantsu. Tsaynö caycaptinpis Tayta Diosmi micuynincuna faltätsintsu. Gamecunaga tsay pishgucunapitapis mas välegmi cayanqui Tayta Diospäga.

²⁵Tsaynö imaycapä mayläya yarpachacurpis ćpirächi tamäňunpita masllataga jatunyarcunman? ²⁶Imaycapis ushacagcunallapa yarparäyänayquipa rantinga, imayca mana faltätseg Tayta Diosman yäracullar cawacuyay”.

²⁷“Tantiyacuyay waytacuna imanö cuyaypä tuctuyangantapis. Waytacunaga manam aruyantsu ni putscacuyantsu. Peru nicarpis imanö cuyayllańpämi ricacuyan. Waytacuna cuyayllańpä tuctungannöga manam unay rey Salomon jaticungan röpancunapis iwalargantsu. ²⁸Tsay waytacuna tsauririnanlla caycaptinpis Tayta Diosga ima shumagtam tuctutsin. Tsaynö cuyayllańpäta tuctuycańtsirga ćmanatsurä gamcunatanäga yanapayäshunquiman röpashta cayänayquipä, yäracuyniynag runacuna?”

²⁹“Tsaynö caycaptinga manam yarpachacuyańquitsu imata micuynayquipä ni imata upuyänayquipäpis. ³⁰Tsaycunata yarpachacurga puriyan Tayta Diosman

mana yäracog runacunallam. Gamcunaga tsay mana yäracog runacunanö ama yarpachacuyaytsu. Tayta Diosga musyaycanmi imata miñishtiyangayquitapis.³¹ Tsay imapäpis yarpachacuyänayquipa rantinga Tayta Dios munanganta rurar cawayänayquipä cagta yarpachacuyayga. Pay munangannö cawayaptiquega imata miñishtiyangayquitapis Tayta Dios manam faltätsingatsu”.

**Ricuyayllapä mana
yarpachacunantsicpä cagta Jesus
yachatsicungan**
(Mateo 6.19-21)

³²“Cuyay gatirämagnicuna, ama llaquicuyaytsu. Gamcunatam Tayta Dios acrayäshurgayqui imayyagpis paywan cawayänayquipä.

³³Capuyäshungayquita imayquicunatapis ranticusquir mana capogcunata yanapayay. Tsaynö runa mayiquicunawan cuyanacur cawarga ciéluchömi Tayta Dioswan imayyagpis alli cawayta chasquianqui. Tsaytaga mananam runapis suwangatsu ni puyupis ushangatsu.³⁴ Imaycayogpis cayllapä cagta yarpachacurmi manana Tayta Diosmanga yarpäyanquinatsu”.

**Jesuspa cutimuininpä alistacushga
canantsicpä yachatsicuyin**
(Mateo 24.45-51)

^{35,36}“Gamcuna listacushga maya-mayallana caycäyay noga ciélupita cutimuptí chasquicayämänayquipä. Casaracuy fiestapita patronnin cutimunanta empliyäduncuna shuyacogcunanolä nogatapis shuyacaycäyämanqui. Actsicurcur puncuta quichapänanpä shuyaragnölla gamcunapis listacushga caycäyay.³⁷ Tsay patron illanganpita

cutir yätsingannö shuyaycagta tariycur imanörä cushicur alabanman tsay empliyädunta. Mësaman jamaycatsir quiquin patronmi sirvinga.³⁸ Tsay patron illanganpita imay öra chänanpä cagta mana musyar empliyäduncuna shuyacuyangannöllam, nogatapis maya-mayalla listacushga shuyacayämänayqui ciélupita cutimunäta musyaycarga. Tsaynö shuyacaycäyämagna tariptéga imanö cushicuyrä gamcunapä caycunga”.

^{39,40}“Manam pipis punucumantsu ladron suwapänanpä cagta musyarga. Maya-mayallam waranman imancunatapis täpaycar. Tsay ladronta shuyacognölla gamcunapis maya-mayalla imaypis caycäyay, noga cutimunäpä cagta musyaycarga. Noga ciélupita cutimushä mana yarpäyämangayqui öram”.

⁴¹Tsaynam Pedro tapurgan: “Tsaynö cay iwalatsicuycunawan yachatsicungayquega ćnogacunallapäcu o llapan runacunapwancu?” nir.

⁴²Niptinnam Jesus nirgan: “Musyayangayquinöpis juc patron maypapis illarga mas yäracuypä cag empliyäduntam haciendanchö dejan imaycancunatapis shumag ricaycänanpä y waquin empliyäduncunatapis öranchö garar caycänanpä.⁴³ Tsay patron illanganpita cutir yätsinganno llapantapis ruraycagta tariycur imanörä cushicur alabanman tsay empliyädunta.

⁴⁴Empliyädun tsaynö alli portacuptinnam paypa maquinmanna churanman llapan imaycantapis ricananpä.⁴⁵ Peru mana yäracuypä cag empliyädum itsanga yarpan: ‘Patronni manarämi rasllaga cutiramungarätsu’ nirnin. Tsaynö yarparnam empliyädu mayincunatapis magar ushan y fiestacunachö puricur, micur, upyar cacun.⁴⁶ Tsaynö caycagman patronnin

mana yarpashgata illanganpita
chaycurga empliyädun mana allicunata
ruraycagta tariycur patronnin
magacacharcurmí gargaunga. Tsaynömi
janan shongulla criyicogcunatapis Tayta
Dios infiernuman gaycunga. Tsaychömi
wagar quirutapis uchuyangaräga”.

^{47,48}“Juc empliyädu mana
musyayninpá imatapis llutanta
ruraptina patronnin manam allápatsu
castiganga. Peru patronnin ninganta
musyaycar mana wiyacuypa
llutancunata ruraptinmi itsanga
patronnin pasaypa castiganga.
Tsaynöllam pipis Tayta Dios
munanganta musyaycar mana
cumplirga castiguman gaycucäyanga”.

**Jesusman criyicogcuna chiquishga
cayänanpä cagta ningan**
(Mateo 10.34-36)

⁴⁹“Cay patsaman noga shamurgö⁵⁰
chasquimag cagcuna salvashga
cayänanpä y mana chasquimag cagcuna
mana salvashga cayänanpämi. Cay
nicangäcuna maynapis
ruracaraycanmanna. ⁵⁰Peru tsaycuna
ruracänan captinpis puntataga
nogataran pasaypa ñacarcatsiyämarrä
wanutsiyämanga. Tsaytam pasaypa
llaquicur shuyarä hasta cumplinganyag”.

⁵¹“Ama yarpäyaytsu nogaman
criyicayämungayquipita mana
chiquishga cayänayquipä cagtaga.
Criyicamogcunataga imaypis
chiquiyäshunquim. ⁵²Cananpitaga
nogaman criyicamunganpitam juc
wayichö tagcuna quiquincura pura
chiquinacuyanga. ⁵³Taytanmi tsurinpa
contran canga y tsurinpis taytanpa
contranmi canga. Mamannam wawanpa
contran canga y wawanpa mamampa
contran canga. Llumtsuyninmi
suegrarpa contran canga y suegrannam
llumtsuyninpa contran canga”.

**Jesusta Tayta Dios cachamunganta
runacuna mana tantiyayangan**
(Mateo 16.2,3)

⁵⁴Tsaypitana runacunata Jesus
nirgan: “Rupay ullunan cagpa pucutay
yurimuptinga: ‘Tamyanganam’
niyanqui, y niyangayquinöllam tamyan.

⁵⁵Tsaynömi imaypis Negeb regionpita
vientumuptin: ‘Cananga rupacuypam
achaycunga’ niyanqui, y
niyangayquinöllam achan. ⁵⁶iMana
tantiyacogcuna! Tsaycunatapis cösa
tantiyacarga ñimanirtä
tantiyanquitsu Tayta Diospita
shamushga car noga
ruraycangäcunata?”

**Runa mayintsicta llutanta rurarga
arreglanantsicpä Jesus
yachatsingan**
(Mateo 5.25,26)

⁵⁷“Y nircur Tayta Dios cachamapterna
ñimanirtä chasquiyämanquitsu? ⁵⁸Pagtä
nogata mana chasquiyämangayquipita
Tayta Dios infiernuman
gaycuyäshunquiman. Imaytapis
chiquinacungayqui quejayäshuya
yarpaptinga autoridäman manarä char
arreglanqui. Tsaynö mana
arreglapliquega juezman
apatsishuptiqui juezga
wardiyacunawanmi carelman
wichgatsiyäshunqui. ⁵⁹Tsaypitaga
manam rasllaga yarguyanquitsu jaga
cayniquicunata llapanta mana
págacurga”.

**Mana cäsucog runa infiernuchö
castigashga cananpä willacungan**

13 ¹Tsaynam runacuna Jesusta
willayargan caynö: “Galilea
runacuna templuchö Tayta Diosta
adorarnin ashmacunata *altarchö
rupaycätsiyaptinmi *Pilato

soldäduncunata cachanä tsay
runacunata wanutsiyänanpä” nir.
 2Tsaynö willayaptinnam Jesus nirgan:
“Ama yarpäyaytsu waquin Galilea
runacunapita tsay wanog runacuna mas
jutsayog car wanuyanganta. 3Manam
Tayta Diospa castigunwantsu paycuna
tsaynö wanuyashga. Gmcunam itsanga
Tayta Diospa castigunwan infiernuchö
ñacayanqui jutsayquicunata mana
jagiyangayquipita. 4Tsaynömi
Jerusalenchö Siloe törrí juchur chunca
puwag (18) runacunata wanutsirgan.
Tsaynö captinpis ama yarpäyaytsu
tsaychö quëdag runacunapita tsay
wanog runacuna mas jutsayog
cayanganta. 5Manam Tayta Diospa
castigunwantsu paycunapis tsaynö
wanuyargan. Gmcunam itsanga Tayta
Diospa castigunwan infiernuchö
ñacayanqui jutsayquicunata mana
jagirninga”.

**Mana wayog hígusman mana
cäsucog runata Jesus iwalatsingan**

6Tsaynöpis mana cäsucog runacunata
mana wayog hígusman iwalatsirninmi
Jesus caynö nirgan: “Juc runapa
chacranchomö canä hígus. Tsaynam
duëñun aywanä hígusninman ricapacog:
‘Mä wayuncush o manacush?’ nir. Tsay
runaga tarinätsu ni jucllayllatapis
prütanta. 7Tsayna ninä chacran cuïdag
runata: ‘Quimsa watanam shamü cay
hígusman pallag y manam ni
jucllayllatapis tarírgotsu. Canan
mutusquir jitariy cay chacrapita. Mana
wayogtaga ñimapätä ardëllaga cay
chacraçhopis catsishun?’ nir. 8Tsaynö
niptinna chacran cuïdag runa ninä:
‘Taytay, mä juc wata shuyärishunrä ari.
Cananga entérunpa ogtipärirmi wanun
wiñapäshä. 9Tsaynö ruraptichir
wayurga wayungarä. Tsaychö manana
wayuptinga muturiycunquichir’ nir”.

**Säbadu jamapay junagchö
curcayashga warmita Jesus
allitsingan**

10Juc säbadu jamapay junagchönäm
runacuna goricäcuyänan wayichö Jesus
yachatsicuycargan. 11Tsaychömi
caycargan supay curcayätsingan juc
warmi. Payga mana derichacaypam
chunca puwag (18) watantin tsaynölla
cacurgan. 12Tsay warmita ricaycurnam
runacunapa ñöpanman pásaratsir Jesus
nirgan: “Cananga allishganam canqui
curcayashga cangayquipita” nir.

13Tsaynö nirnin yataycuptinmi jinan
öra allisquirgan. Allisquir
derichacarcurnam tsay warmi Tayta
Diosta alabargan.

14Tsaynam säbadu jamapay junagchö
Jesus tsay warmita allitsishga captin
tsay goricäcuyänan wayichö mandacog
runa ajacurcurgan. Tsaynö ajarninnam
runacunata nirgan: “Jogta junagllam
runacuna aruyänanpäga. Tsay
junagcunachö shayämunquiman allitya
munarga. Canan säbadu jamapay
junagchörä gampis puricuycanqui” nir.

15Tsaynam Jesus nirgan: “iJanan
shongu yachag tucog runacuna!
Gmcuna säbadu jamapay junagchö
ñmanacu töryuquicuna ashnuuyquicuna
wataraptin pascasquir
yacurcatsiyanqui? 16Cay Israel
warmita allau chunca puwag (18)
watantin Satanas geshyatsiptinmi
curcayashga cacushga. Säbadu
jamapay junagchö quiquipicunapis
ashmayquicunata
cuyapäyangayquinölla, ñimanirtä cay
warmita cuyapayta yachayanquits?”

17Tsaynö niycuptionam
chiquegnincunaga pasaypa
pengacuyargan. Waquin runacunam
itsanga cushicuyargan allita
rurangancunata ricar.

**Diospa willacuyinta ñäbuspa
murunman y levadüraman Jesus
iwalatsingan**
(Mateo 13.31-33; Marcos 4.30-32)

^{18,19}Tsaynö mastapis Jesus yachatsirganmi caynö nirnin: “Tayta Diospa alli willacuyninga imayca ñäbuspa murunnöllam. Tsay ichiclla muru jegarcamurga jatunyarmi rämancunapis mashtacanganrä. Tsaynö captinmi rämancunaman pishgucunapis rataycur geshuncuna rurayan. Tsay ichic murullapita ñäbuspa räman mashtacangannömi Tayta Diospa alli willacuyninga maytsaymanpis chaycan”.

^{20,21}Nircur mastapis yachatsicur Jesus caynömi nirgan: “Tayta Diospa alli willacuyninga levadüränöllam caycan. Juc runa tantata rurar quimsa arröba machcaman levadürata wiñaptinmi mäsaga shumag jaca. Tsay levadüra wallcalla caycar mäsata atscayätsir jacatsingannömi Diospa alli willacuynin maytsayman chaptin chasquicogcunapis masrä atscagyäyan”.

**Tayta Diosta cäscucogcunalla
gloriaman aywayänanpä Jesus
willangan**
(Mateo 7.13,14;21-23)

²²Tsaypita Jesus Jerusalenman aywarnam marcacunapa päsargan yachatsicuraycar. ²³Tsaychömi juc runa tapurgan: “Taytay, ɿwallcagllacu cayan salvacögä cagcuna?” nir.

Tsaymi Jesus nirgan: ²⁴“Atscag o wallcaglla captinpis gamcunaga imaycanöpa salvacionta ashiyay. Salvacur gloriaman yaycuyänayquipäga quichqui puncupanörämi päsayänayqui. Atscag yaycuya munarpis wallcagllam yaycuyanga”.

²⁵“Gamcuna ‘Diospa palabranta wiyangäpitam gloriamañan yaycushä’

nirpis rasunpaga cawayníquicunachö manam cäscucuycayanquitsu. Wanucuyangayqui öra tsaynö mana cäscucuyangayquipitam gloria wayiyog puncunta wichgacascamuptin gamcuna tacacuyanqui: ‘Puncuyquita quichapaycallämay, taytay’ nir. Tsay wayiyognam niyämushunqui: ‘Gamcunataga manam regitsu. ɿPirä cacuyanquipis?’ nir. ²⁶Tsaymi gamcuna niyanqui: ‘Imanirtä regiyämanquitsu? Micurchä upurchä purigantsic. Y marcäcunachöpis yachatsirguyquichä’ nir. ²⁷Paynam niyämushunqui: ‘Gamcunaga manam cäscuyämarguyquitsu. ɿPirä cacuyanquipis? iÑöpäpita witicuyay, jutsasapa runacuna!’ nirnin”.

²⁸“Tsaynam ciéluman manana yaycur *Abrahamta, Isaacta, Jacobta, y profëtacunata rurichö caycagta ricarnin pasaypa wagayanqui. Quiryuquicunatapis uchuyanquirämi yaycuya manana puëdirnin. ²⁹Maytsaypitapis shamog runacuna ciéluman yaycog cagmi itsanga Tayta Dios alistangan micuya cushicurrä micuyanga. ³⁰Tayta Dios munangannö cawagcuna cay patsachö mana alli ricashga carpis ciélumanga yaycuyangam. Tayta Diosta mana yarpar lluta cawaychö cawag cagcunam itsanga infiernumanna gaycucäyangam”.

**Jerusalen marcata ricärir
Jesus wagangan**
(Mateo 23.37-39)

³¹Tsaypitanim waquin fariseucuna chäyargan Jesus caycanganman caynö nir: “Caypita aywacuy cawayta munarga. Rey Herodesmi wanutishuyta munan”.

³²Tsaynam Jesus nirgan: “Pay wanutsimayta munaptinpis manam imapis gocamantsu. Canan waraylanam

supaycunata runacunapita gurgushä y geshyagcunatapis allitsishä. Tsaycunallawannam cumplinga llapan ruranäpä cagcuna.³³ Tsaypitärämi Jerusalenman aywashä tsaychö wanutsishga canäpä. Tayta Diospa willacognin profétacuna Jerusalenchö wanuyangannömi nogapis Jerusalenchörä wanushä”.

³⁴ “iJerusalen runacuna! ¿Imanirtä Tayta Dios cachamungan profétacunataga y alli willacuyninta willacogcunataga unaypitapis wanutsiyanquilla? Nogaga imanömi gamcunata goriyta munargö, imayca wallpa chipsancunata goriycur oglagnöpis. Tsaynö goriyta munaycaptipis gamcunaga munayniquicunata rurarmi cacuyarguyqui.³⁵ Tsaynö cayangayquipita gamcunata Tayta Dios dejariyäshunquim y chiquiyäshogniquicunam munanganta rurar marcayquicunatapis ushacätsiyanga. Tayta Dios goricamaptin manam ricayämanquinatsu ‘Tayta Dios cachamungan salvayämaglläcuna shacallämuy’ niyangayqui junagyag”.

**Jacapäcushga runata
Jesus allitsingan**

14 ¹Tsaypita sábadu jamapay junaghönám Jesus aywargan juc mandacog fariseupa wayinman micog. Tsaychömi waquin fariseucunapis Jesus imata rurangancunatapis musyapacur caycäyargan.^{2,3} Y tsaychömi entëru cuerpu jacapäcuycag runapis caycargan. Jesus tsayta ricaycurmi ley yachatsicogcunatawan fariseucunata tapurgan: “Gamcunapä sábadu jamapay junag caycaptinpis ćcay runata allitsishwancu o manacu?” nir.

⁴Tsaynö niptin imatapis mana parlacuyaptinnam geshyaycag runata Jesus yataycurgan allisquinanpä. Alliscatsirnam nirgan: “Cananga aywacuyna wayiquipa” nir.

⁵Nircurnam fariseucunata nirgan: “Maygayquipapis wamrayquicina o ashmayquicina pozuman ishquishga captin ćmanatsurä juclla jipeg aywayanquiman, sábadu jamapay junag caycaptinpis? Tsaynöllam nogapis geshyagcunata allitsi sábadu jamapay junagchöpis”.

⁶Tsaynö niptin manam imaniytapis puédiyargantsu.

**Invitashgacunapita Jesus
parlapangan**

⁷Tsay fariseupa wayinchö waquin invitashgacuna, llapancunapitapis mas alli tucurmi, wap aywar mésamanrä jamascäriyargan. Tsayta ricaycurmi Jesus yätsirnin caynö nirgan:^{8,9} “Pipis invitayäshuptiqui mésamanräga ama ras jamacuyanquitsu. Gamcunapita mas respitädru runa chämuptin ‘Mésapita witicuy pay jamacunapä’ niyäshuptiqui pengacushgam jamaracyäyangayquipita witicuyanqui”.

¹⁰ “Mésaman juclla jamacunayquipa rantinga shuyäriyanquirä, invitayäshogniqui ‘Amígu, mésallaman pásacamuy’ niyäshungayquiyag. Tsaynö jamarayätsishuptiquim itsanga mésachö waquin jamagcunapis respitayäshunqui.

¹¹ Tayta Diosga manam pitapis yanapantsu alli tucogcunataga. Payga imaypis yanapan llänu shonguyog mana runa tucogcunatam”.

¹² Nircurnam wayinman invitag runatapis Jesus nirgan: “Invitanacur micungayqui öra ama gayatsinquisu cuyanacungayqui capllata, ni waugillayquita, ni castallayquita, ni riëu cag vicinullayquitaga. Tsaynö

rurayaptiquega paycunapis
cutitsiyäshunquillam.¹³Tsaypa rantinga
pásaratsinqui pobricunata, ratacunata, y
gapracunata.¹⁴Paycunaga manam ni
imanöpapis cutitsiyäshunquitsu.
Tsaytaga Tayta Diosnam
cutitsiyäshunqui jutsaynag runacunata
cawatsimungan junag".

**Tayta Diosta mana cäsucogcuna
ciéluman mana aywayänanpä
willacungan**
(Mateo 22.1-10)

¹⁵Tsaynam jamaraycanganpita juc
invitashga runa nirgan Jesusta:
"iTaytay, ima cushishgarä cayanga
ciéluchö Tayta Dios alistangan micuyta
micogcuna!"

¹⁶Tsaynö niptinmi picuna
micuyänanpä cagtapis Jesus caynö nir
tantiyatsirgan: "Juc runam atscá
runacunata invitänä juc junag wayinchö
micupacur goyäyananpä.¹⁷Tsaynam
invitangan junagna empliyädunta
cachanä tsay invitangan runacunata
pásatsiyänanpä.¹⁸Tsayna empliyädun
willag chaptin jucnín ninä: 'Rantingä
chakra ricagrämi aywanä caycan.
Nogapita ama resentiyellätsuntsu' nir.
¹⁹Jucagna ninä: 'Pitsga par törücumam
rantiycurgö. Tsaymi alli o mana alli
jarungantapis musyanäpä yapyag
aywaycä. "Yapaychönash shallämunga"
niycullay' nir.²⁰Y mas jucnín cagna
ninä: 'Tsayrämi casaracurgö y manam
puëdimushätsu' nir. Tsaynö nir
llapanpis invitangan runacunaga mana
aywayänatsu".

²¹"Tsayna tsay gayamog aywag
empliyädun cutiycur patronninta
willanä runacuna imanö niyangantapis.
Tsaynö willaptinna patronnín pasaypa
rabyacunä. Tsaypitana empliyädunta
ninä: 'Cállicunapa aywar pushamuy
pobricunatapis, gapracunatapis, y

ratacunatapis' nir.²²Tsayna patronnín
ninganta cumplir empliyädun ninä:

'Cumplillargönám llapan
nimangayquicunata, taytay.
Mandamangayquinö llapanta
pásaycätsimuptipis wayiquiman
manarämi runacuna juntäyantsu' nir.
²³Tsayna patronnín ninä:

'Nanicunapapis y chacracunapapis
aywar taringayqui cag runacunata
imaycanöpapis pushamuy wayíman
juntäyanganyag.²⁴Tsay yupay tucog
invitängacuna mayganpis micuyänanta
mananam munänatsu' nir".

**Salvacionta imanöpa tarinapä
Jesus yachtsingan**
(Mateo 10.37,38)

²⁵Tsaypita atscag runacuna
gatiräyaptin aywaraycarnam Jesus
nirgan: ²⁶"Nogaman criyicamunganpita
taytan chiquiptinpis, maman
chiquiptinpis, majan chiquiptinpis, o
tsurin chiquiptinpis noga ningäta rurar
imaypis cawatsun. Peru noga
ningäcunata mana cäsumar mamanpa,
taytanpa, majanpa, o tsurinpa
munayninchö cacog cagga manam
rasunpatsu discipulü".

²⁷"Imaycachö ñacarpis nogaman
criyicamur cawayätsun. Wanunganyag
noga ningäcunata mana cäsumag
cagcunaga manam rasunpatsu discipulü.

²⁸Nogaman manana criyicamogcunaga
juc runa wayi rurayta gallaycatsir
dejaregnömi cayanqui. Pipis wayita
rurananpäga shumagrämi yarpachacun
tsay wayita ushananpä gastun aypanganta
o mana aypangantapis. ²⁹Pipis wayita
gallar cimientuyellar dejasquiptinga
llapan ricagcunam jamuräyan: ³⁰"Tagay
runaga mana puëdiycar wayita rurar
gallaycatsishga manapis ushananpä' nir".

³¹"Y tsaynömi juc nacion maygan
nacionwanpis pelyananpäga cösará

yarpachacuyanman. Alli cösa yarpachacurimi itsanga ninman: ‘Mä, čishcay chunca waranga (20,000) soldäducunata juc chunca waranga (10,000) soldädulläwan vincimancush o manacush?’ nir.³² Pelyayta mana puëdinan captina jucag cag mandag carullachörä caycaptinmi willacogninta cachanman: ‘Mananash pelyashunnatsu. Munangayqui cagtash imäcunatapis apacunquí’ nir willananpä.³³ Tsaynölla discipulü cayman manarä yaycur llapan imayquicunatapis noga raycur dejariyänayquipä cagtarä shumag yarpachacuyay. Imayquicunatapis jagiriya mana munarga manam discipulü cayanquimantsu’.

**Cachiman iwalatsicur
Jesus yachatsicungan**
(Mateo 5.13; Marcos 9.50)

^{34,35}“Gamcunaga cay patsachö cachinömi cayanqui. Micuya cache gustuta manana gor imapäpis mana välegnömi gamcunapis Tayta Dios munanganno mana cawarga imapäpis väliyanquitsu. Gamlagyashga cachita pipis jichariyangannömi gamcunatapis infiernuman Tayta Dios gaycuyäshunqui. Cay ningäcunata wiyag cagga tantiyacuyay”.

**Ogracashga üshata taringanman
iwalatsingan**
(Mateo 18.12-14)

15¹Tsaypitnam *impuestu cobracogcunawan Diosta mana cäsucog runacunapis aywayargan Jesus parlanguanta wiyayänanpä.²Tsayta ricaycurnam fariseucunawan ley yachatsicogcuna Jesusta jamurar niyargan: “¿Imanirtä cay runaga jutsasapacunawanpis goricaycur micuycan?” nir.

³Tsaynö niyaptinmi Jesus iwalatsicuywan parlapargan: ⁴“Pipis

pachac (100) üshanpita jucta ograycurga čmanatsurä waquin cagcunata juc puchaman goriycur juclla aywar ashinman hasta taringanyag?⁵ Tariycurga cushiongagachi matancarcur apacunman. “Wayinman chaycurga vicinuncunatapis amiguncunatapis cushioncurchi willapanman: ‘iOgrangä üshätam tariycamurgö!’ nirnin”.

⁷Tsaynö willaparnam Jesus nirgan: “Tsay runa üshanta tarisquir cushiongannöllam Tayta Dioswan angelnincunapis cushioncuyan juc runa jutsancunata jagirir Tayta Diosta chasquicuptin. Isgun chunca isgun (99) alli cawag runacunapä cushioncuyanganpita masrämi cushioncuyan jucllayllapis jutsallachö cawacog runa jutsanta dejarir Tayta Diosta chasquicuptin”.

Ogracashga gelléman iwalatsingan

⁸“Tsaynö pii warmipis chunca gelléninpita jucta ograycur čmanatsurä actsita tsarircatsir juclla ashinman wayintapis pitsapacur ograngan gelléninta taringanyag?⁹ Ashiyanganta tariycurga wayinchö cushioncunchi willacunman: ‘iOgrangä gellénitam tarisquirgö!’ nirnin.¹⁰ Tsaynömi Tayta Dioswan angelnincunapis cushioncuyan juc runallapis jutsa rurayninta jagirir Tayta Diosta chasquicuptin”.

Aywacog jövinman iwalatsingan

¹¹Mastapis Jesus caynö nirganmi: “Juc runapash ishcay ollgu tsurincuna canä.¹²Tsayshi gepa cag tsurin papäninta ninä: ‘Papä, nogata töcamangan cag herenciä goycamänayquitam munä’ nir. Tsaynö niptinshi papänin raquipaycunä paypä cagcunata”.

¹³“Tsaypita juc ishcay junagllatanash llapan chasquingancunata

ranticuscärinä. Nircur tsay gelléninta apacurcur aywacunä juclä caru marcapa. Tsaychönash munanganta rurar llapan gelléninta manacagcunallachö usharinä.
^{14,15}Tsaypita ushacäpacusquirga imanö caytapis mana puëdir mallagänäna. Y tsay marcachö muchuy gallaptinna tsay jövinga pasaypa mallagar aruya ashinä. Tsayna juc hacendädu runa chasquinä cuchinta mitsitsinapä. ¹⁶Cuchita mitsirnash pasaypa mallagar cuchipa micuynintapis micuylana munanä. Tsaynö mallagaptinpis micuylana captinshi pipis garanätsu”.

¹⁷“Tsayshi yarpachacunä: ‘Papänipa arognincunaga pachajunta micurchir caycäyan, noga caychö mallagay wanunaycaptü. ¹⁸Caynö canäpa rantinga papäní cagpa cuticushä. Chaycurga caynömi nishä: ‘Papä, perdonaycallämäy. Gomangayquicunata manacagcunachö usharmi jutsata rurargö. Manam gam munangayquinötsu ni Diosnintsic munangannötsu cawargö.
¹⁹Cananpitaga ama cuentamaytsu tsuriqitanöga. Juc mincayniquitanöllana chasquiycallämäy” nir’. ²⁰Tsaynö yarpachacusquir cuticunä papänin cagpa”.

“Tsayshi wayinman carulällatarä aywaycagta ricaycur papänin cuyapaywan cörilla taripagnin aywar pasaypa cushicuywan macallacurcunä.
²¹Tsayshi tsuringa yarpangannö ninä: ‘iPerdonaycallämäy, papä! Gomangayquicunata manacagcunachö jutsata rurarmi ushargö. Manam gam munangayquinötsu ni Diosnintsic munangannötsu cawargö”.

²²“Tsaynö parlapar manarä ushaptinshi papäninga empliyäduncunata ninä: ‘Mas alli

röpacunata ras jipiyämuy trocacunapä. Tsaynö sortijata y zapatuta jipiyämuy jaticunapä. ²³Nircur weran cag torítuta pishtayay. iCanan itsanga fiestata rurashun! ²⁴iCay tsurëga wanunganpita cawarimognömi! iOgracanganpitam cutimushga!” Tsaynö nir cushicurnin fiestata rurayänä”.

²⁵“Tsaynö fiestachö cayanganyag mayor cag tsuringa chacrachö arucuyçänä. Tsaypita wayinpa aywaycanganchöga wiyanä wayinchö cushicurnin fiestachö caycäyagta.
²⁶Tsayna juc wätayninta gayaycur tapunä imanir fiestata ruraycäyanganta. ²⁷Tsaynö tapuptinna willanä caynö: ‘Waugiquim cutimushga. Tsay cushicuywanmi papäniqui pishtatsishga weran cag torítuta’ nir”.

²⁸“Tsaynö willaptinshi pasaypa payga rabyarnin wayinman yaycuya munanätsu. Tsaynash papänin aywar ruganä wayiman yaycunapä. ²⁹Tsayshi papäninta ninä: ‘Papä, gam musyangayquinöpis maypapis mana yarguyepam yanapaycä llapan nimangayquicunata rurar. Tsaynö yanapaycaptüpis imaypis manam goycamargayquitsu ni juc cabrallatapis amigücunawan fiestata rurar micrucuyänalläpäpis. ³⁰Cay gela tsuriqui jutsa ruraylachö cawacog warmicunawan gelléniquita ushasquir cutiycamuptinmi itsanga pishtatsirguyqui weran cag torítutarä’ nir”.

³¹“Tsaynö niptinnash taytan ninä: ‘iAumi, hijü! Gamga mana yargucuyepam nogawan caycällanqui. Tsaymi llapan imaycäcunapis gamllapäna. ³²Peru waugiqui jutsa rurayninta jagirir cutimushga caycaptera, ‘imanirtä cushicuyputa fiestata mana rurashwantsu?’ nir”.

Tayta Diosman mana
criyicogcunawanpis alli
cawanantsiepä yachatsicuyin

16 ¹Tsaypita discipuluncunata yachatsirmi Jesus nirgan: “Patronninmi juc mayoralninta churanä imaycanwanpis munayyog cananpä. Tsaypita patronta runacuna willapäyänä imaycancunatapis lluta tsay mayoralnín ushaycanganta. ²Tsayta musyaycurna patronnin gayacatsimurnin ninä: ‘Runacuna gampä parlayan imäcunatapis llutalla ushaycangayquitam. Cananga cuentata gomay llapan imata rurangayquitapis. Cananpitaga mananam imaycäcunawanpis munayyognatsu canqui’ nir”.

³“Tsaynö niptinna tsay mayoralga quiquillanchö yarpachacur ninä: ‘¿Imatarä canan rurashä patronni gargamaptinga? Manam callpäpis cantsu chacrachö arunäpä. Limushna mañacuytapis pengacumi. ⁴Alfin patronni gargamaptinpis amigücuna canmi chasquiyämänanpä’ nir”.

⁵“Tsaynö yarpachacurcur patronninpá jagan cag runacunata juc juclaylla gayacatsimur punta cagta tapunä: ‘¿Aycatä patronnipa jagan canqui?’ ⁶Tsaynö tapuptin jucnin cag ninä: ‘Paypa jagan cä ishcay pachac (200) lata acétim’. Tsayna tsay mayoral ninä: ‘Canan cay recibuchö firmamuy, pachac (100) latallatana págayanquipä’”.

⁷“Tsaypita jucnin cagtana tapunä: ‘Gamga caycatä jagan canqui?’ Tsayna tsay runa ninä: ‘Paypa jagan cä ishcay waranga (2,000) arröba trügunmi’. Tsaynö niptinna ninä: ‘Canan cay recibuchö firmamuy, juc waranga pitsga pachac (1,500) arröballatana págayanquipä’”.

^{8,9}“Tsay mayoral rurangan mana alli caycaptinpis patronninga payta caynö

alabanämi: ‘Tsay runaga amishtä rurayta yachanmi, arucuyninpitä yargusquir imanö cawanapanpäpis’ nir”.

Tsaynö willapärirnam Jesus nirgan: “Manam munätsu gamcuna tsay runanö manacagcunata rurayänayquia. Gamcunapis amishtäta ruray capuyäshungayqui cagcunallawanpis, Peru siña noga yachatsicungäta willacuyaptiqui chasquicur ciéluman aywayänayquipä. ¹⁰⁻¹²Alli amigun cangayquita regishunayquipä imanta paytacucyshuptiquipis ama ricapacunquitsu. Tsaypa rantinga cuídanpanqui. Tsaynö honrädu captiquega Diospa willacuyninta willacuyaptiquipis chasquishunquim. Y mana yáracuypä cayaptiquega manam cäsuyäshunquitsu ni imapäpis”.

¹³Tsaypita caynopis Jesus nirganmi: “Manam pi runapis ishcay patrontaga sirvinmantu. Ishcanta sirvirga jugac ningantam ruran y jucagtaga manam cäsunnatsu. Tsaynömi gelléllapä yarparag runacuna Tayta Dios ningantaga rurayanquinatsu. Tsaymi rícu cayllapä yarpachacuywan Tayta Dios munangannöga cawayanquitsu”.

**Jesus yachatsingancunatana
cäsucuyänanpä cangan**
(Mateo 11.12,13; 5.31,32;
Marcos 10.11,12)

¹⁴Tsaynö yachatsingancunata wiyarnam gelléllapä ayrayashga fariseucuna Jesuspita asicuyargan.

¹⁵Tsaynam Jesus nirgan: “Gamcuna runacunapa fiöpanchö alli tucuyaptiquipis Tayta Dios musyaycanmi gamcunapa shonguyquicuna imanö cangantapis. Tsaymi imanopis cayangayquita mana musyar runacuna respitayäshuptiquipis Tayta Diospäga tsay alli tucungayquicuna melanaypä caycan”.

¹⁶“Moises gellgangancunachöpis, Tayta Diospa profétancuna gellgayangancunachöpis, y Juan Bautista willacungancunapis nican nogal salvacogniquicuna cay patsaman shamunäpä cagtam. Tsaymi Juan willacur gallanganpitapis runacuna Tayta Diospa willacuynintaga chasquicuycäyan. Tsaynö captinpis waquin runacunaga manam munayantsu willacuyninta willacuyänanta, sinöga imaycanöpapis tsapamat churapaycäyan”.

¹⁷“Tsaynö nogapa willacuynítana chasquiyaptinpis ama yarpäyaytsu profétacuna gellgayangan mana cumplinanpä cagta. Cay patsa y cielu juc junag ushacaptinpis profétacuna gellgarangancunaga llapanmi cumplinga”.

¹⁸“Pí runapis majanpita raquicasquir jucwan targa tsay runa adulteriu jutsatam ruraycan. Tsaynöllam majanpita raquicashgawan pipis targa jutsata ruraycan”.

Gloriapä y infiernupä Jesus willacungan

¹⁹Tsaypitanam Jesus willapargan caynö nir: “Juc rícu runam canä selläma alli röpacunallata jatirag. Cada junag amíguncunawan fiesta rurayllachö car alli micuycunallata micuyag. ²⁰Tsay rícu runapa wayi puncunchö limushna mañapacog Lazaro jutiyog runa jamaränä entëru garanca geri ushashga. ²¹Payga ‘Rícu runapa mësanpita micuy shicwagllatapis, imanöparä micurcamüman’ ninä. Y tsaychö allgucunapis Lazarupa gerinta lagwapäyänä. ²²Tsaypita Lazaro wanusquiptinga angelcuna apacuyänä ciélupa Abraham caycangan cagman. Y rícu runa wanuptinna castancuna pampayänä”.

²³“Tsay rícu runapa alman infiernuchö rupanä. Tsaychö rupaycarna carupita ricasquinä ciéluchö Lazaro Abrahampa ñöpanchö caycagta. ²⁴Tsayna rícoga gayacunä: ‘Tayta Abraham, cuyapaycallämay. Lazaruta cachaycallämuy dëdunta yacuwan ushmarcatsir shimiäta ogurcatsipamänanpä. Cay ninachö rupar manam awantänatsu’ nir’.

²⁵“Tsaynö niptinna Abraham ninä: ‘Híju, yarpay gam imaycayqui jananchö cangayqui öra alli vídallachö cawangayquita. Lazaroga pobri carnin pasaypam ñacargan. Tsaymi payta cananga caychö cushishga cay töcan y gamtanam tsaychö ñacacuy. ²⁶Y jinachöpis pasaypa mantsaripä wanyaycag ragram jarcämantsic. Tsaymi gam cangayqui cagman pipis tsimpamuya puëdintsu ni gampis puëdimunquitsu tsimpamuya cay nogacuna cagman’ nir’.

²⁷“Tsaynö niptinna rícu runa ninä: ‘Tayta Abraham, rugacungä raycur papäniipa wayinman Lazaruta cachaycullay. ²⁸Tsaychö pitsgarämi waugicuna caycäyan. Paycunata willaycamutsun cay ñacayman mana shayämunanpä’ nir’.

²⁹“Abrahamna ninä: ‘Paycuna tsaräyanmi Moises y waquin profétacuna gellgayangan *Bibliata. Tsaychö ningancunata cäsucuyätsun’ nir’.

³⁰“Tsayna rícu runa ninä: ‘Tayta Abraham, tsay Bibliata tsarararpis tsaytaga manam cäsucuyangatsu. Juc runa wanunganpita cawarircur willacuptinmi itsanga jutsa ruraynincunata jagiriyaman’”.

³¹“Tsaynö niptin Abraham ninä: ‘Bibliatapis mana cäsuycarga wanunganpita cawarircur willacog cutiptinpis manam cäsuyangatsu’ nir’.

**Imaypis perdonanacunapä Jesus
yachatsicungan**
(Mateo 18.6,7,21,22; Marcos 9.42)

17 ¹Tsaypita juc cutinam discipuluncunata Jesus nirgan: “Jutsata rurayänayquita Tayta Dios mana munaptinpis jutsaman ishquitsicogcunaga imaypis cangam. Paycunataga mana cuyapaypam Tayta Dios castiganga. ²Nogaman criyicamogcunata pagtä pitapis jutsata ruraycätsiyaniquiman. Tsaynö runacunataga mejormi jatuncaray mulinu rumita cuncanman wataparcur lamarman jitarpuyanman.

³Musyayanquinam gamicunapis. Pagtatä jutsaman ishquitsicogcunano cayanquiman”.

“Runa mayiqui imachöpis mana allita rurayäshuptiqui llutanta ruraycanganta shumag tantiyatsinqui. Tsay llutan rurayninta yarpachacusquir ‘Perdonaycallämay’ niyäshuptiquega perdonayanqui mana ajanaypa. ⁴Pipis juc junagchö ganchis (7) cuti mana allita ruraycushur ‘Perdonaycallämay, cananpitaga mananachir gampä mana allita ruraycushätsu’ niyäshuptiquega perdonaycunqui”.

⁵Tsaynö niptinnam apostolnincuna Jesusta niyargan: “Taytay, gamman yäracayämuptipis ajam ningayquicunata cumpliyga. Yanapaycallämay imaypis gamta cäsucuyänäpä”.

⁶Tsaynö niyaptinnam Jesus nirgan: “Nostäza murunöllapis yäracuyniquicuna ichic captingga cay jachata ‘Matsupita lluquicasquir lamarman jawicäramuy’ niyaptiquipis jawicäramunmanmi. Tayta Diosman rasunpaypa yäracuyaptiquega manam imapis ajatsu gamicunapä canga”.

**Tayta Dios nimangantsicta
empliyädu cuentalla
cäsucunantsicpä willacungen**

⁷“Manam ima patronpis, empliyäduncuna yappyanganpita o mitsicunganganpita chasquiptin ‘Jamacullay micunayquipä’ niyantsu. ⁸Tsaypa rantinga llapanpis niyan: ‘Cusnacamuyrä garamänayquipä. Noga micaramuptiran gamga micunqui’ nirmi. ⁹Tsaynö mandanganta ruraycaptinpis manam pipis agradesicuntsu tsay empliyäduun ruranampä caillata rurashga captin”.

¹⁰“Tsay empliyäduunöllam gamicunapis Tayta Diospäga cayanqui. Tsaymi Tayta Dios munanganta rurarpis mana yarpäyänayquitsu ‘Payga alli ruragmi’ niyäshunayquipä cagtaga. Tsaypa rantinga niyay: ‘Nogacunaga Tayta Diospa empliyäduunmi cayällä. Tsaymi pay munangallanta rurayällä’ nir”.

**Leprawan geshyaycag chunca
runacunata Jesus allitsingan**

¹¹Jerusalen marcaman aywaraycarnam Jesus discipuluncunawan pásayargan Samaria y Galilea provinciacunapa lindërunpa.

¹²Tsaypita juc tacshalla marcaman chäyananpä caycaptinmi *leprawan geshyaycag chunca runacuna Jesusta ricasquiyargan. Tsaymi carulällapita gayacuyargan: ¹³“Tayta Jesus, inogacunata cuyapaycayällämay!” nir.

^{14,15}Paycunata ricaycurnam Jesus nirgan: “Aywayay sacerdöticunaman allishgana cayangayquita musyatsicayämunanpä”.

Tsaynö aywaycäyangantam geshyancunapita llapancunam allisquiyargan. Alliyanganta cushicurninmi jucnin cag runa cutiycurgan “Cay geshyäta

alliycatsimangayquipita Tayta Diosta alaballämi” niraycar.

¹⁶Jesuspa ñöpanman chaycurnam gonguricuycurgan “iAgradesicullämi alliycatsimangayquipita, Taytallä Jesus!” nir. Tsay runaga cargin Samaria marcapitam.

¹⁷Tsaynam Jesus nirgan: “Allegcunaga cayarguyqui chuncagchä. ¿Maytä waquin cagga? ¹⁸Cay juclä marca runallam cutiycamushga Tayta Diosta ‘Gracias’ niecur alabarnin”.

¹⁹Tsaynö nisquirnam tsay runata Jesus nirgan: “Sharcur aywacuy. Tayta Diosman yäracuyniquipam salvacashgana canqui”.

Ciélupita cutimuynin imanö cananpä Jesus willangan

(Mateo 24.23-28, 37-41)

²⁰Juc cutinam Jesusta fariseucuna tapuyargan, “¿Imaytä salvacogta Tayta Dios cachamunga allina cawanantsicpä? Salvacog chämunänpanä canganta musyayänäpä cima señalcunatä canga?” nir.”

Tsaynam Jesus nirgan: “Manam ima señaltaräga ricayanquitsu. ²¹Manam pipis niyäshunquirätsu: ‘Caychömi o washachömi señalta ricargö’ nir. Tayta Diosga salvacogta cachamushganam gamcuna mana cuentata gocuyaptiquipis”.

²²Tsaynö nisquirnam discipuluncunata nirgan: “Ciéluman aywasquiptü gamcuna llaquicuywanmi cutimunäta munayanqui. Tsaynö munayaptiquipis manam jucllaga cutimushärätsu. ²³Runacuna niyanga: ‘Tayta Dios cachamungan salvacog caychömi’ o ‘Wacchömi caycan’ nirnin.

Tsaynö niyaptin ama llutallaga criyyianquitsu. ²⁴Ciéluchö tillagucuy jucagläpita jucagläyag atsicyaptin runacuna ricayangannömi nogra ciélupita cutimogtapis llapan runacuna ricayämanga. ²⁵Tsaycuna manarä päsaptinmi puntataga runacuna chiquiyamar pasaypa ñacatsiyämanga”.

²⁶“Unay *Noe cawanan witsan mana yarpashgata Tayta Dios *diluvita cachamungannömi nogapis mana yarpashgata cutimushä. ²⁷Tsay witsanga diluviu manarä captin runacuna micur, upyar, casaracurmí cacuyargan. Tsaynö cawacuyargan Noe büquitänö *arcata ruraycur tsayman yaycungan junagyagmi. Tsaynö caycagman Tayta Dios pasaypa tamayata gallatsipaycamuptinmi cay patsaman yacu juntargan. Tsaynöpam arcaman mana yaycog cag runacuna llapan ushacäyargan”.

²⁸“Tsaynömi Lot cawanan witsanpis Tayta Diospa castigun mana yarpashgata shamunänpanä canganta mana musyarnin runacuna micur, upyar, rantir, ranticur, murupacur, y wayitapis sharcatsir caycäyargan.

²⁹Sodoma marcapita Lot yargusquiptinnam itsanga ciélupita nina tamya unyamurgan. Tsaychömi llapan runacuna rupaycar ushacäyargan. ³⁰Nogapis tsaynöllam runacuna mana musyayangan öra illagpita cutimushä”.

³¹“Tsay junagga wayichö caycagcuna ama imayquicunamanpis jipeg yaycuyanquinatsu. Tsaynölla chacrachö caycagcunapis wayinman amana cutiyätsunnatsu. ³²Yarpäyay Lotpa warmin marcanman cuticuycuya munanganpita wanunganta.” ³³Pipis

v 17.20 Jesus runalla canganta yarparmi fariseucuna mana tantiyayargantsu Tayta Dios cachamungan salvacog cangantaga. w 17.32 Lotpa warmin imanö wanungantapis musyanayquipä liyinqui Genesis 19.26.

noga munangänö mana cawar quiquinpa munayllanman cawacog cagga manam gloria vïdaman changatsu. Pipis willacuyniña chasquicur Tayta Dios munangannö cawag cagmi gloria vïdachögä cushishga cawanga”.

³⁴“Cutimungä junag juc cämallachö ishcag punuycagcunapita nogaman criyicamog cagtam apacushä y mana criyicamog cagtanam jagirishä. ³⁵Maraynincunachö ishcag agacuycag warmicunapita nogaman criyicamog cagtam pushacushä y mana criyicamog cagtaga jagirishämi. ³⁶[Tsaynömi ishcag runacuna chacrachö aruycagpita nogaman criyicamog cagta pushacushä y mana criyicamog cagtanam jagirishä]”.

³⁷Tsaynam tsayta wiyaycur discipuluncuna tapuyargan: “Tsaynö captina ćmaymantä apayämanquega, taytay?” nir.

Tsaynö tapuyaptinnam Jesus nirgan: “Tsunyagcunachö wiscircuna tumaycachar musyatsicuya maychöpis wanushga ashma jitaraycangantam. [Tsaynömi noga ningäcuna ruracagta ricar musyayanqui noga cay patsaman cutimunäpäna cagta]”.

Tayta Diosman mana ajayaypa mañacunantsicpä yachatsicuynin

18 ¹Mana ajayaypa Tayta Diosman mañacuyänanpämi cay iwalatsicuywan discipuluncunata Jesus yachatsirgan caynö nirnin:

²“Juc marcachömi juc juez canä Tayta Diosta mana mantsacog ni runacunatapis mana cuyapag. ³Tsay marcachö täcog canä juc viüdapis. Payga tsay juezman aywanä atsca cutina ‘Quejacungäta ćimaytä arreglaycamanqui, taytay?’ nir. ^{4,5}Tsaynö cutillana cutiptinpis juezga

mana cäsunätsu. Nicanganta itsanga tsay juez yarpachacur ninä: ‘Diosta mana mantsapacurpis ni runacunata mana cuyaparniñpis cay warmipa demandunta juclla arreglaycushä. Mana arreglaptëga imaycay örapis cutiyämungallam fastidiamar umätapis nanatsirnin’ nir’.

^{6,7}Tsaynö willapärirnam Jesus nirgan: “Tsay juez mana alli caycarpis viüda quejacunganta arreglaycaptina ćTayta Dios manatsurä cäsuycuyäshunquiman payman yäracogcuna pagasta junagta mañacuyaptiqui? Tayta Diosga ima mañacuyangayquitapis manam shuyarätsiyäshunquitsu. ⁸Tsaynö rugacur mañacog cagtaga Tayta Dios mana shuyarätsiyapam yanapanga. Peru itsanga noga cay patsaman cutimur ćgmcunata tariyäshayquirätsurä Tayta Diosllaman yäracur pay munangannö caycagta?”

Jutsantsicpita perdonta Tayta Diosman mañacunapä Jesus yachatsicungan

⁹Juc cutichönam Jesus willapargan waquin runacuna alli tucur juccunata jamuräyanganta caynö nir:

¹⁰“Ishcay runacunam aywayänä templuman Tayta Diosman mañacuyänanpä. Jucnín cag canä fariseo y jucagna canä mana alli ricashga *impuestu cobracog runa. ¹¹Tsay fariseo cag runaga ichircur caynö mañacunä: ‘Gracias, Dios Taytay. Gamta agradesicümi waquin cag runacunanö mana cangäpita. Paycunaga cayan suwacogmi, mana alli ruragmi, majancunata engañar adulteriu jutsata ruragmi. Manam nogaga tagay impuestu cobracog runanöga cätsu. ¹²Nogaga ayunäpis ishcay cutim cada semänachö. Tsaynöllam arur gänangäpita diezmutapis gollämü templuman’ nir’.

¹³“Impuestu cobracog cag itsanga carulällaman ichicuycunä. Payga jutsasapa car ciélumanpis mana ichicllapis ñuquinätsu, sinöga feyupa llaquicur ninä: ‘Cuyapämär perdonaycallämay, Tayta Dios. Nogalläga jutsasapa runam callä’ nir.

¹⁴Tsay impuestuta cobracog cagga wayinman cutinä jutsanpita perdonashgana. Fariseo cagtam itsanga Tayta Dios perdonanätsu. Tsaynömi pipis alli canganta parlacachag cagtaga Tayta Dios pengacatsinga. Jutsa rurayninta tantiyacur perdonta mañacog cagtaga allim ricanga”.

Tayta Diosman wamracunapä Jesus mañacungan

(Mateo 19.13-15; Marcos 10.13-16)

¹⁵Tsaypita juc cutichönäm runacuna Jesusman pishi wamrancunata apapäyargan maquinta umancunaman churar Tayta Diosman mañacapänanpä. Jinatanam discipuluncuna michar cutitsiyargan. ¹⁶Tsayta ricarnam Jesus nirgan: “Ama michäyaytsu nogaman wamracuna shayämunanta. Pipis cay wamracunänö llullu shongu cagcunatam Tayta Dios glorianman pásatsinga.

¹⁷Wamra papänincunaman yäracungannö pipis Tayta Diosman mana yäracogcunaga manam glorianman yaycuyangatsu”.

Juc rícu runa Jesuswan parlangan

(Mateo 19.16-30; Marcos 10.17-31)

¹⁸Juc cutichönäm juc mandacog rícu runa Jesusta nirgan: “Taytay, gamga alli rurag runam canqui. Mä niycamay, ñimatata ruräman gloria viðaman chänäpä?” nir.

¹⁹Tsaynam Jesus nirgan: “¿Imanirtä alli rurag cangäta nimanqui? Manam pii runapis alli ruragga cantsu. Tayta Diosllam alli ruragga. ²⁰Gam

mandamientuncuna caynö ninganta musyanquinam. ‘Ama adulteriu jutsata ruranquitsu. Ama runa mayiquita wanutsinquitsu. Ama suwacunquitsu. Ama runa mayiquita manacagta tumpanquitsu. Papäniquita mamayquita respirar alli ricanqui”.

²¹Tsaynö niptinnam tsay runa nirgan: “Taytay, tsaycunataga wamra cangäpitachä cumpliyä” nir.

²²Tsaynam Jesus nirgan: “Tsaynö llapanca cumpliyacarpis Tayta Diosman criyicungayqui musyacänanpä jucta ruranayquiran faltäshunqui. Canan llapan imaycayquicunatapis ranticuscärir pobricunata aypuy. Tsayta rurarga jana patsachö mana ushacag riquézatam chasquinqui. Nircur nogaman yäracamur aywacamuy” nir.

²³Tsaynö Jesus niycuptinmi itsanga runa yarpachacur wamayashga jegasquigan alläpa rícu carnin.

²⁴Tsaynö wamayacurcogta ricarnam Jesus nirgan: “Ajallarämi rícu runacuna Tayta Diospa glorianman yaycuyänanpäga. ²⁵Tsaypa rantinga mas fácilchi jatuncaray *camëllu ashmapis aujapa uchcunpa ullusquinman, juc rícu runa glorianman yaycunapä cagpitaga” nir.

²⁶Tsaynö niptin wiyagcunananam Jesusta tapuyargan: “Tsaynö captiona ñpirä salvacunga, taytay?” nirmiñ.

²⁷Tsaynam Jesus nirgan: “Runacuna quiquinuncunallapitaga manam salvacionta tariyantsu. Tayta Diosmi pitapis jutsancunapita perdonar salvan. Paypäga manam imapis ajatsu”.

²⁸Niptinnam Pedro nirgan: “Taytay, nogacunaga llapan imaycäcunatapis jagisquirmi gamta gatiraycäyä”.

^{29,30}Tsaynö niptin Jesusnam nirgan: “Alli willacuyniña willacur pipis wayinta, warminta, wauginta, paninta, mamanta, papäninta, tsurincunata

jagireg cagga jaginganpita atsca cuti
mastam cay patsachö taringa.
Ñacatsiptinpis willacuyniña
willacogcunaga gloria vüdachömi
imayyagpis mana ushacaypa cawanga".

**Wanutsiyänanpä cagta yapay Jesus
willacungan**

(Mateo 20.17-19; Marcos 10.32-34)

³¹Tsaypitam chunca ishcay (12) apostolnincunata gayaycur Jesus nirgan: "Musyayanquim Jerusalenpa aywaycangantsicta. Tsaychömi noga Tayta Diospita shamogta wanutsiyämanga. ³²Israel autoridäcumam Roma autoridäcumapa maquinman apatsiyämanga. Tsaychömi nogapita burlacuyanga, ashlliyämanga, togapäyämanga, astayämanga, y wanutsiyämanga. ³³Peru wanutsiyämanganpita quimsa junagtaga cawarimushämi" nir.

³⁴Tsaynö niptin discipuluncunaga manam tantiyayargantsu imapä parlaycangantapis.

**Jerico marcachö gaprata Jesus
allitsingan**

(Mateo 20.29-34; Marcos 10.46-52)

³⁵Tsaypitanam Jerico marcamanna Jesus discipuluncunawan yaycuracyärgan. Tsaychömi näni cuchunchö jamaraycargan juc gaprayashga runa limushnata mañacur.

³⁶Tsaynam atsca runacuna aywaycäyagta mayarnin tsay gapra tapucurgan: "¿Imatä callan?" nir.

³⁷Tsaynam runacuna willayargan: "Jesus Nazaret runam päsaycan".

³⁸Tsaynö willaycuptinnam gayacurgan: "Unay rey *Davidpa castan Jesus, cuyapaycallämay ari" nir.

³⁹Tsaynö gayacuptin puntata aywaycagcunaga gaprata ajäpäyargan: "¡Upälla cay!" nirmi.

Tsaynö niyaptinpis payga mas fuertipam gayacurgan: "¡Rey Davidpa castan, cuyapaycallämay!"

⁴⁰Niptinnam Jesus ichisquir nirgan tsay gaprata apapäyänanpä. Ñöpanman chaycatsiyaptinnam tapurgan:
⁴¹"¿Imachö yanapanätätä munanqui?" nir.

Tsaynam runa nirgan: "Taytay, gaprashgá car ricaytam munallä".

⁴²Niptinnam Jesus nirgan: "Cananga ricayna. Nogaman yäracamungayqupitam allirguyqui" nir.

⁴³Tsaynam gaprada wap ricachacusquirgan. Tsaypitanam Jesuspá gepanta cushishga aywacurgan Tayta Diosta alabaraycar. Tsaya ricaycurnam llapanna runacuna Tayta Diosta alabayargan.

**Jesusta Zaquo wayinman
chasquicungan**

19 ¹⁻³Jerico marcachömi tärargan Zaquo jutiyog juc rícu runa. Payga cargan impuestu cobragcunapa mandagninmi. Tsaynam Jerico marcapa atsca runacunawan Jesus päsaycaptin Zaquo tacshalla carnin Jesusta ricayta puédirgantsu. ⁴Tsaymi payga puntancunapa cörilla aywar juc geruman yarcusquirgan Jesus päsaycagta ricanampä.

⁵Tsaynam Jesus tsaypa päsaraycarna Zaquo achparaycagta ricasquirnin nirgan: "Zaquo, ras yarpamu". Cananga wayiquichömi patsatsimanqui" nir.

⁶Niptinmi Zaquo yarpascamur Jesusta cushicur pushargan wayinman.

⁷Tsayta ricaycurnam runacuna Jesuspä rimar gallaycuyargan: "¿Imanirtä jutsasapa runapa wayinman aywaycan patsacunampä?" nir.

⁸Tsaypita wayinchö caycarnam Zaquo Jesusta nirgan: "Señor Jesus,

llapan riquëzäpa pullanninta cay
pobricunata raquipaycushä. Y pipa
imantapis gechushga carga canamni
chuscu cuti masta cutiyatsishä” nir.

⁹Tsaynö niptin Jesusnam nirgan:
“Cananmi salvacionta alcanzayarguyqui
cay wayichö llapayqui täragcunantin.
Unay *Abraham Tayta Diosman
yäracungannömi gampis
yäracurguyqui”.

¹⁰Tsaynö nisquirnam runacunata
Jesus nirgan: “Nogataga Tayta Dios cay
patsaman cachamashga jutsasapa
runacunata salvanäpämi”.

**Empliyäduncuna arunänä
patronnin gelléta jagipangan**
(Mateo 25.14-30)

¹¹Jesus salvacionpä parlanganta
wiyarnam runacuna yarpäyargan:
“Jerusalenman chaycushgaga reynintsic
caymannachir juclla Jesusga
churacanga” nir. Cay patsaman
cutimurrä rey cananpä cagta mana
musyarmi tsaynö parlayargan.

Tsaymi Jesus juc munayyog runawan
iwalatsir parlapargan caynö nir: ¹²“Juc
munayyog rícu runatam caru marcachö
mandacog *emperador gayatsinä:
‘Tärangayqui marçayquichö mandacog
rey canayquipä chasquicog shamuy’ nir.
¹³Tsaymi tsay rícu runa manarä
wayinpita yargur chunca
empliyäduncunata gayascäratsir
jucninta jucnintapis atsca gelléta
jagipänä: ‘Cutimungäyag gellénäwan
aruyräyanqui’ nir. ¹⁴Tsaynö nir
aywacusquiptinnam marca mayincuna
gepantana cachayänä willacogcunata
caynö niyänänä: ‘Manam tsay runata
mandagnicuna cananpä munayätsu’
nir”.

¹⁵“Tsaynö marca mayincuna mana
munaycaptinpis marcanchö mandacog
cananpäga chasquicunä. Tsaypita

marcanman cutiyurna tsay rícoga
gayatsinä gellénin tsararag
empliyäduncunata gellénin aycatana
wachangantapis musyananpä. ¹⁶Tsay
puntata chag cag ninä: ‘Taytay,
gollämangayquita chunca cuti mastam
gelléniquita miratsillargö’ nir”.

¹⁷“Tsaynö niptinna patronnin ninä:
‘Gamga alli empliyädum canqui.
Wallcallawanpis shumag arur
miratsingayquipitam cananga chunca
marcapa mandagnin canayquipä
churashayqui’ nir. ¹⁸Tsaypitana chänä
jucag empliyädunpis caynö nir: ‘Taytay,
gollämangayquita pitsga cuti mastam
gelléniquita miratsillargö’ nir. ¹⁹Tsaynö
niptinna patronnin ninä: ‘Pitsga
marcapa mandagnin canayquipämi
gamta churashayqui’ nir”.

²⁰“Jucnir cag empliyädunna ardë
tsapacullarna ninä: ‘Caychömi caycan
gelléllayqui, taytay. Päñuwani
gepircurmi churaycurgö. ²¹Gamga
tsaripacunqui mana quiquipatash y
cosichanquipis mana arurcurshi. Tsaynö
yaga runa captiquim mantsapacur
churaycurgä’ nir”.

^{22,23}“Tsaynö niptinna patronnin
ajäpar caynö ninä: ‘Gamga mana
yäracuy empliyädum canqui!
Quiquipa shimiyyquipitam gamga
juzgacanqui. Malafé cangäta
yarpaycarga címanirtä gellénäta
bancullamanpis churarguyquitsu
cutimur wachayyogtana goricunäpä?’
nir. ²⁴Tsaynö nisquirna tsaychö caycag
runacunata ninä: ‘Tagay mana yäracuy
empliyädupita gellénäta gechusquir
goycuyay chunca cuti masyag wachatsir
aruy yachag cagta’”.

²⁵“Tsaynö niptinna niyänä: ‘Taytay,
peru paypaga chunca cuti masta
wachatsinganpis capunnachä’ nir”.

²⁶“Niyaptinna patronnin ninä: ‘Noga
ningäta cumpleg cagcunataga

imaycäwanpis munayyog cananpämi churashä. Peru mana cumplegcunatam itsanga imaycantapis gechusquir gargarishä. ²⁷Y nircur mandacog rey canäta mana munar chiquimagnicunataga cayman apaycamur wanutsiyay”.

**Jerusalenman Jesus yaycuptin
runacuna cushicur
chasquicuyangan**
(Mateo 21.1-11; Marcos 11.1-11;
Juan 12.12-19)

²⁸Tsaynö runacunata willapasquirnam Jerusalenpa Jesus aywacurgan discipuluncunawan. ²⁹“Olivos” ningan jircan wac-wagtanchömi Betfage y Betania marcacuna cargan. Tsaycunaman yaycuraycarnam Jesus cachargan ishcey discipuluncunata caynö nir: ³⁰“Aywayay tagay wac-tsimplapa. Tsaychömi tariyanqui manarä pipis muntacushga juc pollinu ashnu wataraycagta. Tsayta pascasquir apayämunqui. ³¹Pipis ‘¿Imapätä tsay ashnuta apayanqui?’ niyäshuptiquega niyanqui: ‘Señor Jesusmi miñishtin muntacunapä’ nir”.

³²Jesus ningannö discipuluncuna aywarnam tariyagan ashnu wataraycagta. ³³Tsayta pascaycäyagta ricaycurnam ämun tapurgan: “¿Imapätä ashnütä pascaycäyanqui?” nir.

³⁴Tsaynö niptinmi paycuna niyargan: “Tayta Jesusmi miñishtin” nir.

³⁵Jesus caycangan cagman chäratsiyaptinnam punchuncunata carunaparcuyaptin Jesus muntacurgan.

³⁶Tsaynö muntashga aywaraycaptinnam runacuna punchuncunata jacuncunata näñiman mashtayargan. ³⁷Tsaynam Olivos jircantana uracyäaptin gatiragnincuna cushicur Tayta Diosta alabayargan llapan milagrucunata ruragta ricayanganpita caynö nir:

³⁸“¡Tayta Dios cachamungan mandamagllantsic rey imayyagpis alabashga caycallätsun! ¡Gracias ciéluchö caycag Tayta Dioslläcuna!”

³⁹Tsaynam tsay runacunachö aywag fariseucuna chöpincuncapita niyargan: “Mayistru, gatiräshogniquicuna upälläcuyänanpä ajäpay” nir.

⁴⁰Tsaynö niyaptinnam Jesus nirgan: “Paycunata upälläcuyänanpä niyuctéga rumicunapis gayararmi Tayta Diosta alabayanga”.

⁴¹Tsaypitam Jerusalen marcata ricärir Jesus wagar caynö nirgan:

⁴²“Jerusalenchö täragecuna, canan junagllapis tantiyacuriyanquimanran cargan nogata chasquimar salvacionta tariyänayquipä cagta. Peru gmcuna manam chasquicäyämanquitsu.

⁴³Tsaynö cayangayquipitam gmcunapä chämunga ñcacuy junagcuna. Chiquiyyäshogniquicuna maytsayniquicunapa

jirurupasquiyäshuptiqui manam maypapis geshpriyta puëdiyanquitsu.

⁴⁴Wamrayquicunapis ni imapis manam geshpingatsu. Chipyaypam ushacätsiyäshunqui. Wayiquicunatapis juchutsirmi ushacätsiyanga. Manam ni juc rumillapis pergaraycar quëdangatsu. Tsaynömi ruracanga Tayta Dios cachamungan salvacogta mana chasquiyangayquipita”.

**Templupita ranticogcunata
Jesus gargungan**

(Mateo 21.12-17; Marcos 11.15-19;
Juan 2.13-22)

⁴⁵Jesus Jerusalenman chaycurnam templuman yaycurgan. Tsaychö ranticogcunata tariycurnam gargur ushargan. ⁴⁶Tsay runacunata ajäpar nirgan: “Tayta Diospa palabran gellgaranganchö caynömi nican: ‘Temploga noga Diosllayquita

maytsaypitapis shamur
adorayämänayquipämi' nir. Tsaynö
nicapitn ɬimanirtä gamcunaga
ladroncunapa machaynintanö
catsiyانqui?" nir.

⁴⁷Tsaypitanam templuchö cada junag
Jesus yachatsicurgan. Tsaymi
sacerdöticunapa mandagnincuna, ley
yachatsicogcuna, y waquin
autoridäcuna yarpachacuyargan Jesusta
imaycanöpapis wanutsiyänanpä.
⁴⁸Tsaychö llapan runacuna Jesus
yachatsingancunata shumag
wiyayaptinmi ima ruraytapis
puëdiyarganrätsu.

**Jesus templupita imanir
ranticogcunata gargunganta
autoridäcuna tapupäyang**
(Mateo 21.23-27; Marcos 11.27-33)

20 ¹Jesus Jerusalenman yapay
chaycurnam Tayta Diospa alli
willacuyninta templuchö
yachatsicuycargan. Tsaymannam
chäyargan sacerdöticunapa
mandagnincuna, ley yachatsicogcuna, y
mas waquin autoridäcuna.
²Tsaychönám tapuyargan caynö: "Gam
ɬima puëdeg cayníquiwantä cay
templupita ranticogcunata
gargurguyqui? Tsaycunata ruranayquipä
ɬipitä cachamushurguyqui?" nирнин.

³Tsaynö niyaptinnam Jesus nírgan:
"Gamicunatapis mä jucta tapuyäshayqui.
⁴¿Pítä Juanta cachamurgan
bautizananpä, Tayta Dioscu o
runacunacu?"

⁵Tsaynö niptinnam quiquincura pura
willanacur niyargan: "Tayta Diosmi
cachamushga' nishgaga nimäshun
'ɬimanirtä payta
chasquicuyargayquitsu?' nirmi.
⁶Runacunallam cachamushga'
nishganam llapan runacuna
janantsicman shayämur samgaypa

wanutsimäshun. Paycunaga Tayta Dios
Juan Bautistata cachamungantam
yarpäyan".

⁷Tsaynö willanacurirnam Jesusta
niyargan: "Nogacuna manam
musyayätsu Juanta pii
cachamungantapis".

⁸Tsaynö niyaptinnam Jesus nírgan:
"Gamicunapis mana
willayäyäaptiquega nogapis manam
willätsu caycunata ruranäpä pii
cachamangantapis".

Contrancunata chacra arrendacunaman Jesus iwalatsingan

(Mateo 21.33-46; Marcos 12.1-12)

⁹Tsaypitanam Jesus yachatsicurnin
nirgan: "Juc runam chacranman üvata
plantatsinä. Nircurmi tsaychö arupagnin
runacunata arrendädu jagipaycur juclä
caru marcaman tärag aywacunä.

¹⁰Tsaypita tiva cosécha gallariptinnam
juc empliyädunta cachanä payta
töcangan cagta gorimumanpä. Tsayna
empliyädun chäriptinga chacran
tsararag runacuna magacacharchur mana
imatapis raquipällar garguriyänä".

¹¹"Tsayna chacrayog runaga juctana
empliyädunta cachanä. Paytapis
tsaynölla chacran tsararag runacunaga
samgar umantapis paquir usharcur
imaycata gayaparcurrä garguriyänä.

¹²Tsaypita mas juctana chacrayog
cachanä. Paytapis tsaynölla magar
ushasquir yawarllatana jinayllata
garguriyänä".

¹³"Tsaynam chacrayog yarpachacurna
ninä: 'Cananga imatä rurashä?
Cachashä cuyay tsuritachir. Paytaga
respitarnin manam
imanayämunganatsu' nirkin".

¹⁴"Tsayna chacrayogpa tsurin
yaycuraycagta ricasquirga chacra
arrendarag runacunaga willanacuyänä:

“Tagaymi cay chacrawanga heredéru quédanga. Paytaga wanuriycatsishun chacran nogantsicpána cacunanpá’ nir.
¹⁵Tsaynö willanacusquirna chacrayogpa tsurintapis tsarisquir wanuratsiyänä. Nircur ayantapis chacranpita jucláman jitariyänä”.

Tsaycunata parlapärirnam Jesus nirgan: “Quiquin chacrayog chaycur tsay runacunata éimatará ruranga? ¹⁶Chacran arrendaragcunata wanuscáratsirmi jucunatana charcantapis arrendacunga”.

Tsaynö niptinmi runacuna niyargan: “Tayta Diosnintsic cuyapaycallámashun tsaynö ajanaywan nogantsictapis mana castigaycamänantsicpá”.

¹⁷Tsaynö niyaptinnam paycunata ricapärir Jesus nirgan: “Gmcuna infiernuman mana gaycucayta munarga tantiyacuay caynö nir Tayta Diospa palabran gellgaranganta:

‘Wayi cimientog runa “Cay rumega manam allitsu” nir jitariyangan cagrämi alli albañilpäga mayistra rumimanrä ticrarin’.

¹⁸Pipis tsay mayistra rumiman ishquirga tacacunmi. Y pipa jananmanpis tsay rumi cuchpacarga pasaypam ushacäratsin. [Tsaynömi pipis nogaman mana cryicamog cagga infiernuchö ñiacayanga]”.

¹⁹Tsaynö Jesus parlapäriptin sacerdöticunapa mandagnincuna y ley yachatsicogcuna contrancuna parlaycanganta musyarnam présuytana munayargan. Peru atscag runacunata mantsacurninmi tsay örallaga présuyarganrätsu.

Impuestuta págayanánpanpá o mana págayanánpápis Jesusta tapuyangan

(Mateo 22.15-22; Marcos 12.13-17)

²⁰Tsaypitana autoridácuna Jesus caycanganman musyapacogcunata cachayargan alli tucuycullar parlapäyanánpanpá. Autoridácunaga munayargan Roma mandacogpa contran parlaptinga tsaynöpa présuytam.

²¹Tsaynam Jesus cagman chaycur caynö niyargan: “Taytay, nogacuna musyayämi rasun cagllata imaypis gam yachatsicungayquita. Gamga Tayta Dios munangannö runacuna cawayanánpanpámi yachatsicunqui. Imata parlarpis pitapis mana mantsapacupypam ninqui.

²²Tsaynö captin tapucuriyälläshayqui. Munayinchö catsimagnintsic Roma nacionpá impuestuta ćpágashwancu o manacu pagashwan?” nir.^x

²³Lluttanta parlatsiyta munar alli shemicunallapa tapuyanganta musyarnam Jesus nirgan: ²⁴“Mä, juc gelleta apamur ricatsiyämäy” nir. Tsaynam ricaycatsiyaptinna nirgan: “Cay gellechöga ćpipla reträtuntä caycan? ćPipa jutintä caychö gellgaraycan?”

Niptinnam paycuna niyargan: “Romachö mandamagnintsic emperadorpam” nir.

²⁵Tsaynam Jesus nirgan: “Emperadorpa cagtaga emperadorman apaycapuyay. Tayta Diospa cagtaga^y Tayta Diosta goycuyay” nir.

²⁶Tsaynö atsca runacunapa chöpinchö niyuctin manam imaniytapis puëdirna upällacurpuyargan.

^x 20.22 Waquin runacuna niyargan Roma nacionman impuestuta págayanánpanpá cagtam y waquinnam niyargan impuestuta págarga Tayta Diospa contranta ruraycäyanganta.

y 20.25 Caway gomagnintsic Tayta Diosllam caway vïdantsicwanga munayyog. Tsaymi Tayta Diospa cagga caway vïdantsic caycan.

Wanushgacuna mana
cawariyämunänpä cagta
saduceucuna yarpäyangān
(*Mateo 22.23-33; Marcos 12.18-27*)

²⁷Tsaypitanañ *saduceucunana Jesus caycanganman chäriyargan. Paycunaga yarpäyangān wanushgacuna manana cawayämunänpä cagtam. Tsaymi Jesusta tapurnin caynö niyargan: ²⁸“Taytay, Moises gellganganchöga caynömi nican: ‘Juc runa tsuriynaglla wanucuptin gepa cag wauginna llumtsuyinin viüdawan tätsun. Tsaynöpam viüdachö wamran yuriptin tsay wanog cag wauginpa tsurin cuentana canga’ nir. ²⁹Tsaymi canan cuentariyäshayqui. Ganchis (7) waugicunash cayänä. Mayor cagshi juc warmiwan tänä. Payga tsurin manarä captinshi wanusquinä. ³⁰Tsayna viüdawan gepan cag wauginna tänä. Paypis manarä tsurin captinshi wanusquinä. ³¹Y tsaynöpis mas gepan cag wauginna viüdawan tänä. Paypis wanusquinälla manarä tsurin captin. [Tsaynöllash llapan waugincuna tsay warmillawan täyänä. Y tsuriynaglla llapanpis wanuyänä.] ³²Tsä, tsaypitanañ warmipis wanucunä. ³³Y wanushgacunata Tayta Dios cawaritsimungan junagga ćmaygan cag waugipa warmintä canga, llapancunawan tashga caycaptinga?” nir. ^{34,35}Tsaynam Jesus nirgan: “Tsay warmi manam mayganpa warminpis canganatsu. Cay vüdallachömi warmiyog y runayogpis cayan. Tayta Dios cawascatsimuptin ciéluman aywagcunaga mananam majayog cayanganatsu. ³⁶Tsaychöga angelcunanoüllanam mana wanucuya cawayanga. Tayta Diospa wamrancunanan cayanga cawatsimushga captin. ³⁷Wanushgacuna cawayämunänpä Moises gellganganta

liiyicarpis ćmanacu tantiyacuyanqui?
*Abraham, Isaac, y Jacob wanuyanganpitaga alli unaytam shiraca rauraycag munti rurinpita Moisesta Tayta Dios nimurgan: ‘Nogaga Abraham, Isaac, y Jacob adoraycäyämangan Diosmi cä’ nir. ³⁸Tsaynö nishga captinmi musyantsic wanungallanchö paycunata Tayta Dios mana dejaringanta. Tsaynöllam pitapis maytapis cawatsimunga criyicamog cagtaga”.

³⁹Tsaynö Jesus niycuptinnam ley yachatsicogcuna niyargan: “Allitam tsaytaga niycurguyqui, taytay” nir.

⁴⁰Tsaypitaga mananam pipis mastaga tapuyargannatsu.

Salvacog shamog Diosnintsic
(*Mateo 22.41-46; Marcos 12.35-37*)

⁴¹Tsaypitanañ Jesus paycunatana nirgan: “Unay rey David castapita carpis salvacogga manam runallatsu. Payga Diosmi. Tsaynö caycaptinga ćimanirtä ley yachatsicogcuna niyan runalla canganta? ⁴²Unay rey Davidpis ‘Salmo’ ningan libruchö caynö nirmi gellganäna:

‘Salvacogga mandacog reynimi.
Paytam Tayta Dios ninga:
“Jamacamuy cay derëcha cag
lädüman, ⁴³llapan
chiquishogniquicunata
munayniquichö catsinayquipä
nir.’

⁴⁴‘Salvacogga mandacog reynimi’ nir David nicaptinga, salvacog shamogga ćimanöpatä runalla canman?’

**Ley yachatsicogcuna alli
tucuyangan**
(*Mateo 23.1-36; Marcos 12.38-40;
Lucas 11.37-54*)

⁴⁵Llapan runacuna wiyacyäyaptinmi discipuluncunata Jesus nirgan:

⁴⁶“Pagtatä ley yachatsicogcuna munaynincunata rurar cawacuyangannö paycunata cäsur cawaycäyanquiman. Paycunaga chaqui puntanyag röpancuna jatipäcushga cälicunachöpis puriyan, runacuna ‘Tayta Dios munangannömi paycunaga cawayan’ niyänanta munallarmi. Paycunaga goricäcuyänan wayicunachöpis mas allin cag jamacuyänancunachöran jamasquiyan. Micupacuypä invitashga carpis mas allin cag jamacunacunataran ashiyan.

⁴⁷Tsaynö alli tucuycarmi viüdacunapataga imaycancunatapis sacyapar ushayan. Nircur tsaycunata ruraringa runacuna mana tantiyayänanpämi mana ima rurashganö unayrä Tayta Diosmanpis mañacur mayaräyan. Tsaynö cayanganpitam paycunataga Tayta Dios mana cuyapapya castiganga”.

**Pobri viüdapa ofrendan Tayta
Diospä alläpa väleg cangan**
(*Marcos 12.41-44*)

21 ¹Tsaypitam templuchö Jesus ricasquirgan rícu runacuna gelléta ofrenda wiñacuyänan cäjaman wiñacyagta. ²Tsaychömi ricargan juc wactsa viüdapis ishcay ichishag pöcu valoryog gelléllata wiñaycagta. ³Tsayta ricaycurni discipuluncunata Jesus nirgan: “Allau, cay pobri viüdapa ofrendanga mas valoryogmi cashga Tayta Diospäga. ⁴Waquin cagcunaga capuyanganpita putsollantam garaycuyashga. Cay wactsa warmega tsayllana cawacunampä caycaptinpis capungan cagtam wiñaparcushga” nir.

**Templu juchutishga cananpä cagta
Jesus willacungan**
(*Mateo 24.1,2; Marcos 13.1,2*)

⁵Tsaychö caycäyaptin discipuluncunaga parlaycäyargan

templu pergarangan rumicuna cuyaylapä cangantam y shumag adornashga cangantam. Tsaynö niptinnam Jesus nirgan:

⁶“Ricaycangantsic caytsican templu juchungam. Manam ni juc rumipis pergaraycar quëdangatsu. Chipyaypa juchurmi ushacanga” nir.

**Cay patsa manarä ushaptin
imacunara päsananpä cagta Jesus
willacungan**
(*Mateo 24.3-14; Marcos 13.3-13*)

7Tsaynam discipuluncuna Jesusta tapuyargan: “Taytay, ¿imaytä ningayquinö templuta juchutsiyanga? ¿Imanöpatä musayäshä tsaycuna ruracar gallaycunampä cagta?” nirnin.

⁸Tsaynö niyaptinnam Jesus nirgan: “Pagtatä pipis llullapar llutancunata criyicätsiyäshunquiman. Atscagmi nogapa jutichö llullacogcuna chäyämunga: ‘Nogaga salvacog Cristum cä’ o ‘Ushacäcuy tiempu chämushghanam’ nir. Tsaynö niyäshuptiquipis gamcuna ama cäsuyanquitsu. ⁹Maytsaychöpis ‘Gyërram caycan’ nirnin runacuna parlayaptinpis ama mantsacäyanquitsu. Rasunpapis puntataga tsaycunarämi päsanga. Tsaycuna päsaptinpis cay patsaga ushacar manam gallangarätsu”.

¹⁰Mastapis nirgan: “Juc nacion runacunam pelyanga jucag nacionwan, juc marcam jucag marcawan.

¹¹Maytsaychöpis terremötu captin patsam alläpa cuyunga. Mallagay watacunam canga. Imaycaläya geshyacunam canga. Tsaynömi ciëluchöpis ricacämunga mantsacäcupä imayca señalcuna”.

¹²“Tsaycuna manarä päsaptinmi runacuna autoridäcunaman apatsiyäshunqui. Goricäcuyänan wayicunachömi astayäshunqui.

Carcelcunamanmi wichgatsiyäshunqui. Puëdeg autoridäcunapa, mandacog reycunapa ñöpancunamanmi chätsiyäshunqui nogapa willacuynita willacuyangayquipita. ¹³Tsaychömi gamcuna yachatsingäcunata paycunatapis willacuyanqui.

¹⁴Gamcunaga ama yarpachacuyanquitsu presu autoridäcunaman apayäshuptiqui imata parlayänayquipäpis. ¹⁵Nogam tantiyatsiyäshayqui imata niyänayquipä cagtapis. Tsaymi maygan chiquiyäshogniquicunapis imaniyaptapis camäpacuyangatsu ni contrayäshunquinatsu. ¹⁶Tsay witsancunaga gamcunata mana criyicog taytayquicunam autoridäcunaman entregayushunqui presu tsariyäshunayquipä. Tsaynömi waugiquicuna, castayquicuna, y amiguyquicuna entregayäshunqui presu tsariyäshunayquipä. Tsaynöpam waquinniquicunataga wanutsiyäshunqui. ¹⁷Nogaman criyicayämungayquipitam pipis maypis chiquiyäshunqui. ¹⁸Tsaynö rurayäshuptiquipis ama llaquicuyanquitsu. Ima pásayäshuptiquipis Tayta Dios manam dejaycuyäshunquitsu. ¹⁹Tsaynö caycaptina imayca ñiacaycunata pásarpis mana ajayaypa criyicamog cagmi Tayta Diospa ñöpanman chäyanga”.

**Feyupa ñiacaycuna cananpä
Jesus willacungan**
(Mateo 24.15-21; Marcos 13.14-19)

²⁰“Jerusalen marca ushacänanpäna caycanganta musyayanqui soldäducuna maytsayninpa jirurupasquishgatana ricarmi. ²¹Llapayqui criyicogcuna Judea jircacunapa geshpir awywacuyanqui. Jerusalenchö caycagcunapis geshpir awywacuyanqui. Chacracunachö

caycagcunapis ama cutiyanquinatsu wayiquicunaman. ²²Tsay junagcunam runacuna castigashga cayanga. Tsaynöpam Diospa palabran gellgarangancuna llapanpis cumplinga. ²³Tsayläya ñacay junagcunachö, allau geshyag warmicuna y llulluncuna chuchuycag warmicuna. Tsay junagcunaga alläpa cuyapapämi runacuna ñacayanga. ²⁴Waqintam wanutsiyanga y waqintam presu apayanga juclä caru nacioncunaman. Tayta Diosta mana cäsucog runacunam Jerusalen marcata munaynincunachö tsaräyanga munayyog caynin ushacäcunganyag”.

**Cielupita cay patsaman
cutimunänpä cagta Jesus willangan**
(Mateo 24.29-31; Marcos 13.24-27)

²⁵“Tsayläya ñacacuycuna pásasquiptinga mananam rupaypis ni quillapis atsicyanganatsu. Estréllacunapis cielupita shushuyämungam. Lamarpis mantsacäcupä bonyaypa bonyarmi gayaranga. Tsaycuna pásaptinmi llapan runacuna mantsacaywan turwäyanga. ²⁶Cielu sicsicyagta ricarmi runacuna pasaypa mantsacaywan ‘Imanörä cay patsa canga?’ nir wanur pitiyangarä. ²⁷Tsaypitam noga cielupita pucutay jananchö pasaypa chipipirrä shamuycagta runacuna ricayämanga. ²⁸Tsaycuna llapanpis ruracar gallaycuptin nogaman yäracamogcuna cushicuyanqui. Musyayanquinam tsay ñiacaycunapita jipiptü gloriaman aywayänayquipäna cagta”.

**Hígus jachaman iwalatsir imay
cutimunänpä cagtapis Jesus
tantiyatsingan**
(Mateo 24.32-35; Marcos 13.28-31)

²⁹Nircur caynopis Jesus tantiyatsirganmi: “Cay hígusman

iwalatsir ningäcunata yarparäyanqui.
³⁰Musyayanquim tamya tiempu gallaycuptin hígus jachapa yuran tsegllimunanpäna cagta. ³¹Tsayönümi cay niacaycuna gallaptin gamcunapis tantiyayanquina ciélupita cutimunapä cercana canganta. ³²Cay ningäcuna gallaptin tsay witsan runacuna manarä ushacäyaptinmi llapanpis cumplinga. ³³Ciélü y cay patsa ushacäcupintipis nogá ningäcunaga llapanmi ruracanga”.

**Jesus cutimunapä listuna
canantsicpä willacungan**

³⁴“Mana yarpashgata cutimur pagtatä gamcunata tariycáman imayca jutsallachö cawaycagta, machashga ima caycäyagta, o imaycayogpäpis yarpachacuywan gongamashga caycäyagta. ³⁵Tsayönüllutan cawacogcunaga manam ni jucpis geshpingsatsu Tayta Diospa castigunpita. ³⁶Tsaymi imaycay örasis Tayta Diosllaman mañacur listullana caycäyanayqui. Tsayönüaga mananam infiernuman aywayanquinatsu, sinöga nogapa ñöpämanmi cushishgalla chäyämunqui”.

³⁷Tsayönümi ari Jesus junagpa templuchö yachatsicurir tsacaypana Olivos jircanman aywag tsaychö punur quëdanapä. ³⁸Cada goya cada wäray templuman Jesus yachatsicog aywaptin imanömi runacuna goricäyag yachatsicunganta wiyayanapä.

**Judas Iscariote Jesusta
ranticunapä conträtuta rurangan**
*(Mateo 26.1-5, 14-16;
Marcos 14.1,2,10,11; Juan 11.45-53)*

22 ^{1*}Pascua fiesta semänachö leavadüraynag tantata micur gallaycunapänam caycargan. ²Tsay fiestachö Jesusta yachay shimincunawan tsarisquir

wanutsiyänanpämi willanacuyargan sacerdöticunapa mandagnincuna y ley yachatsicogcuna. Peru tsaychö gorirag runacuna ajacurcuyänanta mantsacurmì tsariyarganrätsu.

³Tsayönü yarpaycäyaptinmi Satanás yaycurgan Judas Iscariotipa shongunman. Judaspis Jesuspaga apostolíninmi cargan. ⁴Paymi sacerdöticunapa mandagnincunaman y templu täpag wardiyacunapa mandagnincunaman parlag aywaycur caynö nirgan: “Jesus quiqullan caycangan öram regitsiyäshayqui prësu apacuyänayquipä”.

⁵Tsayönü nisquiptinnam sacerdöticuna cushishga auniyargan gelléta págayänanpä. ⁶Tsaypitaga Judas shuyacurnam gallaycurgan Jesus quiqullan caycangan örä regitsinanpä.

**Pascua merendata
discípuluncunawan micuyänanpä
Jesus alistangan**
*(Mateo 26.17-25; Marcos 14.12-21;
Juan 13.21-30)*

⁷Levadüraynag tantata micuyänan Pascua fiesta semäna gallaycunán junagnam cargan. Tsay junagga wata watam Israel runacuna carnishcunata pishtar micuyag. ⁸Tsaymi Jesus cachargan Pedrutawan Juanta “Pascua fiestachö merendata micunantsicpä puestucayämuy” nir.

⁹Tsaynam paycuna tapuyargan: “Taytay, ¿maychötä puestuyämushä?” nirnin.

¹⁰Tsayönü niyaptinnam Jesus nirgan: “Jerusalenpa aywayay. Tsayman charmi ricayanqui juc runata uyllawan yacuta apaycagta. Tsay runapa gepallanpa aywayanqui may wayinman changanyagpis. ¹¹Tsaychömi wayiyogta niyanqui: ‘Señor Jesusmi tapucun: ¿Maygan cuartuyquichötäshi

discípuluncunawan canan Pascua
merendata micuyanga?" nir. ¹²Tsaynö
niyaptiqui wayiyognam
ricatsiyäshunqui altuschö jatun cuartu
nogantsicpä alistashgatana. Tsaychö
listacäyämunqui micunantsicpä" nirnin.

¹³Tsaynö niyaptinnam ishcan
discípuluncuna aywacuyargan
Jerusalenman. Tsayman chärirnam
Jesus ningannölla tariyargan llapantapis
alistapacushgata. Tsaychönam
discípuluncuna Pascua merendata
micuyänanpä listapacuyargan.

Micuyangan öra Jesus

Santa Cénata rurangan

(Mateo 26.26-30; Marcos 14.22-26;
1 Corintios 11.23-25)

¹⁴Tsaynam merenday örana captin
discípuluncunawan Jesus jamacuyargan
micuyänanpä. ¹⁵Tsaychömi Jesus
nirgan: "Imanömi munaycurgö cay
Pascua merendata gamcunawan
micuya manarä wanungäyag. ¹⁶Caynö
cay Pascua merendata mananam
micushänatsu Tayta Diospa ñöpanchö
gamcunawan micungäyag".

¹⁷Tsaynö nisquirnam
micucäyaptinna väsüchö vínuta
aptarcur Jesus Tayta Diosman mañacur
agradesicurgan. Nircurnam
discípuluncunata macyargan caynö nir:
"Cay vínuta llapayqui upuyay.
¹⁸Yapayga mananam vínuta
upushänatsu Tayta Diospa ñöpanchö
gamcunawan mushog vínuta
upungäyag".

¹⁹Tsaynömi tantata aptarcurpis Tayta
Diosman mañacur agradesicurgan.
Nircurnam paycunata paquipargan:
"Cayga nogapa cuerpii. Cay tantata
micur gamcuna raycur wanungäta
yarpäyanqui".

²⁰Tsaynöllam merendata ushasquir
väbuchö vínuta aptarcurpis nirgan:

"Cayga nogapa yawarnümi. Noga
yawarniña jichar wanuptimi Tayta Dios
runacunawan *mushog conträtuta
ruranga criycamog cagcunata
jutsancunapita perdonananpä".

²¹"Tsaynö caycaptinpis gamcuna
caychö nogawan micucagpita jucliquim
chiquimagnicunapa maquinman
entregayämanqui. ²²Noga Tayta Diospita
shamogtaga Diospa palabran
gellgaranganchö ningannöllam runacuna
wanutsiyämanga. Peru allau ranticamagni
runa, iima cuyapaypärä canga!"

²³Tsaynö niptinmi juclin juclinpis
discípuluncuna ricänacur
tapunacuyargan: "¿Maygantsicrä
ticrapuycantsic?" nirnin.

Apostolnincuna mayganpis mas mandag cayta munayangan

²⁴Tsaypita mayganpis mandacog cayta
munar gechunacurmi discípuluncuna
rimanacuyäyargan. ²⁵Tsaynö
rimanacuyaptinmi Jesus nirgan: "Cay
mundu entéruchö nacion mandacuna
munayanganmanmi mandacuyan.

Tsaynö lluta mandacog cayaptinpis 'Alli
runam payga' niyanran. ²⁶Gamcunaga
ama tsaynö mandacog cayta
yarpäyaytsu. Tsaypa rantinga llänu
shonguyquicunawanmi cawayänayqui
pitapis maytapis cuyaparnin.

²⁷Musayanquim patroncuna mësachö
micuptin empliyäduncuna siriyanganta.
Nogaga tsay empliyäducunanöllam
cawangäyagga caycä, manam
patronnötsu. Tsaymi gamcunapis
noganölla cawayänayqui".

²⁸"Imayca fiacaychö captipis gamcuna
nogawanmi imaypis cayarguyqui.

²⁹Tsaymi gamcunata churayäshayqui
mandacog cayänayquipä, Tayta Dios
nogata mandacog canäpä
churamanganno. ³⁰Gamcunaga
nogawanmi micuyanqui y upuyanqui.

Tsaynömi cutimupti jamacuyanqui mandacogcuna jamacuyänan *trönuman, Tayta Dios quiquinpä acrangan runacunata mandacuyänayquipä”.

**Pedro ñegananpä cagta
Jesus ningan**

(*Mateo 26.31-35; Marcos 14.27-31;
Juan 13.36-38*)

³¹Tsaypitanam Pedruta Jesus nirgan: “Pedro, Satanasmí Tayta Diosta rugacushga: ‘Jesuspa discipulun Pedruta llutancunata ruratsishä’ nir. ³²Tsaymi gampä Tayta Diosman mañacurgö Satanas munanganta ruratsishuptiquipis Tayta Diosllaman yapay shumag yäracunayquipä. Tsaynö cangan yäracurmi criyicog mayiquicunata valoratsinqui paycunapis nogaman shumag yäracayämunanpä”.

³³Tsaynö niptinnam Pedro nirgan: “Ishcanticta carcelman apar wanutsimänantsic captinpis manam ñiegashayquitsu, taytay” nir.

³⁴Tsaynam Jesus nirgan: “Pedro, canan pagasmi nogapä tapuyäshuptiqui quimsa cuti ‘Manam regïtsu’ nir ñiegamanqui gällu manarä cantaptin”.

**Jesuspa wanuynin cercana
caycangan**

³⁵Tsaypitanam discipuluncunata Jesus tapurgan: “Gellëniynagta, punchuynagta, y llangiynagta willacuyänayquipä cachapti ñimallapis faltäyäshurgayquicu?” nir.

Tsaynam paycuna niyargan: “Manam imapis faltäyämargantsu, taytay”.

^{36,37}Jesusnam nirgan: “Diospa palabran gellgaranganchö caynö nirmi gellgaraycan: ‘Jutsasapacunawan iwaltsishgam canga’ nir. Tsaynö gellgaraycan nogapämi. Cananpitaga willacog aywar imallayquicunapis apayanqui. Espädaynag cagga punchuyquicunata ranticusquirpis rantiyay”.

³⁸Tsaynam discipuluncuna niyargan: “Caychö caycan ishcay espädäcuna, taytay”.

Niptin Jesusnam nirgan: “Gamcuna manam tantiyayanquitsu imata nicayämangayquitapis”.

**Olivos jircanchö Jesus Tayta
Diosman mañacungan**

(*Mateo 26.36-46; Marcos 14.32-42*)

³⁹Tsaypitam Jesus aywargan imaypis aywanganño Olivos jircanman discipuluncunawan. ⁴⁰Tsayman chaycurnam discipuluncunata nirgan: “Tayta Diosman mañacuyay Satanas jutsaman mana ishquitsiyäshunayquipä” nir.

⁴¹Tsaynö nisquirmi mas washaläman aywasquirnin gongurucuycur Tayta Diosman mañacurgan caynö nir:

⁴²“Tayta Diosllä, cay ñicanäpä cagpita munarninga jipiycamay. Peru itsanga ama noga munängänöga catsuntsu. Gam munangayquinölla caycutsun”.

⁴³Tsaynö Jesus pasaypa llaquicur rugacuycaptinmi juc angel yuripasquir valoratsirgan mana alläpa llaquicunapanpä. ⁴⁴Tsaynö captinpis llapan shongunwan Tayta Diosman mañacuptinmi jumpinpis yawarnörä patsaman juturgan. ⁴⁵Tayta Diosman tsaynö mañacunganpita cutiyurnin discipuluncunata tarirgan llaquicuypta chip wanupa punucashga caycäyagtam. ⁴⁶Tsaynam Jesus nirgan:

“¿Punucäyanquicu? Ricchar Tayta Diosman mañacuyay Satanas jutsaman mana ishquitsiyäshunayquipä” nir.

**Jesusta prësu tsarircur
apacuyangan**

(*Mateo 26.47-56; Marcos 14.43-50;
Juan 18.3-11*)

⁴⁷Tsaynö Jesus nicaptinnam discipulun Judas Iscariote chasquirgan atsca

runancuna pushashga. Nircurnam Jesuspa ñöpanman witiycur saludar cääranchö mutsaycurgan.⁴⁸ Tsaynam Jesus nirgan: “Judas, ¿chiquimagnicunaman entregamänayquipäcu mutsaycamanquirä?” nir.

⁴⁹ Tsaynam présurna apacuyänanpä cagta tantiyasquir discipuluncuna Jesusta niyargan: “Taytay, espädäcunawan gocachascayämushä” nir.⁵⁰ Tsaynö nirmi mas mandagnin cag sacerdötipa wätayninpa derëcha cag rinrinta juc discipulun espädanwan walluriycurgan jipicagpä.

⁵¹ Tsaymi Jesus nirgan: “iAmana imanayaynatsu!” Nisquirmi runapa rinrin wallucashgata yataycullar alliscatsirgan.

⁵² Jesusta présu apayänanpä shamogcunaga cayargan mandag sacerdötica, templu täpag wardiyacunapa mandagnincuna, y Israel runacunapa autoridänincunam. Paycunatam Jesus nirgan: “Gamicunaga čimanirtä espädayquicunawan tucruyquicunawan shayämunqui imayca ladrontanöpis présuyämänayquipä?⁵³ Runacunata yachatsirrin goyay goyaypis templuchö cargächä. Tsaychöga čimanirtä présu tsariyämargayquitsu? Cananga Satanaspa munayninta rurayänayquipä öra chämushganam”.

Jesusta Pedro ñiegangan

(Mateo 26.57,58,69-75;
Marcos 14.53,54,66-72;
Juan 18.12-18, 25-27)

⁵⁴ Tsaypitanam Jesusta présu tsarircur apayargan sacerdöticunapa mandacogninpa wayinman. Payta présu apacuyaptin Pedro caru gepallantam aywargan.⁵⁵ Runacunaga sawan rurinchö ninata tsarircatsirmi mashacuyçayargan. Tsayman yaycurirmi Pedrupis paycunawan mashacuycargan.⁵⁶ Tsaychömi Pedro mashacuycagta

ricaycur juc wätay warmi nirgan: “Cay runapis Jesuswanmi purigaran” nir.

⁵⁷ Tsayta wiyaycurmi mantsariycanganta Pedro nirgan: “Warmi, nogalläga manam payta regicütsu” nir.

⁵⁸ Tsaypita rätunnintanam juc runapis Pedruta ricaycur nirgan: “Gampis paywan puregmi canqui”.

Niptinmi Pedro nirgan: “Nogaga manam paywan imaypis purillashga cätsu” nir.

⁵⁹ Tsaypita juc öratanöna juclam nirgan: “Rasunpaypam cay runaga Jesuswan pureg Galilea runa. iTsay runacunanoëi caycampis!” nir.

⁶⁰ Tsaynö niptinnam Pedro nirgan: “iManam musyätsu imata parlapaycämangayquitapis!”

Pedro tsaynö nicaptinmi gällu cantasquirgan.⁶¹ Tsaynam sii Jesus ticraycur ricaycupinträ Pedro yarpasquirgan caynö ninganta: “Gällu manarä cantaptionmi quimsa cuti ñiegamanqui”.⁶² Tsay ninganta yarpasquirmi itsanga Pedro wagtaman yargasquir pasaypa llaquicur wagargan.

Présognin runacuna Jesusta

burlacur magacuyangan

(Mateo 26.67,68; Marcos 14.65)

⁶³ Tsaypitanam présognin runacuna burlacur Jesusta magayargan.

⁶⁴ Nircurnmi ñawinta tsaparcur niyargan: “iDios caycarga mä, pí magashungayquitapis niyämay!” nir.

⁶⁵ Tsaynö nirmi tucuya rurarnin burlacuyargan.

Israel puëdeg autoridäcunapa

ñöpanman Jesusta chätsiyangan

(Mateo 26.59-66; Marcos 14.55-64;

Juan 18.19-24)

⁶⁶ Patsa warasquiptinnam Israel runacunapa puëdeg autoridänincuna,

mandag sacerdöticuna, y ley yachatsicogcuna despächuncunaman goricäyargan. Tsaychönam Jesusta tapuyargan: ^{67,68}“Canan mä, willayäm. ¿Rasunpacu gam Tayta Dios cachamungan salvacog canqui?” nir.

Tsaynam Jesus nirgan: “Aumi, paymi cä” niyäshayquipis gamcuna criiyämänayqui captinchi. ⁶⁹Cananpitaga nogá ciéluchö caycäshä poderösü Tayta Diospa derécha cag lädunchömi” nir.

⁷⁰Tsaynö niyuctinmi llapancuna niyargan: “Tsayöraga, gam Diospa tsurinchä canqui, iau?” nir.

Tsaynam Jesus nirgan: “Aumi, gamcuna niyangayquinöllam cä” nir.

⁷¹Paycunanam niyargan: “Quiquinpis Diospa tsurin canganta nicämashgaga cimapanatä testigutapis ashishun? [Tsaynö Dios tucuycarga iwanutsishga catsun!]”

Pilatuman Jesusta presu apayangan

(Mateo 27.1,2; Marcos 15.1-5;
Juan 18.28-38)

23 ¹Tsaypitanam llapancuna contrarna Jesusta maquinpita watarcur mandacog *Pilatuman apayargan. ²Tsaychönam Pilatuta niyargan: “Cay runaga llutancunatam yachatsicuycan. Manam munantsu Romapä impuestusta runacuna págayanantapis. Jinachöpis quiquinmi nogacunapa mandayämag rey canganta nicäyäman. [Tsaynö mandag tucog cagga wanutsishga catsun]”.

³Tsay niptinnam Jesusta Pilato tapurgan: “¿Rasunpacu canqui Israel runacunapa mandacognin rey?” nir.

Jesusnam nirgan: “Gam ningayquinöllachä cä”.

⁴Tsaynam Pilato nirgan mandacog sacerdöticunata y tsaychö goricashga

caycag runacunata: “Cay runa llutanta yarpaptinpis, nogataga cimatä gocaman? Ima jutsantapis manam taritsu”.

⁵Tsaynö niptinnam Israel autoridäcunaga masrä niyargan: “iManam tsaypis tsaynötsu! Romapa contran sharcuyänänpämi runacunata pasapya aquishapaycan. Galilea provinciapa hasta cay Judea provincia quinranyagpis tsaynöllam yachatsicuycan”.

Herodesman Jesusta apapäyangan

⁶Tsayta wiyarnam paycunata Pilato tapurgan: “¿Rasunpacu Galileapita cay runaga?” nir.

“Aumi, payga Galileapitam” niyaptinnam Galilea provinciapa mandagnin Herodesman Jesusta apatsirgan. Tsay junagcuna Jerusalenchömi unas Herodespís caycargan.

⁸Jesuspä parlayangancunata wiyashga carmi Herodesga puntapitana ñöpanchörä ima milagrullatapis rurananta munargan. Tsaymi Jesusta ricaycur cushicurgan.

⁹Tsaychö Herodes yaparir yaparir tapupaptinpis Jesus manam imatapis parlacurgantsu. ¹⁰Mandag sacerdöticunawan ley yachatsicogcunapis Jesuspa contranmi imaycatapis niyargan.

¹¹Nircurnam soldäduncunawan rey Herodes asipäyänan raycur Jesusta reytanörä catsiyargan quiquinpa mantunta jatiparcur. Tsaypitanam cangan cutitsirgan Pilato cagman. ¹²Tsay junagmi Herodeswan Pilato amishtayargan puntata chiquinacurcur.

Jesusta wanutsiyänänpä Pilato dejaycungan

(Mateo 27.15-26; Marcos 15.6-15;
Juan 18.39-19.16)

¹³Jesusta Pilatuman cutiyatsiptinnam Pilatuna gayatsirgan mandacog

sacerdöticunata, autoridäcunata, y waquin runacunatapis. ¹⁴Tsaychö llapancuna goricasquiyaptinnam nirgan: “Gamcuna cay runata apayämurguyqui: ‘Cay runaga runacunatam yachaycätsin mandagnintsicpa contran sharcuyänanpä’ nirnin.

Ñöpayquicunachö tapurga manam ima jutsantapis tarigötsu contran niyämangayquinöga. ¹⁵Tsaynömi Herodespis may tarishgatsu ima jutsantapis. Tsaymi cayman cutitsimushga. Tantiyacuyay. Manam ima jutsanpis cantsu wanutsishga cananpäga. ¹⁶Tsaymi payta astarcatsillar cachaycushä” nir.

¹⁷[Pilatoga yachacashganam wata wata *Pascua fiesta semänachö runacuna mañayangantaga juc présuta cachag.] ¹⁸Tsaymi Pilato Jesusta cacharinanta munaptin runacuna juc shimilla gayaraya niyargan: “Ama Jesustaga cachaytsu. Barrabasta cachaycunayquitam munayäga” nirnin.

¹⁹(Barrabasga carcelchö wichgaraycargan Roma nacionpa contran sharcunganpita y runacunata wanutsinganpitam.)

²⁰Tsaymi Pilato yapay runacunata parlapargan Jesusta cachaycuya munarnin. ²¹Tsaynö parlapaptinpis runacunaga masrämi gayaräyagan: “¡*Cruzchö wanutsun! ¡Cruzchö wanutsun!” nirnin.

²²Tsaynam Pilato yapay nirgan: “Wanunapäga ñima mana allitata rurashga? Manam taritsu ima jutsantapis. Tsaymi astarcatsillar cachaycushä”.

²³Tsaynö niptin llapan runacunam masrä gayarar niyargan cruzchö wanutsinapä. ^{24,25}Tsaynö masrä gayaräyaptinnam Jesusta runacunaman Pilato entregaycurgan munayanganta ruracuyänanpä. Runacuna

mañacuyangannöllam Barrabasta cachaycurgan Romapa contran sharcushga caycaptinpis y runacunata wanutshishga caycaptinpis.

Jesusta cruzchö clavayangan

(Mateo 27.32-44; Marcos 15.21-32; Juan 19.17-27)

²⁶Tsaynö Jesusta cruzchö clavag apaycarnam tincuyargan Cirene marcapita juc runa Simon jutiyog chacranpita aywacuycagwan. Paytam niyargan Jesus apaycangan cruzta umrurcur Jesuspa gepanpa apananpä. ²⁷Tsaytsica runacunam Jesuspa gepanta aywaycäyargan. Tsaychömi atscag warmicunapis llaquicurnin wagayarcar aywaycäyargan. ²⁸Tsaymi wagaycag warmicunata Jesus nirgan: “Jerusalen warmicuna, ama nogapäga wagayaytsu. Wagayayga quiquipicunapis y wawayquicunapis imanö ñacayänayquipä cagta. ²⁹Feyupa ñacaycuna captinmi pasaypa llaquicuywan runacuna niyanga: ‘iCushicuyätsun wawaynag warmicuna!’ nir. ³⁰Tsaychömi runacuna ñacaycunata mantsariywan gagacunatapis: ‘iJanäcunaman juchuriycamuy juclla wanucuyänapä!’ niyanga. ³¹Nogatapis caynö ñacaycätsiyämarga imanörä gamcunataga ñacatsiyäshunqui”.

³²Tsaynö Jesusta apaycar ishcag ladroncunatapis apayarganmi Jesustawan juntu crucificayänanpä.

³³Tsaypita “Calavéra” ninganman chaycatsirnam Jesusta cruzman clavayargan. Apayangan ladroncunatapis crucificayargan juchin cagtam Jesuspa derécha cag lädunman y jucagtanam itsogninman. ³⁴Tsay öram Jesus nirgan: “Papällay, cay crucificayämag runacunata cuyaparin perdonaycuy. Manam musayantsu imata ruraycäyangantapis”.

Soldäducunanam sortiyayargan Jesuspa röpanta. ³⁵Tsaychö runacuna ricaraycäyaptinmi autoridäcuna Jesusta asiparnin niyargan: “Juccunataga salvaycacharganchä. Canan quiuinga čimanirtä salvacuya puëdintsu? Tayta Dios cachamungan salvacog carninga, mä tsay cruzpita yarparamutsun”.

³⁶Tsaynöllam soldäducunapis asiparnin Jesusta uputsiyargan upucuyänan ayag vínuta: ³⁷“Israel runacunapa mandagnin rey caycarga mä, quiquipi salvacuy” nir.

³⁸Imapita wanutsiyanganta runacuna musyayänanpämí juc letréruta cruzpa puntanman clavayargan caynö gellgarcur: “CAYGA ISRAEL RUNACUNAPA REYNINMI” nir.

³⁹Tsaypitam jucag crucificaraycag runapis Jesusta asiparnin nirgan: “Salvacog carga mä, tsaypita salvacuriy ari, nircur nogacunatapis salvayämänayquipä”.

⁴⁰Tsaynö niptinmi juchnin cag ajäpargan: “Gampis paynö ñacaycarga čmanacu Tayta Diosta mantsacunqui? ⁴¹Nogantsicga jutsantsiccunapitam ñacaycantic. Payga manam ima jutsatapis rurashgatsu”.

⁴²Nircurni Jesusta nirgan: “Señor Jesus, nogalläta yarpacallämanqui ari, cay patsaman mandacog cutimungayqui junag” nir.

⁴³Tsaynam Jesus nirgan: “Cananpitaga nogawanmi canqui Tayta Dioslläpa ñöpanchö”.

Jesus wanungan

(Mateo 27.45-56; Marcos 15.33-41;
Juan 19.28-30)

⁴⁴Tsaypitaga pullan junagpitam quimsa öra rupay mana atsicyaptin

patsa tsacasquirgan. ⁴⁵Tsay örallam templu rurinchöpis alli awashga jatun cortina^z urayninpa ishcayman rachisquirgan. ⁴⁶Tsaypitam Jesus fuertipa gayarasquirmi nirgan: “iTayta Diosllä, maquiquimannam cawaynilläta churaycamü!” nir. Tsaynö nisquirmi wanusquirgan.

⁴⁷Tsaynö imayca päsangancunata ricaycurnin soldäducunapa capitanninmi Tayta Diosta alabagnö ticrar nirgan: “Rasunpam cay runaga jutsaynag cashga” nir.

⁴⁸Tsaychö caycag runacunapis aywacuyargan pasaypa llaquicurninmi. ⁴⁹Jesuswan reginacogcunananam itsanga carulällapita ricaráyargan. Tsaynöllam yanaparnin Galileapita gatirag warmicunapis tsaychö cayargan.

Jesusta pampayangan

(Mateo 27.57-61; Marcos 15.42-47;
Juan 19.38-42)

^{50,51}Juc runam cargan Jose jutiyog, Tayta Dios munangannö cawacog. Payga cargan Judea provinciachö Arimatea marcapitam. Paypis Israel runacunapa autoridäninmi cargan. Waquin autoridäcuna Jesusta wanutsiyänanpä willanacuyaptinpis payga manam munargantsu. Josega criyirgan Tayta Dios aunicungannö salvacogta cachamunampä cagtam. ⁵²Paymi Pilatuman aywargan Jesuspa ayanta pampananpä negnин. ⁵³Pilato “Pampay ari” nisquiptinnam Jesuspa ayanta cruzpita jipisquir línu sábanaswan wancurgan. Nircurnam pampag apargan manarä pipis pampacungan gagachö uchcushga *sepulturaman.

⁵⁴Jesus wanurgan viernis tardim. Cada viernismi tardipaypaga Israel

^z 23.45 Tsay templu rurinchö alli awashga jatun cortinapä musyanayquipä liyinqui Exodo 26.31-33; Hebreos 9.1-10; 10.19,20.

runacuna säbadu jamapay junagpä listacuyag.⁵⁵ Galileapita Jesuswan shamog warmicunananam Joseta gatipar aywayargan sepultüraman. Tsayman chaycurmi ricayargan Jesuspa ayanta imanö churangantapis.⁵⁶ Tsaypita wayiman cutiyurninnam alistacuyargan mucuchag perjümicunata üsuncunaman Jesuspa ayanman wiñapäyänanpä. Llapanta alistapacusquirnam Tayta Diospa mandamientunta cumplir jamapäyarganrä säbadu jamapay junag captinna.^a

Jesus wanunganpita cawarimungan

(Mateo 28.1-10; Marcos 16.1-8;
Juan 20.1-10)

24 ¹Tsaypita dominguman warämognam tsaca tsacallana warmicuna aywayargan Jesus pamparangan cagman, alistayangan perjümicunata apacurcur.
²Chaycuyänanpäga pamparangan uchcuta tsaparag rumpis jucläman wititsishgam caycänä.³Tsayman yaycur manam tariyargannatsu Señor Jesuspa ayanta.

⁴Tsaynö mantsacashga caycäyaptinmi ishcay *angelcuna chipipiycag röpashga paycunapa ñöpancunachö ricacusquiyargan.⁵ Warmicuna paycunata ricaycurnam pasaypa mantsariywan gonguriyucuyargan. Tsaynam tsay yuripag angelcuna niyargan: “¿Imanirtä ashiycäyanqui wanushgacuna pamparanganchö cawaycagna runata? ⁶Mananam caychönatsu caycan. iPayga cawamushganam! Yarpäyay Galilea provinciachö caycarnin caynö niyäshungayquita: ⁷‘Noga ciélupita shamog runatam jutsasapa runacunapa

maquincunaman entregayämanga. Cruzchö wanutsiyämaptinpis quimsa junagtam cawamushä’ nir”.

⁸Tsaynö angel niyaptinrämi paycunapis yarpasquiyargan Jesus tsaynö rasunpaypa ningancunata.⁹Tsaymi Jesus pamparaycangan cagpita cutiyurnin willayargan chunca juc (11) apostolcunata y tsaychö runacunatapis.¹⁰Tsay willacogcunaga cayargan Maria Magdalena, Juana, Santiagupa maman Maria, y paycunawan aywag mas warmicuna.¹¹Jesus cawamunganta warmicuna willacuyaptinpis apostolcunaga manam ichicllapis criiyargantsu, manacagecunata parlaycäyanganta yarpar.¹²Wquin cag mana criiyaptinpis Pedrum itsanga cörillapa aywacurgan Jesus pamparangan cagman. Ruriman gawaycunapämi sábanaswan wancuyangannölla caycänä. Ayanta mana tariycurmi pasaypa mantsacashga cuticurgan.

Emaus nänichö ishcay discípuluncunata Jesus yuripangan

(Marcos 16.12,13)

¹³Tsay junagmi Jesuspa ishcay gatiragnincuna aywaycäyargan Emaus marcapa. Emaus cargin Jerusalenpita ishcay öra aywaynöllam.¹⁴Paycunaga aywaycäyargan Jesusta wanutsiyanganta parlaraycarmi.¹⁵Tsaynö parlaraycar aywaycäyaptinmi Jesus yurisquir paycunawan juntu aywargan.¹⁶Tsaynö juntu aywaycarpis tsay discípuluncuna manam tantiyayargantsu Jesus canganta.

¹⁷Tsaynam Jesus tapurgan: “Jau amígucuna, ¿imata parlartä aywaycäyanqui?” nir.

Paycunaga pasaypa llaquinashga carmi ichicuycuyargan.¹⁸Tsaynam

a 23.56 Israel runacunapä viernis patsa tsacaypitam säbadu jamapay junag gallaycog.

Cleofas jutiyog cag nirgan: “Pascua fiestaman shamog runacunaga llapanmi musayan ganyancuna Jerusalenchö ima pásacungantapis. ¿Manacu gamga musyanqui?”

¹⁹Niptinnam Jesus nirgan: “Mä willayämay. ¿Imatä cashga?” nir.

Paycunanam niyargan: “Nazaret marcapitam Jesus jutiyog cargan Diospa willacognin proféta. Payga Tayta Diospa willacuyintam willacushga y Tayta Diospa poderninwanmi imayca milagrucunatapis rurashga.

^{20,21}Nogacunaga yarpäyargä Roma nacionpa mandunpita pay jipimänantsicpä cagtam. Tsaynö captinpis paytam sacerdöticunapa mandagnincunawan autoridänintsiccuna Roma autoridäcunaman entregayahsha wanutsiyänanpä. Nicaptinmi Romanucuna cruzchö wanutsiyashga. Canan junagwanga quimsa junagnam Jesus wanungan. ²²Manam tsaypis tsayllatsu. Y mas mana criyipäga nogacunawan pureg waquin warmicuna mantscacäcuypätam willacuyan. Paycuna Jesusta pampayanganman tsaca tsacallana aywar ayantashi tariyahganatsu. ²³Tsaypita wayiman cutiyacamur willayämashga Jesus cawamunganta. Angelcunash yuripasquir paycunata Jesus cawamunganta willayashga.

²⁴Tsaynöllam waquin cag discipuluncunapis pamparangan cagman aywar warmicuna willacuyangannölla Jesuspa ayanta tariyahganatsu”.

²⁵Tsaynam Jesus paycunata nirgan: “¿Imanirtä gamcunaga pasaypa llaquicushga caycäyanqui? Diospa profétancuna niyangancuna, gamcunapä ¿imanirtä aja criyirä? ²⁶¿Manacu yarpäyanqui salvacogga ñacarcurrä

wanunganpita cawasquir Tayta Diospa ñöpanman cutinapä cagta?”

²⁷Tsaypitaga paycunata tantiyatsirgan quiquinpä imanö gellgaraycanganta, Moises gellgangancunapita gallaycur waquin profétacuna gellgayanganyag.

²⁸Tsaypita Emaus marcaman chaycurnam paycunapita Jesus pásacog tucurgan. ²⁹Tsaynö pásacuyta munaptinnam: “Patsa tsacaycannam, cayllachöna quëdacushun” niyargan. Tsaynö niyaptinnam Jesus paycunawan quëdacurgan.

³⁰Tsaypita wayichönám jamacurirna Jesus tantata aptarcur Tayta Diosta agradesicusquir paquirir paycunata macyargan. ³¹Tsay öram itsanga tsay discipuluncuna Jesus canganta tantiyasquiyargan. Tsaypita Jesus jinallanchömi illacasquirgan.

³²Illacasquiptinnam quiquin pura caynö parlayargan: “Jesus captinchir shonguntsicpis atsicyasquirgan nänita sharaycämur Diospa palabranta parlapämashga” nir.

³³Nircurnam paycuna jinan örä Jerusalenman cutiyargan. Chaycurnam tariyargan chunca juc (11) apostolcuna y waquin gatiragnincuna goriraycagta.

³⁴Tsaychönám tsay ishcay Jesuswan tincog discipuluncunata apostolcuna willapar niyargan: “iRasunpaypam Señornintsic salvacog cawamushga! Pedrutapis yuripashgam”.

³⁵Niyaptinnam paycunapis willayargan nänichö imanö pásangantapis y tantata paquingan örä Jesusta regiyangantapis.

Apostolnincunata Jesus yuripangan

(*Mateo 28.16-20; Marcos 16.14-18; Juan 20.19-23; Acts 1.6-8*)

³⁶Tsaynö unas parlaycäyaptinmi Jesus paycunapa chöpinchö ricacusquirgan: “Gamcunachö alli cawacuy caycullätsun” nir.

³⁷Paycunananam pasaypa
mantsacaycuyargan alma canganta
yarparnin. ³⁸Tsaynö
mantsacäyaptinnam Jesus nirgan:
“^aImanirtä mantsacashga caycäyanqui?
Noga cangäta ^cimanirtä criyianquitsu?
³⁹Ricayay maquïta y chaquiitapis.
iNogam cä! Yatayämay.
Ricayämangayquinöpis manam almatsu
cä. Almaga aytsaynag y tulluynagmi”.

⁴⁰Tsaynö nирninmi ricatsirgan
maquinta y chaquintapis. ⁴¹Tsaynam
discipuluncuna pay canganta ricaycur
criiyänanpä ajallarä captinpis
cushicuyargan. Tsaynö captinmi
rasunpa pay canganta criiyänanpä
Jesus mañacurigan:
“^dImallayquicunapis cancu
micurinäpä?” nir. ⁴²Tsaynö niptinmi
garayargan cancashga pescäduta.^b
⁴³Tsaycunatam micurgan paycunapa
ñöpancunachö.

⁴⁴Micusquirnam nirgan: “*Bibliata
gellgag llapan profétacunapis
gellgayarganmi nogata caycuna
pásamänanpä cagtaga. Gmcunawan
caycar willargä llapan tsay
gellgaraycangancuna cumplinänpä
cagtam. Tsay willangänöllam
pásamashga”.

⁴⁵Tsaynö nirmi Tayta Diospa palabran
gellgarangancunata tantiyatsirgan caynö
nir: ⁴⁶“Tayta Dios cachamungan
salvacogga wanunganpita quimsa
junagta cawamunänpä cagpis

gellgaraycanmi.
^{47,48}Musyayangayquinöpis tsay
gellgarangannöllam llapanpis pásashga.
Tsaymi nogapa jutichö runacunata
willapäyänayqui jutsa ruraynincunata
jagirir nogaman yäracuyänanpä.
Tsaynöpam Tayta Dios perdonanga
jutsa ruraynincunata. Jerusalenpita
gallaycur maytsaypapis aywar llapan
runacunata tsaynö willapäyanqui”.

⁴⁹“Gmcunamanmi noga cachamushä
papäni Tayta Diosllä aunicungan
Espíritu Santuta. Itsanga
Jerusalenllachö shuyaraycäyanqui
Espíritu Santuta chasquiyangayquiyag.
Chasquicusquirnam Tayta Diospa
poderninwanna cayanqui pay
munangannö cawayänayquipä”.

Jesus ciéluman aywacungan
(Marcos 16.19,20; Acts 1.9-11)

⁵⁰Tsaypitana discipuluncunata Jesus
pushargan Jerusalenpita Betania
quinranman. Tsaychö caycarnam
ricranta quichasquir Tayta Diosman
mañacurigan paycuna mana gongaypa
yäracuyänanpä. ⁵¹Tsaynö Jesus
paycunapä bendicionta
mañacusquiptinmi Tayta Dios ciélupa
apacurgan. ⁵²Tsaychö discipuluncuna
Jesusta gonguripärasquirmi cushishga
cuticuyargan Jerusalenman. ⁵³Tsay
junagpitaga Tayta Diosta alabayänanpä
cada junagmi templuman goricäyag.
[Tsaynö catsun.]

b 24.42 Waquin unay gellashgacunachö nican cancashga pescädutawan chumpac mishquita
micungantam.